

utai ti disemaia Tuhan mri ka kami dalam menoa serga ti ka datai: olih Isa Almesih, Tuhan kami. *Amin.*

2 Kor. 13.

PENGASIH Isa Almesih Tuhan kitai, pengrindu Allah Taala, penyaup Roh Alkudus, meruan enggau kitai samoa, belama-lama iya. *Amin.*

ATOR MASMUR DIBACHA

SURAT Masmur dibacha ambis sakali sa-bulan, baka ti diletak dalam Sambiang Pagi enggau Sambiang Lemai. Utang dalam Bulan Dua umbas macha 28 tau ka 29 hari aja.

Nyadi laban Bulan Satu, Tiga, Lima, Tujoh, Lapan, Sapuluh, enggau Duablas bisi 31 hari, Masmur ti diletak ka 30 Hari Bulan ka dibacha baru 31 Hari Bulan, ngambi ka Masmur 1 tau dibacha satu Hari Bulan.

Laban Masmur 119 sangat panjai, iya dibagi 22 kali, lalu 4 tau ka 5 bagi aja dibacha sakali.

Di ujong tiap Masmur, enggau tiap bagi Masmur mega, jako tu ditelah:

Mulia ka Apai, ka Anak: Ka Roh Alkudus.

Baka mula iya kalia, kamaiatu: Datai ka belama-lama iya. *Amin.*

MASMUR TI DILETAK KA HARI BESAI

Hari Besai.	Sambiang Pagi.	Sambiang Lemai.
Hari Kristmas	19, 45, 85	89, 110, 132
Hari Tiga Ti Pun Lent	6, 32, 38	102, 130, 143
Hari Tuhan Isa Diregang	22, 40, 54	69, 88
Hari Ista	2, 57, 111	113, 114, 118
Hari Tuhan Isa Pulai ka Serga	8, 15, 21	24, 47, 108
Hari Pentikost	48, 68	104, 145

SURAT MASMUR

1 HARI BULAN. SAMBIANG PAGI

MASMUR 1

- BEBERKAT orang nya ti enda bejalai nunda ka ajar orang ti jai,
 Ti enda nengah jalai orang ti salah:
 Ti enda duduk di endor orang ti ka beduan.
- 2 Tang iya rindu ka adat Tuhan:
 Lalu siang malam iya bepragam ka adat nya.
- 3 Iya baka kayu ti ditanam di tebing ai,
 Ti bedaun leboh timpoh iya datai:
 Daun iya enda layu;
 Samoa utai ti digaga orang nya ka nyadi.
- 4 Enda baka nya orang ti jai:
 Iya baka skau padi, ti ditaban ka ribut.
- 5 Nya alai orang ti jai enda tan leboh bechara:
 Orang ti bepenyalah enda tau diau di kaban orang ti lurus.
- 6 Nyadi Tuhan nemu jalai orang ti lurus:
 Tang jalai orang ti jai ka dirusak ka iya.

MASMUR 2

- NAMA kabuah orang bansa bukai baum belaban:
 Lalu orang mayoh bepragam ka utai ngapa?
- 2 Sida rajah di dunya angkat,
 Enggau sida orang printah baum:
 Ngelaban Tuhan, enggau ngelaban iya ti dikarinda ka Tuhan, ko sida,
- 3 Aram kitai mutus ka rantai ti enggau orang masong kitai:
 Lalu muka tanchang sida ari kitai.
- 4 Iya ti duduk di serga ka katawa ninga sida:
 Tuhan ka beduan sida.
- 5 Iya ka bejako enggau sida, laban iya ringat;
 Lalu nganu sida laban iya ringat bendar.
- 6 Taja sida ngerja baka nya, aku udah nuduk ka rajah aku:
 Datas bukit Sion, bukit aku ti kudus.
- 7 Aku ka nusi letak nya:
 Tuhan madah ka aku, Nuan anak aku;
 Sa-hari-tu aku udah beranak ka nuan.
- 8 Pinta soh aku, lalu aku ka mri ka nuan orang bansa bukai ka pesaka nuan:
 Enggau samoa telok dunya, awak ka nuan bempu iya.

- 9 Nuan ka nganu sida enggau tungkat:
 Lalu ngeredak ka sida, baka kebok ti pambar.
- 10 Nya alai jimat kita ti rajah:
 Belajar, kita ti mrintah orang.
- 11 Betuai ka Tuhan enggau nangi:
 Lalu andal enggau ati ti takut ka iya.
- 12 Titeh ka ajar, enggai ka Tuhan ringat, enggai ka kita mati di jalai:
 Laban iya ka ngenyit ringat.
 Beberkat samoa sida ti bepanggai di iya.

MASMUR 3

- TUHAN, nyampau pemayoh munsoh aku:
 Mayoh sida ti angkat ngelaban aku.
- 2 Mayoh sida ti bejako pasal aku, ko sida:
 Allah Taala nadai tau ngelepas ka iya.
- 3 Tang nuan Tuhan ka trabai ti ninding aku:
 Tuhan ti ngasoh orang bebasa ka aku, Tuhan ti ngemesai ka aku.
- 4 Aku ngangau ka Tuhan enggau nyawa aku:
 Lalu iya nyaut aku ari bukit iya ti kudus.
- 5 Aku gali lalu tindok:
 Udah nya aku dani, laban Tuhan ti ngintu aku.
- 6 Aku enda takut ka orang ti beribu-ribu:
 Ti ngator diri ngelaban aku.
- 7 Angkat Tuhan, lepas ka aku, laban nuan Tuhan ti Petara aku:
 Tuhan udah nampar moa samoa munsoh aku:
 Tuhan udah nanggal ka ngeli orang ti jai.
- 8 Tuhan ti tau ngelepas ka orang:
 Bri berkat ka anemiak nuan, Tuhan.

MASMUR 4

- LEBOH aku ngangau, aku minta Tuhan nyaut aku, kra nuan Petara ti ngelurus ka aku:
 Tuhan ti ngelepas ka aku leboh aku tusah;
 Kasih ka aku lalu dinga ka sambiang aku.
- 2 Kita anak mensia, penglama agi kita ngemalu ka aku, ti patut dipebasa ka kita:
 Penglama agi kita rindu ka utai ngapa, lalu ngiga utai bula?

- 3 Temu olih kita, Tuhan udah milih ka diriempu orang ti lurus:
Tuhan ka ninga, leboh aku ngangau ka iya.
- 4 Nangi kita ka Tuhan, anang salah:
Berunding dalam ati diriempu leboh gali; diau kita, anang engkertik.
- 5 Bri piring enggau ati ti lurus:
Lalu arap ka Tuhan.
- 6 Mayoh orang ti bejako, ko sida, Sapa ti ka mai kitai meda utai ti badas:
Malik ngagai kami, Tuhan, awak ka kami tau meda penampak moa Tuhan.
- 7 Tuhan udah ngasoh ati aku andal:
Lebih agi ari ati orang, leboh sida bulih padi enggau tuak mayoh.
- 8 Aku ka gali enggau selamat lalu tindok:
Laban Tuhan ti tau ngasoh aku diau lantang.

MASMUR 5

- DINGA ka jako aku, Tuhan:
Berunding ka peneka ati aku.
- 2 Dinga ka nyawa aku ti ngangau, nuan ti Rajah aku, ti Petara aku:
Laban aku ka besembang ngadap Tuhan.
- 3 Tumu pagi Tuhan ka ninga nyawa aku:
Tumu pagi aku ka ngator sambiang aku, lalu bejaga.
- 4 Laban Tuhan ukai Petara ti rindu ka penyai:
Nyadi orang ti jai enda tau begulai enggau Tuhan.
- 5 Orang ti sumbong enda tau bediri di moa Tuhan:
Laban Tuhan begedi ati soh orang ti ngerja penyai.
- 6 Tuhan ka muai sida ti bejako bula:
Tuhan begedi ati bendar soh orang pemunoh enggau orang pemula.
- 7 Olih pengasih Tuhan ti pepadu besai, aku ka tama rumah Tuhan:
Enggau ati nangi aku ka nyungkor ka diri nunga grija Tuhan ti kudus.
- 8 Iring aku, Tuhan, laban nuan Tuhan ti lurus, laban bisi orang ti ngipa aku:
Gaga lurus jalai nuan di moa aku.
- 9 Laban nadai jako sida ti tau dikarap ka aku;
Ati sida dalam nyin ambis jai:

- Mulut sida merangap baka lubang kubur;
Lalu nyawa sida ngelangkong orang.
- 10 Rusak ka sida, Tuhan Allah;
Awak ka sida rusak laban aum diriempu:
Buai sida laban pemayoh penyalah sida;
Laban sida udah ngelaban Tuhan.
- 11 Nyadi samoa sida ti bepanggai di Tuhan ka andal,
Sida ka manjong laban sida gaga, olih Tuhan ngintu sida:
Sida ti rindu ka nama Tuhan ka andal laban nya.
- 12 Laban Tuhan ka mri berkat ka orang ti lurus:
Tuhan ka ngelindong iya enggau pengasih, baka orang ti didinding enggau trabai ti besai.

1 HARI BULAN. SAMBIANG LEMAI

MASMUR 6

- RARA aku, Tuhan, utang anang enggau anu nuan:
Ajar aku, tang anang leboh Tuhan ringat.
- 2 Kasih ka aku, Tuhan, laban aku lemi:
Asoh aku grai, Tuhan, laban tulang aku nyau lemi.
- 3 Ati aku tusah amai:
Tuhan, penglama agi aku tusah?
- 4 Pulai baru ngagai aku, Tuhan, lepas ka samengat aku:
Idup ka aku, laban Tuhan endang kasih ka orang.
- 5 Laban udah orang mati, nadai iya tau agi ingat ka Tuhan:
Dalam sabayan sapa ti ka muji Tuhan?
- 6 Aku udah puas amai marinsa:
Tiap malam panggah aku basah, olih aku nyabak;
Tikai aku mega basah, olih ai mata aku.
- 7 Mata aku nyau rabun laban penusah:
Iya nyau silau, laban sida ti ngelaban aku.
- 8 Lari ari aku, samoa kita ti ngerja penyai:
Laban Tuhan udah ninga munyi sabak aku.
- 9 Tuhan udah ninga utai ti dipinta aku:
Tuhan ka nyambut sambiang aku.
- 10 Samoa munsoh aku ka malu lalu tusah amai:
Sida ka nikal pulai, lalu ka malu ngenyit.

MASMUR 7

- TUHAN Allah, ti Petara aku, aku arap ka Tuhan ka ngintu aku:
Idup ka aku ari sida ti marinsa ka aku, lalu lepas ka aku.

- 2 Enggai ka sida ngerusak ka samengat aku, baka singa ti ngerusak ka utai;
Lalu nyarik ka iya, laban nadai orang nyaup aku.
- 3 Nuan Tuhan ti Petara aku, enti aku udah ngaga nama nama:
Enti jari aku udah salah;
- 4 Enti aku udah malas enggau jai iya ti endang pangan aku:
(Tang aku udah ngelepas ka iya ti munsoh aku, taja iya nadai kabuah);
- 5 Enti aku udah ngerja baka nya, awak ka munsoh ngiga samengat aku, lalu marinsa ka iya:
Awak ka iya ngeram ka aku, lalu ngemaroh ka aku datai ka tanah.
- 6 Angkat Tuhan dalam pengingat nuan,
Lalu ngring ka diri ngelaban munsoh ti nganu aku:
Angkat Tuhan, saup aku, lalu ngeletak ukum.
- 7 Awak ka samoa mensia begempuru ngelingi Tuhan:
Nyadi Tuhan duduk datas krusi pechara ari atas sida.
- 8 Tuhan bechara ka samoa mensia:
Putus ka pechara aku Tuhan, nunda ka pendiau aku ti lurus, ti tuchi.
- 9 Asoh badu utai ti digaga orang ti jai, tang kring ka orang ti lurus:
Laban Allah Taala ti endang lurus nemu pragam ati orang.
- 10 Allah Taala ti trabai aku:
Ti ngintu sida ti lurus ati.
- 11 Allah Taala hakim ti lurus:
Amai, iya Petara ti ringat soh orang jai tiap hari.
- 12 Enti orang enda berubah ati, iya ka ngansah pedang iya:
Iya udah narik panah iya, lalu nyedia ka iya enggau nimbak.
- 13 Lalu iya udah nyedia ka utai dikena munoh iya:
Laja iya bisa.
- 14 Baka indu pedis, radai ka beranak, pia mega orang ti jai pedis laban penyai:
Baka indu ti ngandong, pia mega orang ti jai naroh penuyu enggau utai bula dalam ati iya.
- 15 Iya udah ngaga parit ti dalam:
Lalu iyaempu udah laboh kadalam nya.
- 16 Penyalah ti digaga iya ka pulai ninggang iyaempu:
Nyadi pemangah iya ka pulai nganu iyaempu.
- 17 Aku ka muji Tuhan laban penglurus iya:
Lalu aku ka nyanyi, muji nama Tuhan ti pemadu besai.

MASMUR 8

- TUHAN Allah, Petara kami,
Nyampau pemesai nama Tuhan dalam samoa menoa:
Tuhan udah mandang ka mulia iya ari langit.
- 2 Enggau jako orang ti lemi, ti baka anak biak ti agi nusu,
Tuhan udah ngring ka letak iya;
Laban bisu orang ti ngelaban Tuhan:
Awak ka Tuhan tau ngalah ka munsoh, enggau sida orang pemunoh.
 - 3 Leboh aku berunding ka langit, ti digaga jari Tuhan:
Bulan mega enggau bintang ti di-ator Tuhan;
 - 4 Ko runding ati aku, Nama meh ti mensia, alai Tuhan ngingat ka iya:
Enggau anak mensia alai Tuhan ngintu iya?
 - 5 Laban Tuhan udah ngaga iya baroh mimit ari sida malikat:
Lalu udah mri makota ka iya, iya nya mulia enggau basa.
 - 6 Tuhan ngasoh iya mrintah utai ti digaga jari Tuhan:
Samoa utai di-asoh Tuhan nunduk ka iya.
 - 7 Samoa bedus, samoa krebau:
Datai ka samoa jelu ti di kampong.
 - 8 Samoa burong ti di langit, enggau ikan ti di tasik:
Enggau samoa utai ti nyimrai di ai.
 - 9 Tuhan Allah, Petara kami:
Nyampau pemesai nama Tuhan dalam samoa menoa.

2 HARI BULAN SAMBIANG PAGI

MASMUR 9

- AKU ka muji Tuhan enggau pengambis ati aku:
Aku ka nusi samoa kerja Tuhan ti besai.
- 2 Aku ka andal lalu gaga laban aku arap ka Tuhan:
Aku ka nyanyi muji nama Tuhan, ti pemadu besai.
 - 3 Leboh munsoh aku lari pulai:
Sida ka tetrap lalu kensa rusak di moa Tuhan.
 - 4 Laban Tuhan udah ngring ka pechara aku:
Tuhan udah duduk di krusi, lalu mutus ka pechara enggau lurus.
 - 5 Tuhan udah ngerara sida orang petang, lalu ngerusak orang ti jai:
Tuhan udah muai nama sida belama-lama.
 - 6 Munsoh Tuhan nyau nadai agi, nyau rusak belama-lama:
Lalu nengri sida ti dibuai Tuhan,
Nadai orang ingat ka sida.

- 7 Tang Tuhan ka duduk megai printah belama-lama:
Iya udah ngator krusi iya, awak ka megai pechara.
- 8 Nyadi iya ka bechara ka dunya enggau lurus:
Lalu mutus ka pechara samoa bansa orang enggau patut.
- 9 Tuhan ka nyadi kubau ti tinggi ka sida ti kena keduana:
Nyadi kubau mega ka orang ti mati ati.
- 10 Nyadi sida ti nemu nama Tuhan ka arap ka Tuhan:
Laban nuan, Tuhan, nadai kala ninggal ka sida ti ngiga nuan.
- 11 Nyanyi, muji Tuhan ti megai printah di Sion:
Tusi ka orang mayoh, utai ti digaga iya.
- 12 Laban Tuhan ti malas orang ti udah kena bunoh, udah ingat ka sida:
Iya udah ingat mega ka kangau orang ti baroh ati.
- 13 Kasih ka aku Tuhan;
Peda pamarinsa aku laban sida pedis ati soh aku:
Tuhan ti ngangkat ka aku, leboh aku nyau ka mati.
- 14 Awak ka aku tau nyanyi puji ka Tuhan:
Di pintu nengri Sion,
Aku ka andal, laban Tuhan ngelepas ka aku.
- 15 Sida orang petang udah laboh ka lubang ti dikali sida-empu:
Kaki sida udah disintak dalam jarin ti dilalai sidaempu.
- 16 Tuhan udah mandang ka diri, iya udah mutus ka pechara:
Iya udah nangkap orang ti jai, laban kerja ti digaga sidaempu.
- 17 Nyadi orang ti jai ka pulai ka sabayan:
Serta enggau samoa bansa orang ti enda ingat ka Allah Taala.
- 18 Laban ukai berari sida ti tusah enda di-ingat ka:
Ukai berari mega sida ti saranta ngadang ngapa.
- 19 Angkat Tuhan; anang mensia menang:
Awak ka samoa bansa orang kena pechara di moa Tuhan.
- 20 Asoh sida takut, Tuhan:
Awak ka samoa bansa orang nemu diri endang sigi mensia aja.

MASMUR 10

LAPA nuan ngenyauh ka diri ari aku, Tuhan:
Lalu belalai ka diri leboh aku mati ati.

- 2 Orang ti jai, laban sida sumbong, marinsa ka sida ti umang:
Asoh sida nya disalah ka, laban runding ati sida ti jai.

- 3 Orang ti jai ngemesai ka diri pasal ingin ati iyaempu:
Nyadi olih iya rangka, iya enggai betuai ka Tuhan, lalu mechat iya.
- 4 Orang ti jai, olih iya sumbong, bejako, ko iya, Tuhan enda malas ka penyai:
Tu samoa runding iya, Allah Taala endang sigi nadai bisi.
- 5 Utai ti digaga iya seruran nyadi;
Letak Tuhan dalam, lalu enda ulih runding iya.
Nya alai iya mantah orang ti ngelaban iya.
- 6 Ko iya dalam ati diriempu, Aku enda tau alah:
Tentu aku enda tusah belama-lama.
- 7 Mulut iya salalu mansut ka jako sumpah enggau jako bula enggau jako kras:
Di mulut iya bisi pemanchal enggau penyai.
- 8 Iya duduk ngipa orang dalam nengri ti mit:
Leboh nadai orang ti tau meda, iya munoh sida ti nadai bepenyalah,
Iya belalai, lalu ngemata ka orang ti nadai penulong.
- 9 Leboh iya ngipa, iya belalai baka singa dalam lubang gua:
Iya ngipa ka nangkap orang ti umang,
Nyadi sida ti umang ditangkap enggau jarin iya.
- 10 Iya ngeruntok, iya ngipa orang:
Nyadi orang ti nadai penulong alah olih sida ti kring agi.
- 11 Ko iya dalam ati iya, Allah Taala enda ingat ka sida:
Iya udah ngalih ka moa iya, lalu enda meda sida.
- 12 Angkat Tuhan; kring ka jari nuan Tuhan Allah:
Anang enda ingat ka orang ti baroh ati.
- 13 Lapa orang ti jai tau mechat Allah Taala:
Ko iya dalam ati diriempu, Tuhan enda malas penyai.
- 14 Tang Tuhan bisi meda; laban Tuhan endang meda penyalah enggau penusah orang, awak ka iya tau malas enggau jari diriempu:
Orang ti nadai penyaup bepanggai di Tuhan;
Laban Tuhan endang nyaup sida ti nadai pangan.
- 15 Asoh alah kuasa orang ti salah:
Lalu buai ambis kerja ti digaga orang ti jai.
- 16 Kra, Tuhan endang Rajah datai ka belama-lama:
Sida orang petang ka kena buai ari menoa iya.
- 17 Tuhan udah ninga utai ti dipinta orang ti baroh ati:
Tuhan ka ngring ka ati sida, lalu mending ka sida.
- 18 Tuhan ti ka malas ka orang ti patu, enggau orang ti kena keduana:
Awak ka orang di dunya tu nadai agi negah sida.

MASMUR 11

- Aku arap ka Tuhan ka ngintu aku:
Kati ko orang bejako enggau aku, Lari nuan baka burong
ti terbai ngagai bukit?
- 2 Laban orang ti jai narik panah sida,
Lalu ngator laja di tali:
Awak ka nimbak orang ti lurus ati dalam petang.
 - 3 Enti adat ti badas dibuai orang:
Nama ti tau digaga orang ti lurus?
 - 4 Tang Tuhan agi diau di kaaba iya ti kudus,
Nyadi krusi perintah Tuhan agi bisi di serga:
Iya ngemata ka, lalu iya ngelala pragam ati mensia.
 - 5 Tuhan nguji lalu rindu ka orang ti lurus:
Tang ati iya begedi ka orang ti jai, ti mangah.
 - 6 Awak ka nuang bara api datas orang ti jai:
Merirang enggau angin ti bisa, nya ka nyadi upah sida.
 - 7 Tuhan endang lurus; iya rindu ka kerja ti lurus:
Orang ti lurus ka meda moa iya.

2 HARI BULAN. SAMBIANG LEMAI

MASMUR 12

- IDUP ka aku, Tuhan, laban orang ti badas nyau ambis:
Nyadi nadai agi mensia ti tau dikarap ka.
- 2 Orang bejako bula enggau diri sama diri:
Sida bejako enggau mulut ti ngelangkong, enggau ati ti
enda tentu.
 - 3 Awak ka Tuhan nutup mulut ti ngelangkong:
Lalu netak dilah sida ti ngelakar.
 - 4 Ko orang ti baka nya, Enggau jako, kami ngalah ka orang:
Kami endang bisi kuasa bejako, sapa ti ka nagang kami?
 - 5 Tegal orang umang ti kena keduan, tegal orang saranta ti
ngangau;
Aku ka angkat kamaiatu, ko Tuhan:
Aku ka ngidup ka iya ti digagai sida.
 - 6 Jako Tuhan endang jako tuchi:
Baka pirak ti dituchi dalam dapur di tanah,
Ti dituchi enggau api tujoh kali.
 - 7 Nuan Tuhan ka ngintu sida,
Tuhan ka ngelepas ka samoa sida ari orang serak tu
belama-lama.
 - 8 Orang ti jai bisi di sabarang endor:
Leboh orang ngemesai ka kerja ti jai.

MASMUR 13

- PENGLAMA agi nuan, Tuhan, enda ingat ka aku:
Penglama agi nuan enda malik song aku?
- 2 Penglama agi aku berunding dalam ati aku,
Leboh ati aku tusah besari-sari:
Penglama agi munsoh aku menang ngelaban aku?
 - 3 Tilik aku lalu saut aku, Tuhan ti Petara aku:
Trang ka mata aku, enggai ka aku tindok lalu mati.
 - 4 Enggai ka munsoh aku bejako munyi tu, Aku udah men-
ang ngelaban iya:
Enggai ka ati orang ti ngelaban aku andal leboh aku
dikachau.
 - 5 Tang aku arap ka pengasih Tuhan:
Awak ka ati aku andal laban Tuhan ngelepas ka aku.
 - 6 Awak ka aku nyanyi, muji Tuhan:
Laban iya badas enggau aku.

MASMUR 14

- ORANG ti budau berunding dalam ati diri, ko iya, Allah
Taala sigi endang nadai bisi:
Ati mensia endang sigi jai, sida udah ngaga kerja ti
dipegedi ka Allah Taala;
Nadai bisi siko ti ngerja utai ti badas.
- 2 Tuhan nilik mensia ari serga:
Ka meda enti bisi orang ti jimat,
Ti ngiga Allah Taala.
 - 3 Tang samoa sida udah limpang, samoa sida udah nyadi
orang jai:
Nadai siko ti ngerja utai ti badas, siko pen nadai.
 - 4 Kati baka samoa sida ti bekerja jai enda kena ajar:
Sida ti ngidup ka diri enggau utai anembiak aku, baka ti
enggau roti ti di-empa sida,
Lalu enda sambiang ngagai Allah Taala.
 - 5 Tang sida takut bendar:
Laban Allah Taala bisi enggau serak orang ti lurus.
 - 6 Kita udah madam ka runding orang ti umang:
Tang Tuhan nyaup iya.
 - 7 Awak ka pinglepas Israil datai ari Sion:
Leboh Tuhan ngambi pulai anembiak iya ti ditangkap
orang.
Awak ka sida Jakob gaga lalu sida Israil andal.

3 HARI BULAN. SAMBIANG PAGI

MASMUR 15

- TUHAN, sapa ti tau diau di rumah Tuhan:
Sapa ti tau diau di bukit Tuhan ti kudus?
- 2 Orang ti diau tuchi, ti ngerja utai ti ngena:
Orang ti bejako bendar ari ati iya.
 - 3 Orang ti enda betenah enggau mulut iya,
Ti enda nganu orang ti begulai enggau iya:
Ti enda bejako jai pasal pangan iya.
 - 4 Dalam runding iya, orang ti jai patut dibantah:
Tang iya bebasa ka sida ti nangi ka Tuhan:
Orang nya besemaia enggau pangan iya, lalu enda mungkir,
taja pen iyaempu rugi.
 - 5 Orang nya bejalah ka wang, enda beranak ka iya:
Iya enda nyambut suap ari orang ti ngelaban sida ti enda salah:
Orang ti ngaga samoa utai nya enda ka dibuai belama-lama.

MASMUR 16

- INTU aku, Tuhan Allah:
Laban aku arap ka Tuhan.
- 2 Aku udah bejako enggau Tuhan, Nuan endang Petara aku:
Nadai utai ti lebih berguna ka aku ari Tuhan.
 - 3 Nyadi pasal orang ti tuchi, ti diau di dunya:
Sida nya orang ti pemadu badas, ti dikarindu ka aku.
 - 4 Penusah sida ka nambah-menambah, sida ti mungkir ari Tuhan,
lalu betuai ka antu:
Aku enggai mri darah ka piring, baka ti dibri sida,
Aku enggai nelah nama sida enggau mulut aku.
 - 5 Tuhan iyaempu endang pesaka aku, endang bagi aku:
uhan iyaempu mega ka ngintu pesaka nya.
 - 6 Tanah ti bagi aku, tanah ti badas:
Pesaka aku pen manah bendar.
 - 7 Aku ka muji Tuhan ti ngajar aku:
Amai iya ti ngajar ati aku malam hari.
 - 8 Aku salalu niteh ka Tuhan ti pengulu aku:
Aku enda tau limping laban Tuhan ngiring aku.
 - 9 Nya alai ati aku andal, samengat aku mega gaga:
Tuboh aku mega ka nyamai.
 - 10 Laban Tuhan enggai ninggal ka samengat aku di sabayan:
Enggai mega Tuhan nyagi orang ti dikarindu ka iya ngasai ka pemat.

- 11 Tuhan ka madah ka aku jalai pengidup:
Nyadi enggau Tuhan bisi pengandal ti pemadu iya;
Tuhan mega ka mri penyamai ti meruan belama-lama.

MASMUR 17

- DINGA ka utai ti lurus, Tuhan, anang enda iboh ka kangau aku:
Pending ka sambiang aku ti pansut ari mulut ti enda bula.
- 2 Awak ka letak Tuhan pasal aku ditemu orang:
Mata Tuhan endang ngelala utai ti ngena.
 - 3 Tuhan udah ngabas ati aku; Tuhan udah ngosong aku malam hari:
Tuhan udah nguji aku, lalu nadai ati jai ditemu dalam aku:
Mulut aku enda bejako salah.
 - 4 Pasal aku enggau utai ti digaga orang mayoh:
Nunda ka jako Tuhan, aku udah ngintu diri ari jalai sida ti nganu orang.
 - 5 Kaki aku enda limping ari jalai Tuhan:
Kaki aku enda trap.
 - 6 Aku udah ngangau ka nuan Tuhan Allah, laban nuan ka ninga ka aku:
Singit ka pending, Tuhan, lalu ninga ka jako aku.
 - 7 Tambah ka pengasih nuan, Tuhan, ti enggau jari kanan ngelepas ka sida ti arap ka Tuhan:
Ari orang ti angkat ngelaban sida.
 - 8 Intu aku, baka orang ti jimat ngintu diri:
Ngelalai ka aku dibaroh penglindong Tuhan,
 - 9 Enggai ka orang ti jai beduan aku:
Sida nya ti munsoh aku, ti ngelingi aku.
 - 10 Sida udah ngring ka ati diri:
Mulut sida bejako sumbong.
 - 11 Sida ngipa kami leboh bejalai:
Sida ngemata ka kami awak ka ngerebah ka kami ka tanah.
 - 12 Tiap tiap sida baka singa ti kran ka nangkap:
Baka anak singa ti belalai ka diri ngipa orang.
 - 13 Angkat Tuhan,
Ambat iya, lalu asoh iya nunduk:
Enggau pedang nuan Tuhan, lepas ka samengat aku ari orang ti jai.
 - 14 Enggau kuasa jari nuan, Tuhan, lepas ka aku ari orang:
Ari orang ti berunding ka dunya tu aja:
Prut sida kenyang olih utai badas ti dibri Tuhan,

- Pikir sida, lantang enti sida bisi anak,
Lalu sida ninggal ka pesaka sida ka anak sida ti mit.
15 Tang olih aku lurus, awak ka aku meda moa Tuhan:
Nyadi umbas ka aku, leboh aku dani, enti aku meda
gambal Tuhan.

3 HARI BULAN. SAMBIANG LEMAI

MASMUR 18

- AKU bendar rindu ka Tuhan:
Olih Tuhan ti pengring aku.
2 Tuhan ti peninding aku, kota aku enggau pinglepas aku;
Tuhan ti Petara aku, ti baka batu ti ninding aku; aku arap
ka iya:
Tuhan ti ka trabai enggau senyata aku, ti enggau aku
menang, Tuhan mega kota aku ti tinggi.
3 Aku ka ngangau ka Tuhan ti patut dipuji:
Kra, iya ka ngelepas ka aku ari munsoh.
4 Aku baka orang ti dibalut tali, ti ka dibunuh:
Aku takut ka penyai ti ngelingi aku.
5 Aku baka orang ti ka tama sabayan:
Lalu baka burong ti marinsa olih panjok, pia mega aku
tusah berunding ka diri ka mati.
6 Tang leboh aku tusah aku nyampi ngadap Tuhan,
Lalu aku ngangau ka Petara aku:
Tuhan ninga ka nyawa aku dalam rumah iya,
Lalu kangau aku didinga pending iya.
7 Nyadi udah nya dunya beguyat lalu berenyang:
Samoa bukit berenyut,
Lalu beguyat laban Tuhan ringat.
8 Bisi asap ti pansut ari lubang idong iya:
Bisi api ti ngerusak, ti pansut ari nyawa iya,
Nyadi laban nya arang mau.
9 Nyadi langit terbuka, lalu Tuhan nurun:
Endor ti dibaroh iya pemadu petang.
10 Iya terbai enggau sayap malikat:
Amal iya terbai dras, dibai ribut ti balat.
11 Iya belalai dalam endor ti petang:
Nyadi petang ngelingi iya, baka moa-hari ti chelum.
12 Ari penampak ti di moa Tuhan, moa-hari nyau nadai agi:
Nyadi pansut ujan batu enggau api.
13 Tuhan ngasoh guntor bemunyi di langit:
Nyadi leboh Iya ti Pemadu Tinggi bejako,
Pansut ujan, batu enggau api.

- 14 Tuhan mambar ka orang enggau laja iya:
Iya ngerusak sida enggau kilat ti balat.
15 Nyadi samoa arong ai pegari,
Lalu ayan penuduk dunya:
Olih anu Tuhan,
Olih kena seput nyawa iya.
16 Iya ngunyor ka jari ari atas, lalu ngambi aku:
Iya matak aku ari ai ti bah.
17 Iya ngelepas ka aku ari munsoh aku ti kring:
Ari sida ti pedis ati soh aku, laban aku enda tau ngelaban
sida.
18 Sida ngosong aku leboh aku tusah:
Tang Tuhan ngring ka aku.
19 Iya mai aku pansut ngagai endor ti lantang:
Iya ngelepas ka aku laban iya rindu ka aku.
20 Tuhan ngupah aku nunda ka penglurus aku:
Nunda ka penuchi jari aku, iya udah malas aku.
21 Laban aku udah niteh ka jalai Tuhan:
Aku enda jai, aku enda mungkir ari Allah Taala, ti Petara
aku.
22 Laban samoa ator iya endang dipegai aku:
Nyadi aku enda muai pesan iya.
23 Aku badas enggau iya:
Lalu ngintu diri ari penyai.
24 Nya alai Tuhan ngupah aku nunda ka penglurus aku:
Nunda ka penuchi jari aku, ti dipeda iya.
25 Tuhan mandang ka pengasih iya ngagai orang ti kasih ka
pangan iya:
Tuhan mandang ka pemadas iya ngagai orang ti badas.
26 Tuhan mandang ka penuchi iya ngagai orang ti tuchi:
Tang Tuhan kras enggau orang ti bingkok.
27 Laban Tuhan ka ngelepas ka orang ti baroh ati:
Tang iya ka ngemaroh ka orang ti sumbong.
28 Nyadi Tuhan ka masang ka lampu aku:
Allah Taala, ti Petara aku ka nerang ka petang aku.
29 Olih penyaup Tuhan, aku brani nyerang bala munsoh:
Olih kuasa Tuhan aku tau merjok kota.
30 Nyadi jalai Allah Taala endang badas:
Jako Tuhan udah tentu;
Tuhan nyadi trabai ka samoa sida ti arap ka iya.
31 Sapa ti Petara enti ukai Allah Taala:
Sapa ti kubau-batu enti ukai Allah Taala?

- 32 Iya nya Petara ti ngemas ka aku enggau pengring:
Ti ngator jalai aku badas amai.
- 33 Iya negap ka kaki aku baka kaki rusa:
Lalu niri ka aku datas endor ti tinggi.
- 34 Iya ngring ka aku leboh beprang:
Nyadi lengan aku tau narik panah temaga.
- 35 Tuhan udah ninding aku enggau pengasih iya:
Tuhan udah ngring ka aku;
Tuhan udah ngemesai ka aku enggau penelap iya.
- 36 Tuhan udah ngaga jalai aku luas:
Nyadi kaki aku enda teklinchir.
- 37 Aku ngagai munsoh aku, lalu nangkap sida;
Aku enda pulai apin sida ambis dibunoh.
- 38 Aku mantap sida datai ka sida enda tau angkat:
Sida ka rebah di kaki aku.
- 39 Tuhan udah ngangkat ka aku enggau pengring, awak ka
aku tau beprang:
Tuhan udah ngasoh sida ti angkat ngelaban aku nunduk
ka aku.
- 40 Tuhan udah ngasoh munsoh lari ka aku:
Awak ka aku tau munoh sida ti pedis ati soh aku.
- 41 Sida ngangau, tang nadai orang ti tau ngelepas ka sida:
Amiai sida ngangau ka Tuhan, tang iya enda nyaut sida.
- 42 Aku nutuk sida redak, baka amau ti pambar olih ribut:
Aku ngindik sida baka tanah luchak di jalai.
- 43 Tuhan udah ngelepas ka aku ari orang mayoh ti belaya;
Tuhan udah ngaga aku nyadi kapala orang bansa bukai:
Bansa orang ti enda dikelala aku betuai ka aku.
- 44 Serta sida ninga pasal aku, sida ngasi ka aku:
Nyadi orang bansa bukai nunduk ka aku.
- 45 Orang bansa bukai nyau ambis nadai agi:
Lalu enggau takut sida pansut ari kubau sida.
- 46 Tuhan endang idup; beberkat Tuhan ti endang nyadi
kubau-batu aku:
Anang enda ngemesai ka Allah Taala, ti ngelepas ka aku.
- 47 Kra iya Petara ti malas ka aku:
Lalu ngasoh orang mayoh nunduk ka aku.
- 48 Iya ti ngelepas ka aku ari munsoh aku;
Amiai Tuhan ti ngangkat ka aku tinggi agi ari sida ti
ngelaban aku:
Tuhan ti ngelepas ka aku ari orang ti mangah.
- 49 Nya alai aku ka muji Tuhan di moa orang bansa bukai:
Lalu aku ka nyanyi, muji nama Tuhan.

- 50 Enggau kuasa besai, iya ngelepas ka rajah iya:
Lalu mandang ka pengasih iya ka orang ti dipilih iya;
Iya nya ka Daud enggau anak uchu iya belama-lama.

4 HARI BULAN. SAMBIANG PAGI

MASMUR 19

- LANGIT mandang ka mulia Allah Taala:
Lalu pemesai langit mandang ka kerja ti digaga iya.
- 2 Hari siti madah ka mulia Allah Taala ngagai hari siti:
Malam siti nusi ka penemu iya ngagai malam siti.
- 3 Ukai tawas bisi bemunyi; ukai malam bisi bejako:
Nadai bisi nyawa ti didinga orang.
- 4 Tang siang malam mandang ka mulia Tuhan sablah bumi,
Lalu nusi pasal iya ngagai samoa telok dunya:
Langit baka langkau ka matahari,
- 5 Ti bengepan baka orang ti ka nikah, ti pansut ari bilik iya:
Lalu andal baka orang ti kring belawa.
- 6 Iya pansut ari sa-setak langit,
Lalu bejalai ngagai muak sapiak:
Nadai utai ti enda kena panchar iya.
- 7 Ajar Tuhan pemadu badas, lalu ngring ka samengat:
Jako Tuhan tentu, lalu ngemandai ka orang ti nadai
penemu.
- 8 Adat Tuhan adat ti ngena, lalu ngandal ka ati orang:
Pesan Tuhan tuchi, lalu nerang ka mata orang.
- 9 Ati orang ti nangi ka Tuhan endang tuchi, lalu meruan
belama-lama:
Letak Tuhan pen amai mega, lalu lurus bendar.
- 10 Patut tetengok ka iya lebih agi ari mas, amai mas mayoh ti
alus:
Iya manis agi ari ai nyerulean, ari ai ti nitik ari labit manyi.
- 11 Olih iya, anemiak Tuhan kena ajar:
Nyadi orang ti niteh ka iya bisi untong besai.
- 12 Sapa ti tau nemu penglimpang ati diri:
Tuchi aku ari penyalah ti enda dipeda.
- 13 Tagang anemiak Tuhan ari penyalah ti digaga olih ati
sumbong:
Enggai ka nya mrintah aku; baka nya aku badas amai,
Lalu aku ka tuchi ari penyalah ti besai.
- 14 Awak ka jako mulut aku enggau runding ati aku dikarindu
ka Tuhan:
Tuhan ti pengring aku, ti penglepas aku.

MASMUR 20

- AWAK ka Tuhan ninga ka nuan, leboh nuan tusah:
Awak ka Allah Taala, Petara Jakob ngangkat ka nuan.
- 2 Awak ka Tuhan mri ka nuan penyaup ari kaaba:
Lalu nyangga nuan enggau pengring ari Sion.
 - 3 Awak ka Tuhan ngingat ka samoa piring nuan:
Lalu nyambut piring ti ditunu nuan.
 - 4 Awak ka Tuhan mri ka nuan utai ti ka deka nuan:
Lalu ngasoh nyadi samoa peneka nuan.
 - 5 Aram kitai manjong laban Tuhan ngelepas ka kitai;
Aram kitai narit ka menira dalam nama Petara kitai:
Awak ka Tuhan mri samoa utai ti dipinta nuan.
 - 6 Kamaiatu aku nemu Tuhan ngelepas ka anembiak ti
dipilih iya,
Lalu ninga ka iya dalam serga, di endor ti kudus:
Tuhan ka ngelepas ka iya enggau kuasa iya ti besai.
 - 7 Bisi orang ti bepanggai di bala soldadu ti bekreta, enggau
ti bekuda:
Tang kitai bepanggai di Tuhan ti Petara kitai.
 - 8 Sida nya ka di-asoh nunduk lalu rebah:
Tang kitai ka angkat, lalu berdiri tetap.
 - 9 Intu rajah kami, Tuhan:
Lalu ninga ka kami leboh kami ngangau ka Tuhan.

MASMUR 21

- RAJAH kami ka andal olih pengring nuan, Tuhan:
Iya ka gaga amai, olih Tuhan ngelepas ka iya.
- 2 Tuhan udah mri ka iya utai ti ka tengok iya:
Lalu enda enggai mri utai ti dipinta iya.
 - 3 Tuhan udah ngosong iya, awak ka merkat iya enggau utai
ti badas:
Tuhan ngengkah datas pala iya makota mas, ti manah.
 - 4 Iya minta Tuhan ngasoh iya gayu, lalu Tuhan ninga ka iya:
Amai, Tuhan ngemanjai ka umor iya datai ka belama-
lama.
 - 5 Nama iya besai, laban Tuhan ngelepas ka iya:
Tuhan ngasoh orang nangi lalu bebasa ka iya.
 - 6 Tuhan ngasoh iya beberkat belama-lama:
Tuhan ngasoh iya gaga lalu andal, olih iya diau enggau
Tuhan.
 - 7 Rajah kami arap ka Tuhan:
Lalu iya meruan tetap berari, olih penelap Iya ti Pemadu
Tinggi.

- 8 Kuasa jari nuan ka ngalah ka samoa munsoh nuan:
Kuasa jari kanan nuan ka ngalah ka sida ti pedis ati soh
nuan.
- 9 Leboh nuan ringat, nuan ka ngasoh sida baka arang ti
di-empa api dapur:
Tuhan ka ngambis ka sida, olih iya ringat,
Lalu api ka makai sida.
- 10 Nuan ka munoh anak sida:
Lalu anak uchu sida ka nyau nadai agi.
- 11 Taja sida ngemba nuan enggau penyai:
Taja sida baum ka nganu nuan, sida enda ulih.
- 12 Laban nuan ka ngasoh sida lari:
Lalu ka nyedia panah nuan kena nimbak sida.
- 13 Anang enda ninggi ka diri Tuhan, olih nuan kring:
Baka nya kami ka nyanyi, lalu muji kuasa Tuhan.

4 HARI BULAN. SAMBIANG LEMAI

MASMUR 22

- TUHAN Allah, Petara aku, Tuhan Allah, Petara aku, lapa
Tuhan udah ninggal ka aku:
Lapa Tuhan jauh, lalu enda nulong aku, lapa Tuhan enda
ninga munyi demoh aku?
- 2 Tuhan Allah, aku ngangau siang hari, tang Tuhan enda
nyaut:
Malam hari mega, tang enda nemu penglantang.
 - 3 Tang Tuhan endang kudus:
Tuhan ti duduk di endor puji orang Israil datai.
 - 4 Aki ini kami arap ka Tuhan:
Sida arap ka Tuhan, lalu dilepas ka iya.
 - 5 Sida ngangau ka Tuhan, lalu dilepas:
Sida arap ka Tuhan, lalu enda malu.
 - 6 Tang aku baka belut, ukai baka mensia:
Aku dipechat orang, lalu dibantah orang mayoh.
 - 7 Samoa sida ti meda aku, katawa beduan aku:
Sida beduan aku, lalu ngilik ka pala, ko sida,
 - 8 Bepanggai nuan datas Tuhan; awak ka iya ngelepas ka
orang:
Awak ka iya ngelepas ka iya, olih iya rindu ka iya.
 - 9 Tuhan ti ngambi aku ari kandong indai aku:
Tuhan ti ngasoh aku arap, leboh aku agi nusu indai aku.
 - 10 Aku di-ajar bepanggai di Tuhan, kenyaui ari aku ada:
Tuhan ti Petara aku, kenyaui ari indai ti ngandong ka aku.

- 11 Anang Tuhan jauh ari aku, laban penusah endang dampih:
Lalu nadai orang ti ka nyaup aku.
- 12 Mayoh krebau ngelingi aku:
Krebau ti kring ari Basan udah ngelulong aku.
- 13 Sida merangap ka mulut sida, meda aku:
Sida baka singa ti mangah, ti merengong.
- 14 Aku asai ai ti dituang,
Samoa tulang aku asai ti enda ditampong:
Ati aku baka lilin,
Ti lela dalam tuboh aku.
- 15 Pengring aku nyau nadai, baka kebok ti blah;
Lalu dilah aku nyau lekat di mulut aku:
Lalu Tuhan udah ngali ka aku di tanah, awak ka aku tau mati.
- 16 Ukuoi udah ngelingi aku;
Kaban orang ti jai udah ngelulong aku:
Sida ngigit jari enggau kaki aku.
- 17 Aku tau niap samoa tulang aku:
Lalu orang ngenong merening aku.
- 18 Sida magi gari aku:
Lalu bechabut, sapa ti ka bempu baju aku.
- 19 Anang jauh ari aku, Tuhan:
Jampat nulong aku Tuhan, ti endang penyaup aku.
- 20 Sayau ka nyawa aku, anang iya dirusak pedang:
Anang nyawa aku di-anu ukoi.
- 21 Lepas ka aku ari mulut singa:
Ari tandok badak mega; Tuhan udah ninga ka aku.
- 22 Aku ka nusi nama Tuhan ka pangan aku:
Aku ka muji Tuhan di tengah orang ti arap.
- 23 Puji Tuhan samoa kita ti nangi ka iya;
Kemesai ka iya samoa kita anak uchu Jakob:
Bebasa ka iya samoa kita purih Israil.
- 24 Laban iya enda mechat, enda iya enggai meda penusah sida ti marinsa:
Enda iya enggai malik soh iya,
Tang leboh orang ngangau ka iya, iya ngidup ka iya.
- 25 Tuhan ti ngasoh aku mri puji, leboh orang mayoh begempuru:
Aku ka ngamai ka semaia aku di moa sida ti nangi ka Tuhan.
- 26 Orang ti marinsa ka makai kenyang;
Sida ti ngiga Tuhan ka muji iya:
Kita ka idup belama-lama.

- 27 Samoa bansa mensia di dunya ka ingat, lalu pulai ngagai Tuhan:
Samoa orang ka nyembah Tuhan.
- 28 Kra, Tuhan ti bempu printah:
Nyadi iya ti mrintah samoa bansa orang.
- 29 Samoa sida ti raja di dunya ka makai lalu nyembah iya:
Samoa sida ti endang ka mati ka nyungkor ka diri di moa iya;
Iya nya sida ti nadai tau ngidup ka samengat diri.
- 30 Anak uchu orang ka betuai ka iya:
Brita Tuhan ka ditusi ka serak orang ti ka datai.
- 31 Orang ka datai lalu nusi penglurus iya:
Sida ka madah ka utai ti digaga Tuhan, ngagai sida ti ada dudi.

MASMUR 23

- TUHAN ti pengibun aku, ti ngibun aku baka domba:
Aku enda tau kurang utai.
- 2 Iya ngasoh aku gali di padang ti badas:
Iya ngiring aku ngagai sungai ti ngasoh aku nyamai.
- 3 Iya ngidup ka samengat aku:
Iya ngiring aku nengah jalai penglurus, laban iyaempu lurus.
- 4 Leboh aku bejalai nengah lebak ti petang,
Aku enda takut ka pengrusak, laban Tuhan ti enggau aku:
Tungkat ti dipegai Tuhan ngasoh aku lantang.
- 5 Tuhan ngator mija ka aku di moa munsoh aku:
Tuhan nuang minyak datas pala aku; mangkok aku penoh.
- 6 Pemadas enggau pengasih Tuhan ka meruan enggau aku sapemanjai umor aku:
Nyadi aku ka diau dalam rumah Tuhan belama-lama.

5 HARI BULAN. SAMBIANG PAGI

MASMUR 24

- ALLAH Taala ti bempu bumi enggau samoa isi iya:
Iya ti bempu dunya enggau samoa orang ti diau dalam iya.
- 2 Tuhan ti nuduk ka iya datas tasik:
Lalu ngaga iya tegap ari atas ai bah.
- 3 Sapa ti tau niki ngagai bukit Tuhan:
Sapa ti tau bediri di endor iya ti kudus?
- 4 Iya ti lengis jari, ti tuchi ati:
Ti enda berunding ka utai ngapa,
Lalu enda ngakal orang.

- 5 Orang nya ka bulih berkat ari Tuhan:
Enggau ati ti lurus ari Tuhan Allah ti ngelepas ka iya.
- 6 Tu serak orang ti ngiga Tuhan:
Ti rindu ngiga Tuhan Allah ti Petara Jakob.
- 7 Angkat ka pala kita, kita pintu;
Awak ka kita di-angkat ka, kita pintu ti lama:
Awak ka Rajah nya ti bempu mulia tau tama.
- 8 Sapa Rajah nya ti bempu mulia:
Tuhan ti kring, ti bekuasa,
Tuhan ti bekuasa leboh iya beprang.
- 9 Angkat ka pala kita, kita pintu;
Awak ka kita di-angkat ka, kita pintu ti lama:
Awak ka Rajah nya ti bempu mulia tau tama.
- 10 Sapa Rajah nya ti bempu mulia:
Tuhan ti bempu bala serga enggau bumi,
Iya ti Rajah ti bempu mulia.

MASMUR 25

- Aku berunding ka nuan, Tuhan, Petara aku;
Aku udah arap ka Tuhan:
Anang aku malu;
Anang munsoh aku ngalah ka aku.
- 2 Nadai orang ti nganti Tuhan ti ka malu:
Tang sida ti mungkir leboh nadai kabuah, ka malu.
 - 3 Asoh aku nemu jalai nuan, Tuhan:
Ajar aku adat nuan.
 - 4 Iring aku, Tuhan, lalu bri ajar, laban Tuhan tau dikarap;
Laban Tuhan Petara ti ngelepas ka aku:
Tuhan ti endang di-adang aku berari.
 - 5 Ingat ka penyinu enggau pengasih nuan, Tuhan:
Laban ari mula iya nuan endang baka nya.
 - 6 Anang ingat ka penyalah aku leboh agi biak, anang ingat
ka penyai aku:
Enggau pengasih ingat ka aku,
Olih nuan endang badas, Tuhan.
 - 7 Tuhan endang badas, endang lurus:
Nya alai iya ngajar orang ti salah niteh ka jalai ti ngena.
 - 8 Iya nyaup orang ti baroh ati ngaga utai ti ngena:
Lalu ngajar sida niteh ka jalai iya.
 - 9 Nyadi jalai Tuhan, iya nya pemadas enggau pemendar:
Nya ti ditemu orang ti ngintu semaia enggau pesan iya.
 - 10 Tegal pengasih nuan, Tuhan:
Ampun penyalah aku, laban iya besai.

- 11 Samoa orang ti nangi ka Tuhan:
Sida nya di-ajar iya jalai ti diletak olih iya.
- 12 Ati orang nya lantang berari:
Anak uchu sida bempu menoa.
- 13 Sida ti nangi ka Tuhan nyadi pangan iya:
Lalu iya ka ngasoh sida nemu semaia iya.
- 14 Mata aku endang nunga Tuhan:
Laban iya ti ngelepas ka kaki aku ari jarin.
- 15 Malik song aku, lalu kasih ka aku:
Laban aku nadai pangan, aku marinsa.
- 16 Asoh lantang ati aku ti tusah:
Lepas ka aku ari pamarinsa aku.
- 17 Berunding ka pamarinsa enggau penusah aku:
Lalu ampun samoa penyalah aku.
- 18 Peda pemayoh munsoh aku:
Laban ati sida pedis bendar, sida ka nganu aku.
- 19 Intu samengat aku, lalu lepas ka aku:
Anang aku malu, laban aku bepanggih di Tuhan.
- 20 Asoh pemadas enggau penglurus nuan ngintu ati aku:
Laban aku bepanggih di Tuhan.
- 21 Tuhan Allah, lepas ka orang Israil:
Ari samoa penusah sida.

MASMUR 26

- ABAS ati aku, Tuhan, laban aku udah niteh ka jalai ti lurus:
Aku udah arap ka Tuhan enggau ati ti enda kakang.
- 2 Abas aku, Tuhan, lalu nentu ka aku:
Uji ati enggau runding aku.
 - 3 Laban pengasih Tuhan endang dikenang aku berari:
Nyadi aku udah niteh ka ajar Tuhan ti bendar.
 - 4 Aku nadai duduk beklakar enggau orang ti bejako ngapa:
Enggai aku mega begulai enggau orang ti bula.
 - 5 Aku begedi ati soh kaban orang ti jai:
Aku enggai duduk enggau orang ti salah.
 - 6 Aku ka nuchi diri baka orang ti masu jari:
Awak ka baka nya aku tau ngagai alta Tuhan.
 - 7 Awak ka aku tau mansut ka nyawa puji:
Lalu nusi kerja besai ti digaga Tuhan.
 - 8 Aku rindu ka rumah nuan, Tuhan:
Aku rindu ka endor ti alai mulia Tuhan diau.
 - 9 Anang muai samengat aku sabaka enggau orang ti salah:
Anang ngapus ka nyawa aku sabaka enggau orang
pemunoh.

- 10 Dalam ati sida bisi penyai:
Lalu jari kanan sida salalu nyambut suap.
- 11 Tang aku ka niteh ka jalai ti lurus:
Lepas ka aku, lalu kasih ka aku.
- 12 Kaki aku berdiri di endor ti entap:
Leboh orang mayoh begempuru, aku ka muji Tuhan.

5 HARI BULAN. SAMBIANG LEMAI

MASMUR 27

- TUHAN ti nerang ka aku, ti ngelepas ka aku; sapa ti ditakut ka aku:
Tuhan ti ngring ka nyawa aku; sapa ti tau nakut ka aku.
- 2 Leboh orang jai ngagai aku awak ka ngerusak ka tuboh aku:
Iya nya sida munsoh aku, enggau sida ti ngelaban aku, sida trap lalu rebah.
- 3 Taja bala orang ngelingi aku,
Ati aku enda ka takut:
Taja orang ngayau ngelaban aku,
Ati aku agi arap ka Tuhan.
- 4 Bisi utai siti ti dipinta aku soh Tuhan, ti digiga aku mega;
Tu meh iya, awak ka aku tau diau dalam rumah Tuhan sapemanjai umor aku:
Awak ka aku tau meda pemanah gamal Tuhan, lalu betanya dalam kaaba iya.
- 5 Nyadi iya ka ngelalai ka aku dalam rumah iya leboh aku tusah:
Iya ka ngelalai ka aku di endor aku enda tau ditemu orang,
Lalu ka ngangkat ka aku ka atas batu.
- 6 Nyadi iya ka ngasoh aku menang, lalu ngalah ka munsoh ti ngelingi aku:
Nya alai aku ka mri piring puji dalam rumah iya;
Aku ka nyanyi lalu muji Tuhan.
- 7 Dinga Tuhan, leboh aku ngangau enggau nyawa aku:
Kasih ka aku lalu saut aku.
- 8 Ko jako Tuhan, Uji kita meda moa aku:
Nyadi ko ati aku nyaut Tuhan, Moa Tuhan ti endang kran ka dipeda aku.
- 9 Anang melakang ka aku;
Anang ringat, anang muru anemiak nuan:
Tuhan ti udah nyaup aku;
Anang enggai ka aku, anang ninggal ka aku, Tuhan Allah,
Petara ti ngelepas ka aku.

- 10 Taja apai indai udah ninggal ka aku:
Tuhan ka ngibun aku.
- 11 Ajar aku jalai nuan, Tuhan.
Lalu iring aku nengah jalai ti rata:
Laban bisi orang ti ngipa aku.
- 12 Anang ngasoh aku diprintah munsoh aku:
Laban sida ti betenah ka aku, enggau sida ti ka nganu aku, udah angkat ngelaban aku.
- 13 Aku tentu mantul:
Enti aku enda arap ka diri meda pemadas Tuhan dalam dunya tu.
- 14 Arap ka Tuhan:
Kring ka diri, anang takut;
Anang enda arap ka Tuhan.

MASMUR 28

- AKU ngangau ka Tuhan;
Tuhan ti kubau-batu aku, anang enda ninga ka aku:
Enggai ka, enti Tuhan enda ninga ka aku,
Aku nyadi baka orang ti mati di pendam.
- 2 Dinga ka sambiang aku, leboh aku ngangau ka Tuhan:
Leboh aku ngunyor ka jari nuju ka endor ti kudus dalam kaaba Tuhan.
- 3 Anang nyagi aku kena tangkap enggau orang ti salah,
Enggau orang ti bekerja jai:
Ti bejako badas enggau pangan,
Tang ati sida jai dalam nyin.
- 4 Balas sida nunda ka kerja sida, nunda ka penyai ti digaga sida:
Ukum sida nunda ka kerja jari sida;
Balas sida baka ti patut.
- 5 Laban sida enda bepragam ka kerja Tuhan,
Enggau utai ti digaga iya:
Nya alai iya ka ngerebah ka sida, lalu enda ngangkat ka sida.
- 6 Puji ka Tuhan:
Laban iya udah ninga sambiang aku.
- 7 Tuhan ti pengring aku, ti trabai aku;
Ati aku udah arap ka iya, lalu aku disaup iya:
Nya alai ati aku gaga amai;
Lalu aku ka muji iya enggau pantun.
- 8 Tuhan ti pengring anemiak iya,
Nyadi iya ti pinglepas, ti ngring ka sida ti dipilih iya.

- 9 Idup ka anembiak nuan, lalu bri berkat ka pesaka nuan,
Tuhan:
Ibun sida mega, lalu intu sida belama-lama.

MASMUR 29

- Tusi brita Tuhan, kita malikat iya:
Tusi brita mulia enggau pengring Tuhan.
2 Tusi nama Tuhan ti besai:
Sembah Tuhan enggau prengka sambiang ti manah, ti
kudus.
3 Rauh ai, nya nyawa Tuhan:
Tuhan Allah ti bemulia ngasoh guntor bemunyi,
Tuhan ti mrintah ai ti besai.
4 Nyawa Tuhan bekuasa:
Nyawa Tuhan manah didinga.
5 Nyawa Tuhan mechah ka batang tapang:
Nyadi Tuhan mechah ka batang tapang di Libanun.
6 Iya ngasoh bukit nya merjok baka anak chapi:
Bukit Libanun enggau bukit Sirion merjok baka anak
badak.
7 Nyawa Tuhan mansut ka daun api;
Olih nyawa Tuhan menoa sunyi berenyang:
Nyadi Tuhan nguyat ka menoa sunyi di Kadis.
8 Nyawa Tuhan ngasoh rusa beranak,
Lalu ngerupak kayu kampong:
Nyadi dalam kaaba iya, samoa orang nyebut, Mulia ka
Tuhan.
9 Tuhan ti Rajah, leboh dunya ampo olih ai bah:
Tuhan ti Rajah, ti meruan belama-lama.
10 Tuhan ka ngring ka anembiak iya:
Tuhan ka merkat anembiak iya enggau selamat.

6 HARI BULAN. SAMBIANG PAGI

MASMUR 30

- AKU ka ngemesai ka Tuhan Allah, olih Tuhan udah
ngangkat ka aku:
Lalu enda nyagi munsoh aku andal leboh aku alah.
2 Tuhan Allah, ti Petara aku:
Aku ngangau ka Tuhan, lalu iya udah ngrai ka aku.
3 Tuhan udah mai samengat aku pulai ari sabayan:
Tuhan udah ngidup ka aku enggai ka aku begulai enggau
orang ti udah mati.
4 Nyanyi masmur ka Tuhan, kita ti anembiak iya:
Lalu bri puji, ngenang nama iya ti kudus.

- 5 Enda lama kitai kena anu iya;
Penelap iya meruan salama umor kitai:
Taja kitai nyabak malam,
Pagi hari kitai ka andal.
6 Leboh aku nyamai, ko aku:
Aku enda tau dibuai.
7 Tuhan Allah, olih pengasih nuan udah ngring ka pendiau
aku;
Leboh Tuhan bekalih, lalu enda malik song aku, aku lalu
takut bendar.
8 Aku ngangau ka nuan, Tuhan:
Aku besambiang ngagai Tuhan.
9 Nama untong olih pemat iya, leboh aku ka sabayan:
Kati, amau tanah tau muji Tuhan? kati amau tanah tau
nusi pemendar Tuhan?
10 Dinga, Tuhan, lalu kasih ka aku:
Anang enda nyaup aku, Tuhan.
11 Tuhan udah muai penusah aku, lalu ngasoh aku gaga:
Tuhan udah ngasoh aku badu ngulit, awak ka aku tau
andal.
12 Anang ati aku enda nyanyi muji Tuhan:
Aku ka muji Tuhan, ti Petara aku, salama umor aku.

MASMUR 31

- AKU bepanggai di Tuhan; anang aku malu:
Lepas ka aku, olih nuan endang lurus.
2 Tuhan, singit ka pending nuan, song aku; lalu jampat
lepas ka aku:
Idup ka aku, Tuhan, lalu nyadi kota enggau kubau ka aku.
3 Tuhan ti nyadi kota enggau kubau aku:
Nya alai anjong lalu iring aku, Tuhan, tegal nama nuan.
4 Tuhan ka ngelepas ka aku ari jarin ti ditan ka orang
nangkap aku:
Laban Tuhan ti ngring ka aku.
5 Aku mri samengat aku kadalam ibun Tuhan:
Laban Tuhan Allah, ti Petara bendar, udah nebus aku.
6 Aku begedi ati soh orang ti nyembah utai ti bula, ti ngapa:
Tang aku arap ka Tuhan.
7 Aku gaga lalu andal olih pengasih Tuhan:
Laban Tuhan udah meda pamarinsa aku;
Tuhan udah nemu penusah samengat aku.
8 Tuhan enda mri aku kadalam jari munsoh aku:
Tang Tuhan udah ngasoh aku bediri di endor ti lantang.

- 9 Kasih ka aku, Tuhan, laban aku tusah:
Mata aku nyau rabun laban penusah, serta samengat
enggau tuboh aku nyau rusak mega.
- 10 Nyawa aku nyau ka apus laban penusah, umor aku nyau
ka ambis olih sabak:
Pengring aku nyau nadai agi, olih penyalah aku;
Tulang aku nyau lemi amai.
- 11 Aku dipechat orang, olih munsoh aku ti mayoh,
Lebih agi aku dipechat pangan aku, nyadi sida ti ngelala
aku takut ka aku:
Nyadi sida ti betemu enggau aku di jalai lari ari aku;
- 12 Aku nyau enda di-ingat ka orang agi, baka orang ti lama
udah mati:
Aku baka priok ti pechah, ti dibuai.
- 13 Aku udah ninga orang mayoh betenah ka aku,
Kiba kanan bisi utai ti nakut ka aku:
Sida baum ngelaban aku,
Lalu nyempekat ka munoh aku.
- 14 Tang aku udah arap ka Tuhan:
Ko aku, Tuhan ti Petara aku.
- 15 Tuhan ti ngeletak umor aku:
Lepas ka aku ari jari munsoh aku, ari sida ti beduan aku.
- 16 Malik ngagai aku, Tuhan, lalu nerang ka anemiak nuan:
Idup ka aku olih pengasih nuan.
- 17 Anang aku malu, Tuhan, laban aku udah ngangau ka
nuan:
Asoh orang ti jai malu, awak ka sida diau, enda engkertik,
dalam sabayan.
- 18 Asoh bisu mulut ti bula:
Ti nyalah orang ti lurus enggau jako kras,
Enggau jako sumbong, jako ti mantah mega.
- 19 Nyampau pemesai pemadas Tuhan, ti endang ditaroh ka
sida ti nangi ka iya:
Ti digaga di moa mensia, tegal sida ti arap ka Tuhan.
- 20 Sida ka dilalai enggau Tuhan ari aum orang ti jai:
Tuhan ka ngelalai ka sida dalam rumah iya ari orang
mayoh ti bechakah.
- 21 Puji ka Tuhan:
Laban iya udah mandang ka aku pengasih iya ti besai
dalam nengri ti bekota.
- 22 Ko aku leboh takut, Tuhan nadai agi ngemata ka aku:
Taja baka nya, Tuhan ninga sambiang aku, leboh aku
ngangau ka Tuhan.

- 23 Rindu ka Tuhan samoa kita anemiak iya ti tuchi:
Laban Tuhan ngintu orang ti arap bendar,
Lalu malas orang ti sumbong.
- 24 Kring ka diri, anang ati kita enda tetap:
Samoa kita ti arap ka Tuhan.

6 HARI BULAN. SAMBIANG LEMAI

MASMUR 32

- BEBERKAT orang nya ti udah bulih pengampun penyalah
iya:
Lalu dosa iya mega udah dibuai.
- 2 Beberkat orang nya, enti Tuhan enda ngitong penyai iya:
Ti nadai bisi akal jai dalam ati iya.
- 3 Sakumbang aku enda bejako aku lemi tulang:
Olih aku nyabak besari-sari.
- 4 Laban jari Tuhan nganu aku siang malam:
Nyadi tuboh aku nyau pedis, baka ti olih panas kemarau.
- 5 Aku madah ka penyalah aku ngagai Tuhan, lalu nadai aku
ngelalai ka penyai diri:
Ko aku, Aku ka ngaku penyalah ngagai Tuhan;
Lalu Tuhan ngampun dosa aku ti besai.
- 6 Nya alai awak ka samoa orang ti nangi ka Tuhan besam-
biang leboh Tuhan nganti:
Nyadi leboh ampoh bah besai, tentu ai enda datai di orang
nya.
- 7 Tuhan nyadi endor aku tau belalai; Tuhan ka ngintu aku
ari penusah:
Tuhan ka ngelulong aku enggau panjong orang ti dilepas
ka iya.
- 8 Aku ka madah ka nuan, lalu ngajar nuan jalai patut
ditengah nuan:
Aku ka ngemata ka nuan, aku ka ngajar nuan.
- 9 Anang kita baka kuda, baka keldai ti nadai penemu:
Ti ditagang enggau besi, enggau tali di mulut iya,
Enti enda baka nya iya enggai datai ngagai kita.
- 10 Orang ti jai kena mayoh penusah:
Tang pengasih Tuhan ka ngintu orang ti arap ka iya.
- 11 Andal lalu gaga kita ti lurus, ti arap ka Tuhan:
Panjong lalu gaga samoa kita ti lurus ati.

MASMUR 33

GAGA, kita ti lurus ti arap ka Tuhan:
Kra, endang patut orang ti lurus mri puji ka iya.

- 2 Bri puji ka Tuhan enggau engkratong:
Nyanyi puji ka iya enggau engkrebap ti sapuloh tali.
- 3 Nyanyi ka iya pantun ti baru:
Inggar kita, lalu betaboh manah-manah.
- 4 Laban jako Tuhan endang lurus:
Nyadi samoa kerja iya digaga enggau bendar.
- 5 Tuhan rindu ka penglurus enggau letak ti ngena:
Dunia penoh olih pengasih Tuhan.
- 6 Olih jako Tuhan langit digaga:
Samoa isi iya digaga olih seput nyawa iya.
- 7 Iya nugong ka ai tasik baka munggu:
Iya naroh ai lubok baka padi ti ditaroh di pelaboh.
- 8 Awak ka samoa dunya takut ka Tuhan:
Awak ka samoa orang nangi ka iya.
- 9 Laban iya bejako lalu utai nyadi:
Iya ngeletak lalu utai meruan tetap.
- 10 Tuhan nyarut ka aum orang petang:
Iya ngasoh runding orang nadai tunga.
- 11 Ajar Tuhan meruan belama-lama:
Runding ati iya datai ka samoa serak orang.
- 12 Beberkat bansa sida ti bisi Tuhan Allah ka Petara sida:
Iya nya orang ti udah dipilih nyadi pesaka iya.
- 13 Tuhan nilik ari serga:
Iya meda samoa mensia.
- 14 Ari endor iya diau iya nilik:
Lalu meda samoa orang ti diau dalam dunya.
- 15 Iya ti ngator ati samoa sida:
Iya ti endang nemu samoa kerja sida.
- 16 Nadai rajah di dunya ti tau idup olih pemesai bala iya:
Nadai orang ti kring ti tau lepas olih pengring iya ti besai.
- 17 Kuda enda tau ngidup ka orang:
Iya enda tau ngelepas ka orang, taja pengring iya besai.
- 18 Tang Tuhan ngemata ka orang ti nangi ka iya:
Iya nya sida ti arap ka pengasih iya.
- 19 Awak ka ngelepas ka samengat sida ari pemat:
Lalu ngidup ka sida leboh lapar pungkang.
- 20 Samengat kitai nganti Tuhan:
Laban iya ti penyaup kitai, ti trabai kitai.
- 21 Ati kitai ka andal olih iya:
Laban kitai udah arap ka nama iya ti kudus.
- 22 Awak ka pengasih Tuhan datai di kami:
Olih kami udah arap ka Tuhan.

MASMUR 34

- Aku ka muji Tuhan berari-ari:
Mulut aku salalu ka muji iya.
- 2 Ati aku ka ngemesai ka diri olih arap ka Tuhan:
Orang ti baroh ati ka ninga nya lalu andal.
- 3 Aram kita enggau aku muji Tuhan:
Awak ka kitai sama serta ngemesai ka nama iya.
- 4 Aku ngosong Tuhan lalu iya ninga ka aku:
Lalu ngelepas ka aku ari samoa utai ti ngasoh aku takut.
- 5 Orang ti ngengkadah ka iya, ati sida trang:
Nyadi moa sida enda tau malu.
- 6 Orang ti tusah ngangau, lalu Tuhan ninga ka iya:
Lalu ngelepas ka iya ari samoa penusah iya.
- 7 Malikat Tuhan endang ngelingi orang ti nangi ka iya:
Lalu ngidup ka sida.
- 8 Uji kita ngasai ka pemadas Tuhan:
Beberkat orang nya ti arap ka iya.
- 9 Nangi ka Tuhan, kita ti tuchi:
Laban sida ti nangi ka iya nadai tau kurang.
- 10 Anak singa nadai umbas pemakai, lalu lapar:
Tang orang ti ngosong Tuhan, enda kurang utai ti badas.
- 11 Aram kita anembiak Tuhan, dinga ka aku:
Aku ka ngajar kita nangi ka Tuhan.
- 12 Sapa ti kran ka idup:
Sapa ti rindu ka umor panjai, awak ka meda utai ti badas?
- 13 Anang nuan bejako jai:
Anang mulut nuan bejako ngakal orang.
- 14 Lari ka utai jai, kerja utai ti badas:
Giga jalai selamat, lalu titeh ka iya.
- 15 Tuhan ngemata ka orang ti lurus:
Lalu iya mending ka kangau sida.
- 16 Tuhan ngelaban sida ti ngerja penyai:
Lalu nadai orang ti ka ingat ka sida di dunya.
- 17 Orang ti lurus ngangau, lalu Tuhan ninga:
Lalu ngelepas ka sida ari samoa penusah.
- 18 Tuhan semak orang ti tusah ati:
Lalu ngidup ka sida ti ngesal ati.
- 19 Orang ti lurus kena mayoh penusah:
Tang Tuhan ngelepas ka iya ari samoa.
- 20 Iya ngintu samoa tulang iya:
Siti pen enda patah.
- 21 Orang ti jai ka mati olih penyai iya:
Nyadi sida ti begedi soh orang ti lurus ka kena ukum.

- 22 Tuhan nebus samengat anembiak iya:
Nadai siko sida ti arap ka iya ti ka kena ukum.

7 HARI BULAN. SAMBIANG PAGI

MASMUR 35

- KRING ka aku, Tuhan, leboh aku bechara ngelaban sida ti nyalah aku:
Anang enda ngelaban sida ti ngelaban aku.
- 2 Ambi trabai enggau senyata:
Angkat, saup aku.
- 3 Sedia ka sangkoh lalu tan ka jalai, enggai ka munsoh ngagai aku:
Awak ka samengat aku nemu Tuhan endang pinglepas aku.
- 4 Asoh malu, asoh dipechat orang ti ka nganu samengat aku:
Asoh nikal, asoh malu sida ti bisi nusah ka aku.
- 5 Asoh sida baka ampa ti ditabar ka ribut:
Awak ka malikat Tuhan mambar ka sida.
- 6 Asoh jalai sida petang enggau lichin:
Awak ka malikat Tuhan ngagai sida.
- 7 Enggau nadai kabuah sida udah nan ka jarin ka nangkap aku:
Enggau nadai kabuah mega sida udah ngali lubang ka munoh aku.
- 8 Awak ka iya kena rusak ngenyit;
Awak ka iya kena sintak jarin iyaempu:
Awak ka iya laboh dia lalu kena rusak.
- 9 Nyadi samengat aku ka andal olih Tuhan:
Lalu gaga laban iya ngelepas ka aku.
- 10 Samoa tulang aku ka bejako, Sapa ti baka Tuhan,
Ti ngelepas ka orang ti tusah ari sida ti ngalah ka iya:
Lalu ngintu sida ti tusah, ti marinsa ari orang ti ka ngambi utai sida.
- 11 Saksi ti pedis ati bediri:
Lalu nanya aku pasal utai ti nadai temu aku.
- 12 Sida malas pemadas aku enggau penyai:
Lalu nusah ka samengat aku.
- 13 Tang leboh sida sakit, aku ngena kain kasar ka gari aku:
Alai aku bepasa, lalu nusah ka samengat aku:
Nyadi sambiang aku pulai mai berkat ka ati akuempu.
- 14 Olah aku enggau sida baka ti enggau pangan, tau ka menyadi:
Aku meremi lalu ngulit, baka orang ti nyabak ka indai iya.

- 15 Tang leboh aku tetrap sida gaga, lalu begempuru:
Barang orang ti jai, ti enda dikelala aku, begempuru;
Aku telih, laban sida enda badu nganu aku.
- 16 Sida baka orang ti beduan, ti busong leboh gawai:
Sida begrit ngeli ka nganu aku.
- 17 Penglama Tuhan agi nat ka utai nya:
Idup ka samengat aku ari sida ti ngerusak iya,
Enggau nyawa aku ari singa.
- 18 Aku ka ngenang Tuhan leboh orang mayoh begempuru:
Aku ka muji Tuhan di moa bala orang mayoh.
- 19 Anang nyagi munsoh aku andal leboh sida ngelaban aku enggau nadai kabuah:
Anang nyagi sida ti pedis ati soh aku enggau nadai kabuah nyeling ka mata sida.
- 20 Sida enda bejako pasal selamat:
Tang sida bepragam ka jako bula, ngelaban orang ti endang diau jenoh di menoa diri.
- 21 Balat jako sida mechat aku:
Ko sida, Mata kami udah meda utai ti digaga iya.
- 22 Tang Tuhan udah meda; anang enda ninga ka aku:
Anang jauh ari aku, Tuhan.
- 23 Angkat, Tuhan, ngrak ka diri, bechara ka aku:
Kring ka aku, Tuhan, ti Petara aku.
- 24 Bechara ka aku, Tuhan, ti Petara aku, olih nuan endang lurus:
Anang sida andal ngalah ka aku.
- 25 Anang sida berunding dalam ati, Pia meh ti ka deka kami:
Anang sida bejako, Kami udah ngalah ka iya.
- 26 Asoh malu, lalu alah ka, samoa sida ti andal meda aku tusah:
Asoh malu, asoh dipechat, sida ti ngemesai ka diri ngelaban aku.
- 27 Awak ka sida ti rindu meda aku menang gaga lalu manjong:
Awak ka sida bejako berari, Puji Tuhan,
Ti rindu ka anembiak iya bulih selamat.
- 28 Nyadi mulut aku ka nusi penglurus Tuhan:
Lalu ka muji Tuhan besari-sari.

MASMUR 36

- ATI orang ti jai salalu niteh ka samoa ajar ti jai:
Iya nadai agi nemu takut ka Allah Taala.
- 2 Iya ngakal ati diriempu:

- Dalam runding iya, penyalah iya enda tau ditemu, enda dipegedi ka orang.
- 3 Jako iya endang jai, endang bula:
Iya enggai belajar, lalu iya ngelengka ka kerja ti badas.
 - 4 Iya berunding ka penyai dalam iya gali tindok;
Iya niteh ka jalai ti salah:
Iya enda begedi ka utai ti jai.
 - 5 Pengrindu Tuhan nyintak ka serga:
Pengasih Tuhan nyintak ka langit.
 - 6 Penglurus Tuhan baka bukit, ti alai Allah Taala diau;
Runding Tuhan dalam, baka ai tasik ti dalam:
Tuhan ti ngidup ka mensia, ngidup ka jelu mega.
 - 7 Besai guna pengrindu nuan, Tuhan Allah:
Mensia ka belindong di sayap Tuhan.
 - 8 Sida lalu kenyang olih utai nyamai ti di rumah Tuhan:
Lalu Tuhan ka ngenyamai ka sida, baka ti enggau ai ti nyamai.
 - 9 Laban enggau Tuhan bisi pun pengidup:
Lalu olih penampak Tuhan kami ka meda trang.
 - 10 Anang enda mandang ka pengrindu nuan ngagai sida ti nemu nuan, Tuhan:
Anang enda mandang ka penglurus nuan ngagai sida ti bisi ati bendar.
 - 11 Anang ngasoh kaki orang ti sumbong ngindik aku:
Anang ngasoh jari orang ti jai muru aku.
 - 12 Nya alai sida ti bekerja jai ka laboh:
Sida udah di-empas lalu enda tau angkat.

7 HARI BULAN. SAMBIANG LEMAI

MASMUR 37

- ANANG ngeransi diri tegal orang ti jai:
Anang enda lantang meda penyadi orang ti ngerja penyai.
- 2 Laban enda lama alai sida nya lalu ditebas baka rumput:
Lalu layu baka daun kayu.
 - 3 Arap ka Tuhan, lalu ngerja utai ti badas:
Diau lantang di menoa diri.
 - 4 Baka nya nuan ka andal laban arap ka Tuhan:
Lalu iya ka mri ka nuan samoa utai ti ka deka nuan.
 - 5 Awak ka Tuhan ngator jalai nuan:
Arap ka iya mega, lalu iya ka ngasoh utai nyadi.
 - 6 Nyadi iya ka ngasoh penglurus nuan tampak dipeda orang,
baka tawas:

- Lalu runding ati nuan trang mega, baka penampak tengah hari.
- 7 Diau lantang, lalu nganti peneka Tuhan enggau ati liat:
Anang ngeransi diri laban orang bukai ti lantang pendiau,
Anang ngeransi diri laban kerja orang ti jai ti tau nyadi.
 - 8 Anang nganu orang, anang ringat:
Laban utai nya nuju ngagai penyai.
 - 9 Laban orang ti jai ka dibuai:
Tang sida ti nganti Tuhan ka bempu menoa.
 - 10 Enda lama da orang ti jai ka nyau nadai agi:
Amal, nuan ka ngiga endor iya enggau bendar, tang enda tetemu ka iya.
 - 11 Tang orang ti baroh ati ka bempu menoa:
Lalu ngandal ka diri pasal salamet ti ka untong sida.
 - 12 Orang ti jai baum ngelaban sida ti lurus:
Lalu begrit ngeli ka nganu iya.
 - 13 Tuhan katawa meda sida.
Laban iya nemu timpoh ukum sida datai.
 - 14 Orang ti jai udah nyintak pedang, lalu narik panah:
Awak ka ngerebah ka sida ti tusah, ti umang,
Lalu ka munoh sida ti diau lurus.
 - 15 Pedang sida ka ngachok ati sidaempu:
Panah sida ka patah.
 - 16 Badas agi utai mimit ti enggi orang ti lurus:
Ari mayoh pengraja ti enggi orang ti jai.
 - 17 Kuasa orang ti jai ka alah:
Tang Tuhan ka ngring ka orang ti lurus.
 - 18 Tuhan nemu timpoh orang ti badas:
Nyadi pesaka sida meruan belama-lama.
 - 19 Sida enda malu leboh bisi penusah:
Nyadi leboh lapar pungkang sida ka dikenyang ka.
 - 20 Tang orang ti jai ka nyau:
Lalu munsoh Tuhan ka nyadi baka rumput di padang;
Sida ka nyau; sida ka nyau nadai agi, baka asap.
 - 21 Orang ti jai nginjau, tang enda tebalas ka iya:
Tang orang ti lurus, iya nelap, lalu mri utai ka orang.
 - 22 Laban sida ti diberkat ka Allah Taala ka bempu menoa:
Tang sida ti kena anu iya ka dibuai.
 - 23 Tuhan ngator jalai orang:
Lalu iya rindu niteh ka jalai nya.
 - 24 Taja iya tetrap, iya tau angkat baru:
Laban Tuhan megai jari iya.
 - 25 Dulu kalia aku biak, nyadi diatu aku nyau tuai:

- Tang aku nadai kala meda orang ti lurus kena buai,
Tau ka anak uchu iya minta pemakai ari orang.
- 26 Iya endang nelap, lalu bejali ka orang:
Nyadi anak uchu iya bulih berkat.
- 27 Lengka ka utai jai, lalu ngerja utai ti badas:
Nyadi nuan ka idup belama-lama.
- 28 Laban Tuhan rindu ka utai ti ngena,
Lalu enda ninggal ka anembiak iya:
Sida di-intu belama-lama;
Tang anak uchu orang ti jai ka dibuai.
- 29 Orang ti lurus ka bempu menoa:
Lalu diau dia belama-lama.
- 30 Orang ti lurus nyebut utai ti bisi tunga:
Nyadi mulut iya nusi utai ti ngena.
- 31 Adat Allah Taala bisi dalam ati orang nya:
Kaki iya enda ka klinchir.
- 32 Orang ti jai ngemata ka orang ti lurus:
Lalu ngiga jalai ka munoh iya.
- 33 Tuhan enggai nyagi iya diprintah orang ti jai:
Enda mega iya nyagi iya kena ukum leboh bechara.
- 34 Arap ka Tuhan, lalu titeh ka jalai iya,
Lalu iya ka ninggi ka nuan, awak ka nuan bempu menoa:
Nyadi nuan ka meda orang ti jai dibuai Tuhan.
- 35 Aku udah meda orang ti jai megai kuasa besai:
Iya baka kayu ti galak, ti ditanam dalam tanah ti badas.
- 36 Tang leboh aku mansa, iya nadai agi:
Amai, aku ngiga iya, tang iya enda ditemu aku.
- 37 Peda orang ti badas, lalu ngemata ka iya ti lurus:
Laban orang ti nadai ngachau orang bukai bulih selamat.
- 38 Tang orang ti bepenyalah ka kena rusak magang:
Nyadi anak uchu orang ti jai ka kena buai.
- 39 Tang Tuhan ti ngidup ka orang ti lurus:
Iya baka kota ti tegoh ka sida, leboh penusah datai.
- 40 Nyadi Tuhan ti nyaup sida, ti ngelepas ka sida mega:
Iya ngelepas ka sida ari orang ti jai, lalu ngidup ka sida,
Laban sida udah belindung di iya.

8 HARI BULAN. SAMBIANG PAGI

MASMUR 38

ANANG ngerara aku, Tuhan, dalam nuan ringat:
Anang nganu aku dalam ati nuan agi ringat.

- 2 Laban laja Tuhan lekat di aku:
Nyadi jari Tuhan nganu aku.

- 3 Laban isi aku ambis sakit laban pengringat Tuhan:
Nyadi samoa tulang aku pedis laban penyalah aku.
- 4 Baka orang ti ampoh pala laban ai ti dalam, baka nya aku
laban penyai:
Penyai nya baka ma ti brat, ti enda ulih dima aku.
- 5 Telih aku bebau jai lalu burok:
Laban aku bli.
- 6 Aku pedis, aku bungkok bendar:
Besari-sari aku nyabak.
- 7 Punggong aku pedis amai:
Nyadi tuboh aku ambis sakit.
- 8 Aku lemi tulang, isi aku nyau maloi:
Aku udah nyabak laban ati aku tusah.
- 9 Tuhan nemu samoa peneka ati aku:
Nyadi demoh aku didinga Tuhan.
- 10 Ati aku ketap-ketap dalam nyin; pengring aku nyau nadai:
Mata aku enda lansik, laban nyau rabun bendar.
- 11 Orang ti rindu ka aku, enggau sida ti pangan aku, enggai
semak laban pemedis aku:
Suku juru aku berdiri jauh ari aku.
- 12 Orang ti ka munoh aku nan panjok ka aku:
Nyadi orang ti ka nganu aku betenah ka aku,
Lalu nyebut utai bula besari-sari.
- 13 Tang aku baka orang ti bengal, lalu enda ninga ka sida:
Nyadi aku baka orang ti bisu, ti enda bejako.
- 14 Amai, aku baka orang ti enda tau ninga ka utai:
Ti enda tau bejako ngerara orang.
- 15 Tang aku ngadang Tuhan:
Nuan ka nyaut aku, Tuhan, ti Petara aku.
- 16 Laban aku udah minta ari Tuhan, anang sida munsoh
andal ngelaban aku:
Leboh kaki aku teklinchir, sida ngemesai ka diri ngelaban
aku.
- 17 Laban aku nyau kajingka:
Pemedis aku meruan ninggang aku.
- 18 Nyadi aku ka madah ka penyai diri:
Aku ka ngesal ati ka penyalah aku.
- 19 Tang munsoh aku grai nyamai lalu kring:
Nyadi sida ti pedis ati soh aku enggau nadai kabuah nyau
mayoh.
- 20 Sida ti malas pemadas enggau penyai ka ngelaban aku:
Laban aku niteh ka utai ti badas.

- 21 Anang ninggal ka aku, Tuhan:
Anang jauh ari aku, Tuhan Allah, ti Petara aku.
- 22 Lengkas saup aku:
Tuhan Allah, ti pinglepas aku.

MASMUR 39

- Aku ka nyaga pendiau aku, ko aku dalam ati diri,
Enggai ka aku bejako salah:
Aku ka nutup mulut diri,
Leboh aku begulai enggau orang jai.
- 2 Aku enda bejako, aku diau, aku enda engkertik; utai badas
pen enda disebut aku:
Nyadi penusah aku nyau balat agi.
- 3 Ati aku ringat dalam nyin:
Nyadi leboh aku agi berunding, pengringat aku mau baka
api;
Udah nya baru aku bejako.
- 4 Asoh aku nemu umor aku, Tuhan,
Enggau pengluma iya mega:
Asoh aku nemu penglemi diri mega.
- 5 Pemanjai umor aku baka dua tiga tempap aja;
Umor aku baka ti nadai dirunding Tuhan:
Samoa mensia, taja iya lantang bendar, sigi utai ngapa.
- 6 Samoa mensia bejalai kia kia, iya baka kelemayang aja;
Lalu ati iya irau ngapa:
Iya nugong ka pengraja, nyadi iya enda nemu sapa ti ka
bempu iya.
- 7 Nyadi diatu, nama ti di-anti aku, Tuhan:
Aku nganti lalu ngadang Tuhan.
- 8 Lepas ka aku ari samoa penyalah aku:
Anang ngasoh aku malu olih orang ti budau.
- 9 Aku bisu lalu aku enda bejako;
Laban Tuhan ti ngator nya.
- 10 Buai pemedis aku:
Aku nyau rusak, olih pematat jari Tuhan ti nekan aku.
- 11 Leboh Tuhan bejako nganu orang ti bepenyalah,
Pemanah orang nya nyau, baka ti dipakai gegat:
Tentu samoa mensia sigi utai ngapa.
- 12 Dinga ka sambiang aku, Tuhan, pending ka kangau aku;
Anang enda nyaut leboh aku nyabak:
Laban aku baka orang temuai di moa Tuhan;
Aku baka orang ti bejalai, baka sida aki ini aku kalia.
- 13 Kasih ka aku, awak ka ati aku tau lantang:
Apin aku nyau ari dunya tu, lalu nadai agi.

MASMUR 40

- Aku ngadang, aku nganti Tuhan:
Lalu iya nyingit ka pending iya, lalu ninga ka kangau aku.
- 2 Iya matak aku ari lubang, ari tanah ti reboh:
Iya ngengkah ka kaki aku datas batu, lalu ngring ka
pejalai aku.
- 3 Iya ngajar aku nyanyi pantun baru, iya nya muji Petara
kitai:
Mayoh orang ti meda ka takut,
Lalu arap ka Tuhan.
- 4 Beberkat orang nya ti arap ka Tuhan:
Ti enda tesat ngagai orang ti sumbong, ngagai sida ti
mungkir, enggau sida ti bula.
- 5 Mayoh utai ti nyelai, ti digaga Tuhan, Petara aku,
Nyadi mayoh runding ti nyelai pasal kami:
Nadai utai ti tau dipebanding ka enggau Tuhan;
Enti aku ka bejako, lalu nusi utai nya,
Iya enda ulih ditesi.
- 6 Ginselan enggau piring enda dikarindu ka Tuhan;
Tang Tuhan udah ngaga pending aku lansik:
Piring ti ditunu enggau ginselan kena muai penyalah,
enda dipinta Tuhan.
- 7 Uдах nya ko aku, Peda aku tu udah datai:
Dalam surat bisi ditulis pasal aku;
- 8 Aku rindu niteh ka peneka Tuhan:
Amai, adat Tuhan bisi dalam ati aku.
- 9 Aku udah nusi rita ti badas, leboh orang mayoh begem-
puru:
Tuhan Allah nemu
Aku enggai enda bejako pasal nya.
- 10 Aku enda ngelalai ka penglurus Tuhan dalam ati aku;
Aku udah nusi penglurus enggau pinglepas Tuhan:
Aku enda ngelalai ka pengasih enggau pemendar Tuhan
ari orang mayoh.
- 11 Anang enda nelap enggau aku, Tuhan:
Awak ka pengasih enggau pemendar Tuhan ngintu aku
berari.
- 12 Mayoh penusah suah ninggang aku;
Penyalah aku udah melit aku, lalu aku enda tau meda utai:
Penyalah aku mayoh agi ari bok pala aku, nyadi aku nyau
temati ati.
- 13 Anang Tuhan enggai ngelepas ka aku:
Lengkas saup aku, Tuhan.

- 14 Asoh malu lalu alah ka samoa sida
Ti ka ngerusak samengat aku:
Asoh pulai, lalu alah ka samoa sida
Ti rindu nganu aku.
- 15 Asoh orang malu begulai enggau sida:
Sida ti beduan aku enggau jako.
- 16 Asoh andal, asoh gaga sida ti niteh ka Tuhan:
Awak ka sida ti rindu ka pengasih Tuhan bejako berari,
Puji ka Tuhan Allah.
- 17 Tang aku tu marinsa lalu tusah;
Tang Tuhan ka berunding ka aku:
Tuhan ti penyaup, ti pinglepas aku;
Anang betanggoh, Tuhan ti Petara aku.

8 HARI BULAN. SAMBIANG LEMAI

MASMUR 41

- BEBERKAT orang nya ti sinu ka orang ti tusah:
Laban Tuhan ka ngelepas ka iya leboh iyaempu tusah.
- 2 Tuhan ka ngintu iya lalu ngidup ka iya, lalu iya ka
lantang di menoa iya:
Lalu Tuhan enda nyagi munsoh iya mrintah iya.
- 3 Tuhan ka ngring ka iya leboh iya gali sakit:
Tuhan ti ka ngadu ka tilam iya leboh iya sakit.
- 4 Nyadi ko aku, Kasih ka aku, Tuhan:
Grai ka aku, Tuhan; laban aku udah bepenyalah ngelaban
Tuhan.
- 5 Munsoh aku bejako jai ngelaban aku, ko sida:
Kamaia alai iya mati, lalu nama iya enda di-ingat ka agi?
- 6 Nyadi leboh iya ngabas aku, iya bejako bula;
Ati iya bepragam ka utai ti jai:
Nyadi leboh iya pulai, iya nusi utai nya.
- 7 Samoa sida ti pedis ati soh aku betelai enggau diri sama
diri ngelaban aku:
Sida rindu meda penusah ti nganu aku.
- 8 Penyakit ti balat nganu iya, ko sida:
Iya gali sakit, lalu tentu iya enda agi angkat.
- 9 Nyadi iya ti endang pangan aku, ti dikarap ka aku, ti
makai enggau aku:
Iya udah nganu, udah numbit aku.
- 10 Tang, kasih ka aku, Tuhan, angkat ka aku:
Awak ka aku tau malas sida.
- 11 Tu alai aku nemu Tuhan rindu ka aku:
Olih munsoh aku enda menang ngelaban aku.

- 12 Nyadi Tuhan ti nentu ka pemadas pendiau aku:
Lalu ngasoh aku diau enggau Tuhan belama-lama.
- 13 Puji ka Tuhan Allah ti Petara sida Israil:
Ari mula iya kalia, datai ka belama-lama iya.
Amin, Amin.

MASMUR 42

- BAKA rusa tetengok ka ai sungai:
Baka nya samengat aku tetengok ka Tuhan Allah.
- 2 Samengat aku tetengok ka Allah Taala, Petara ti endang
meruan:
Kamaia aku tau meda moa Allah Taala?
- 3 Siang malam aku nyabak lalu enggai makai:
Nyadi orang bejako enggau aku besari-sari, ko sida, Dini
Allah Taala, ti Petara nuan?
- 4 Utai tu ti di-ingat ka aku leboh ati aku tusah:
Baka aku mansang enggau orang mayoh, lalu ngulu ka
sida ngagai rumah Allah Taala,
Enggau munyi gaga, enggau puji, leboh orang mayoh
ngintu hari besai.
- 5 Lapa ati aku brat?
Lapa ati aku tusah dalam nyin:
Arap ka Allah Taala; laban aku ka muji iya,
Olih iya ti penyaup aku.
- 6 Tuhan Allah, ati aku nyau kachau dalam nyin:
Nya alai aku ingat ka Tuhan di menoa Jordan,
Di bukit Hermon, di bukit Misar mega.
- 7 Ai sungai berauh betimbal-timbal pangan diri, laban ai
wong ti terjun:
Aku dilamun olih umbak enggau glumbang.
- 8 Siang hari Allah Taala ngintu aku olih pengasih iya,
Nyadi malam hari pantun iya endang di mulut aku:
Iya nya sambiang ngagai Petara ti ngidup ka aku.
- 9 Aku ka bejako enggau Allah Taala, ti kubau-batu aku,
Lapa Tuhan enda ingat ka aku:
Lapa aku nyabak laban munsoh ti ngachau aku?
- 10 Tulang aku asai dipatah leboh munsoh nganu aku:
Nyadi sida bejako besari-sari Dini Allah Taala ti Petara
nuan?
- 11 Lapa ati aku brat?
Lapa ati aku tusah dalam nyin:
Arap ka Allah Taala; laban aku ka muji iya.
Olih iya ti penyaup aku, ti Petara aku.

MASMUR 43

- PECHARA ka aku Tuhan Allah, lalu kring ka aku ngelaban
bansa sida ti nadai nemu pengasih:
Lepas ka aku ari orang ti ngakal, ti jai.
- 2 Laban Tuhan endang Petara ti ngring ka aku; lapa Tuhan
udah muai aku:
Lapa aku nyabak olih munsoh ti ngachau aku?
- 3 Asoh penampak enggau penglurus nuan ngulu ka aku:
Asoh iya nganjong aku ngagai bukit Tuhan ti kudus,
Ngagai rumah Tuhan.
- 4 Udah nya aku tau datai ngagai alta Allah Taala,
Ngagai Petara aku ti ngandal ka ati aku:
Nyadi enggau engratong aku ka muji Tuhan Allah, ti
Petara aku.
- 5 Lapa ati aku brat?
Lapa ati aku tusah dalam nyin:
Arap ka Allah Taala; laban aku ka muji iya,
Olih iya ti penyaup aku, ti Petara aku.

9 HARI BULAN. SAMBIANG PAGI

MASMUR 44

- TUHAN Allah, kami udah ninga enggau pending kami,
lalu aki ini kami udah madah ka kami:
Kerja ti digaga Tuhan maia sida dulu kalia.
- 2 Tuhan udah muru orang petang, lalu ngasoh aki ini kami
nganti sida:
Tuhan udah ngalah ka orang bansa bukai, lalu nambah ka
bansa kami.
- 3 Laban ukai enggau pedang diriempu sida bulih menoa,
Ukai kuasa sidaempu ti ngasoh sida menang:
Tang jari enggau kuasa enggau penampak moa Tuhan, ti
ngring ka sida,
Laban Tuhan rindu ka sida.
- 4 Kra, nuan endang Rajah aku, Tuhan Allah:
Lepas ka sida Jakob.
- 5 Olih kuasa Tuhan, kami ka ngalah ka munsoh kami:
Olih nama Tuhan, kami ka ngindik sida ti angkat ngelaban
kami.
- 6 Laban aku enda arap ka panah aku:
Ukai pedang ti ka ngidup ka aku.
- 7 Tang Tuhan ti ngelepas ka kami ari munsoh kami:
Lalu ngemalu ka sida ti pedis ati soh kami.

- 8 Kami ngenang Allah Taala besari-sari:
Lalu kami muji Tuhan belama-lama.
- 9 Tang diatu Tuhan udah muai kami, lalu ngemalu ka
kami:
Lalu enda mansang enggau bala kami.
- 10 Tuhan ngasoh kami lari ka munsoh kami:
Nyadi sida ti pedis ati soh kami ngerampas utai kami.
- 11 Tuhan udah ngasoh kami nyadi baka bedus ti dibunuh ka
di-empa:
Lalu udah mambar ka kami di menoa sida orang petang.
- 12 Tuhan udah nyual anembiak iya enggau nadai tunga:
Nyadi pengraja Tuhan nadai nambah olih nya.
- 13 Tuhan nyagi kami dipemalu ka pangan:
Lalu dipechat, lalu dikeduan sida ti diau semak kami.
- 14 Tuhan ngasoh kami nyadi jako enggau manding, disebut
olih bansa orang:
Nyadi orang bansa bukai katawa ka kami.
- 15 Pemalu aku endang meruan enggau aku besari-sari:
Pemalu aku endang meruan enggau aku baka gari ti
dikena aku berari.
- 16 Aku malu olih jako busong sida ti beduan aku:
Olih munsoh, olih sida mega ti ka malas ka diri.
- 17 Taja samoa utai nya udah datai di kami, ukai kami enda
ingat ka Tuhan:
Ukai kami bula ka semaia kami enggau Tuhan.
- 18 Ati kami enda mungkir:
Kaki kami enda limpang ari jalai Tuhan.
- 19 Kami enda mungkir, taja Tuhan medis ka kami di tengah-
tengah ukuoi kampung:
Lalu nutup kami dalam endor ti petang bendar.
- 20 Enti kami enda ingat ka nama Allah Taala:
Tau ka ngunjor ka jari ngagai petara bukai;
- 21 Dini alai Allah Taala enda ngabas nya:
Laban iya nemu pragam ti dilalai dalam ati mensia.
- 22 Nyadi tegal kami arap ka Tuhan, orang ka munoh kami
besari-sari:
Kami dirunding baka bedus ti ka disembelih.
- 23 Dani, Tuhan, lapa nuan tindok:
Angkat, anang muai kami belama-lama.
- 24 Lapa Tuhan ngelalai ka moa ari kami:
Lalu enda ingat ka penusah enggau pamarinsa kami.
- 25 Ati kami nyau runtoh:
Tuboh kami mega meruan gali di tanah.

- 26 Angkat, Tuhan, saup kami:
Lepas ka kami, olih Tuhan endang nelap.

MASMUR 45

- BISI mayoh rita ti badas dalam ati aku;
Aku nusi utai ti ditulis pasal rajah:
Mulut aku lanchar, baka orang ti pandai nulis.
- 2 Gambal nuan manah agi ari mensia;
Pengasih seruran bisi di mulut nuan:
Nya alai Allah Taala ka merkat ka nuan belama-lama.
- 3 Tangkin ka pedang di punggung nuan, kra nuan orang ti bekuasa:
Sambut mega mulia enggau basa nuan.
- 4 Mansang enggau kuasa, lalu menang,
Kring ka orang ti bendar ati, enggau sida ti baroh ati,
enggau sida ti lurus ati:
Nyadi enggau jari kanan, nuan ka ngaga kerja ti nyelai.
- 5 Laja nuan tajam;
Lalu orang alah olih nuan:
Laja nuan lekat di atau munsoh ti ngelaban rajah nuan.
- 6 Printah nuan, Tuhan Allah, meruan belama-lama:
Nuan mrintah menoa nuan enggau penglurus.
- 7 Nuan udah rindu ka penglurus, lalu begedi ka penyai:
Nya alai Allah Taala udah mri berkat ka nuan,
Amai berkat pengandal, lebih agi ari berkat ti dibri ka pangan nuan.
- 8 Samoa gari nuan bebau badas, olih mur, olih kayu garu,
olih kayu manis:
Ati nuan andal ninga munyi orang ti betaboh dalam rumah ti manah, ti digaga ari gading.
- 9 Sida anak rajah ti indu ka begulai enggau indu ti dalam rumah nuan:
Nyadi rani ti bengepan mas ari Opir, ka berdiri muak ka kanan nuan.
- 10 Dinga olih nuan ti anak rajah, berunding lalu mending ka aku:
Anang lelgau ka bansa diri enggau rumah apai nuan.
- 11 Nyadi rajah ka rindu ka pemanah gambal nuan:
Laban iya ti Tuhan nuan; anang nuan enda bebasa ka iya.
- 12 Nyadi sida indu ka datai ari Tur, lalu ka mri utai:
Lalu orang ti raja di menoa nya ka minta tulong nuan.

- 13 Anak rajah ti indu bekain manah bendar dalam rumah rajah:
Kain iya ditenun ari ubong mas.
- 14 Iya ka di-anjong ngagai rajah ngena kain sungkit:
Indu dara, ti pangan iya,
Ka dibai ngagai nuan.
- 15 Sida ka di-anjong enggau gaga enggau rami:
Sida ka tama rumah rajah.
- 16 Suku juru nuan nadai agi, tang nuan bisi anak:
Ti ka di-asoh nuan nyadi pengulu sablah dunya.
- 17 Aku ka ngasoh nama nuan dikenang olih samoa serak orang:
Nya alai samoa bansa mensia ka muji nuan belama-lama.

MASMUR 46

- ALLAH Taala ti ngintu kitai, ti ngring ka kitai:
Leboh penusah datai, iya nyata bendar nyaup kitai.
- 2 Nya alai kitai enda takut, taja dunya berubah:
Taja bukit kena taban ngagai tengah tasik.
- 3 Taja ai tasik berauh lalu beglumbang:
Taja bukit beguyat olih alun tasik.
- 4 Bisi sungai siti, lalu pati iya ngandal ka sida ti di nengri Allah Taala:
Iya nya endor ti kudus, ti alai Iya Ti Pemadu Tinggi diau.
- 5 Allah Taala diau dia, nya alai iya enda teguyat:
Allah Taala ka nyaup iya rerak tawas.
- 6 Orang bansa bukai begau, printah sida kachau:
Allah Taala bejako, nyadi dunya anchur.
- 7 Tuhan ti kapala bala serga bisi enggau kitai:
Allah Taala ti Petara Jakob nyadi kubau kitai ti tinggi.
- 8 Aram, meda kerja Tuhan:
Ti udah ngerusak menoa.
- 9 Iya ngemadu ka prang sablah dunya:
Iya matah ka panah, iya netak sangkoh,
Lalu nunu kreta prang enggau api.
- 10 Diau kita, temu olih kita aku tu ti Petara:
Aku ka megai printah atas samoa bansa mensia, aku ka megai printah atas dunya.
- 11 Tuhan ti kapala bala serga bisi enggau kitai:
Allah Taala ti Petara Jakob nyadi kubau kitai ti tinggi.

9 HARI BULAN. SAMBIANG LEMAI

MASMUR 47

- BETEMPAP jari, samoa kita bansa mensia:
Panjong ka Allah Taala, munyi nyawa orang ti menang.
- 2 Laban Tuhan ti pemadu tinggi patut dikenangi ka:
Iya Rajah besai ari atas samoa dunya.
 - 3 Iya ngasoh orang nunduk ka kitai:
Lalu ngator bansa orang bukai diprintah kitai.
 - 4 Iya milih pesaka ka kitai:
Iya nya tanah badas ti enggi sida Jakob, orang ti dikarindu ka Allah Taala.
 - 5 Allah Taala udah niki katas enggau panjong:
Tuhan kitai udah niki katas enggau munyi trumpit.
 - 6 Nyanyi puji ka Allah Taala, nyanyi puji:
Nyanyi puji ka Rajah kitai, nyanyi puji.
 - 7 Laban Allah Taala endang Rajah ari atas samoa dunya:
Nyanyi puji enggau masmur ti badas.
 - 8 Allah Taala mrintah samoa bansa mensia:
Allah Taala duduk di krusi iya ti kudus.
 - 9 Pengulu bansa mensia udah begempuru,
Sida ka nyadi anembiak Allah Taala, Petara Ibrahim:
Laban sida ti ngintu dunya, endang baka trabai Allah Taala,
Nyadi iya ti tinggi bendar.

MASMUR 48

- TUHAN endang besai, iya patut amai dipuji:
Dalam nengri Allah Taala, di bukit iya ti kudus.
- 2 Nyampau pemanah bukit Sion, laban iya tinggi, lalu iya ngandal ka samoa dunya:
Iya nya bukit ti pemadu iya dalam utara,
Iya nya nengri Rajah ti besai.
 - 3 Dalam rumah rajah, dia Allah Taala endang ditemu:
Iya kubau ti tinggi.
 - 4 Nyadi sida rajah begempuru:
Sida meraka ai, lalu mansang sama serta.
 - 5 Sida meda, lalu alit ati:
Sida takut bendar, lalu beguai pulai.
 - 6 Sida geta-getar:
Sida pedis baka indu ti radai ka beranak.
 - 7 Tuhan ngerusak ka kapal ari Tarsis:
Olih ribut ari timor.

- 8 Baka ti didinga kitai, baka nya mega dipeda kitai
Dalam nengri Tuhan ti kapala bala serga, dalam nengri
Petara kitai:
Allah Taala ka ngring ka kitai belama-lama.
- 9 Kami berunding ka pengasih nuan, Tuhan Allah:
Dalam kaaba Tuhan.
- 10 Baka nama nuan, Tuhan Allah, ditemu sablah dunya,
Baka nya mega orang muji Tuhan datai ka pemadu dunya:
Mayoh kerja ti lurus, ti digaga jari kanan Tuhan.
- 11 Awak ka bukit Sion andal,
Awak ka indu dara di menoa Judah gaga:
Olih letak Tuhan.
- 12 Bejalai sablah Sion, lalu ngelingi iya:
Tiap misgit iya.
- 13 Berunding ka kota iya,
Peda rumah rajah iya:
Awak ka kita tau madah ka serak orang ti ka datai.
- 14 Laban Allah Taala endang Petara kitai belama-lama:
Iya ngring ka kitai berari-ari.

MASMUR 49

- DINGA ka tu, samoa kita bansa mensia:
Pending ka iya, samoa kita ti diau di dunya.
- 2 Dinga olih kita ti baroh, enggau kita ti tinggi:
Dinga olih kita ti raja, sama enggau kita ti umang.
 - 3 Mulut aku ka nusi penemu:
Nyadi ati aku ka berunding ka reti utai.
 - 4 Aku ka mending ka jako empama:
Aku ka nusi jako ti dalam, enggau munyi engkratong.
 - 5 Nama kabuah aku takut meda orang jai menang:
Tau ka meda penyai orang ti ka nganu aku melit aku?
 - 6 Berunding ka sida ti arap ka pengraja:
Lalu ngemesai ka diri olih pemayoh utai sida.
 - 7 Nadai siko sida ti tau nebus pangan iya:
Tau ka mri duit ka Allah Taala, enggau nimbang iya.
 - 8 Laban endang enda ulih timbang samengat iya:
Nya alai sigi enda ulih skali-kali.
 - 9 Baka nya enda ulih timbang, awak ka samengat iya idup
belama-lama:
Awak ka iya enda tau mati.
 - 10 Laban iya meda orang ti bepenemu enda tau enda mati,
Orang ti bli, enggau orang ti jai, sama kena rusak:
Lalu orang bukai bempu mudal sida.

- 11 Ko runding ati sida, rumah sida ka meruan belama-lama,
Lalu alai sida diau ka meruan ka pengambis serak orang:
Nyadi pikir sida, tanah sida ka nyadi pengingat ka nama
sida belama-lama.
- 12 Tang mensia enda dipebasa berari:
Iya endang baka jelu ti enda tau enda mati.
- 13 Tu pejalai sida ti arap ka diriempu aja:
Enggau pejalai orang ti niteh ka sida, lalu muji jako sida.
- 14 Sida dibai ka sabayan, baka bedus ti dibai ka dibunoh,
Nyadi pematika baka pengibun sida:
Orang ti lurus ka mrintah sida dudi hari;
Pemanah gambal sida ambis nyau dalam sabayan, lalu
nadai ditemu agi.
- 15 Tang Allah Taala ka nebus samengat aku ari kuasa
sabayan:
Laban iya ka ngambi aku ngagai iyaempu.
- 16 Anang takut leboh orang nyadi raja:
Leboh pengraja rumah iya nambah-menambah.
- 17 Laban leboh iya ka mati, iya enda tau mai utai enggau iya:
Nyadi pengraja iya enda tau niteh ka iya.
- 18 Baka iya ngumbai diri lantang, leboh iya agi idup:
Pia mega orang ka muji nuan, enti nuan ngelantang ka
pendiau diri.
- 19 Taja baka nya, iya ka bejalai ngagai sida aki ini iya kalia:
Ti enda agi meda penampak dunya tu.
- 20 Nyadi mensia, taja iya dipebasa ka, iya enda tau mereti
samoa utai:
Tang iya sabaka enggau jelu, ti endang diletak mati.

10 HARI BULAN. SAMBIANG PAGI

MASMUR 50

- PETARA, iya nya Tuhan Allah udah bejako:
Iya udah ngangau ka dunya, ari puak ka matahari tumbuh,
datai ka puak ka iya padam.
- 2 Mulia Allah Taala tampak bendar:
Dalam Sion ti pepadu manah.
 - 3 Awak ka Petara kitai datai, anang iya diau diri:
Bisi api ti mau di moa iya,
Lalu biobalai besai bisi ngelingi iya.
 - 4 Iya ka ngangau ka langit ti datas:
Lalu ka dunya, ngambi ka iya tau bechara ka anembiak
iya.
 - 5 Gumpuru ngagai aku samoa sida ti dikarindu ka aku:

- Sida ti besemaia enggau aku, lalu miring ka aku.
- 6 Langit ka mandang penglurus iya:
Allah Taala iyaempu ka nyadi hakim.
 - 7 Dinga kita anembiak aku, lalu aku ka bejako,
Dinga kita orang Israil, lalu aku ka ngajar kita:
Aku tu Allah Taala, Petara kita.
 - 8 Ukai aku ka ringat pasal piring kita:
Pasal piring ti ditunu kita berari.
 - 9 Aku nadai beguna ka krebau ti enggi kita:
Tau ka ka kambin ti dalam kandang kita.
 - 10 Laban samoa jelu kampong endang enggi aku:
Enggau jelu ti ditupi datas bukit beribu-ribu.
 - 11 Aku nemu samoa burong ti di bukit:
Nyadi utai ti bejalai sablah padang endang ditemu aku.
 - 12 Enti sema aku lapar, enda iboh aku madah ka nuan:
Laban dunya enggau samoa pemisi iya endang enggi aku.
 - 13 Kati, pikir kita aku ka makai isi chapi:
Tau ka ngirup darah kambin?
 - 14 Bri puji ka Allah Taala, ka piring nuan:
Lalu ngamai ka semaia nuan enggau Allah Taala, ti
pepadu tinggi.
 - 15 Lalu kangau ka aku leboh bisi penusah:
Nyadi aku ka ngelepas ka nuan, lalu nuan ka muji aku.
 - 16 Tang Allah Taala bejako enggau orang ti jai, ko iya:
Kati ko nuan tau nusi adat aku,
Lalu enggau mulut udah besemaia enggau aku?
 - 17 Laban ati nuan enggai ka ajar:
Lalu nuan muai jako aku.
 - 18 Leboh nuan meda orang penchuri, nuan rindu begulai
enggau iya:
Lalu nuan saum enggau sida ti butang.
 - 19 Nuan enda nagang mulut nuan bejako jai:
Lalu mulut nuan mansut ka utai bula.
 - 20 Leboh nuan duduk, nuan bejako ngelaban menyadi nuan:
Lalu nuan betenah ka iya ti sama anak indai nuanempu.
 - 21 Leboh nuan ngaga utai nya, aku diau, enda bemunyi;
Nyadi runding nuan, aku endang sabaka enggau nuan:
Tang aku ka ngerara nuan, lalu nerang ka samoa utai nya
di moa nuan.
 - 22 Bepragam ka samoa utai nya, kita ti enda nangi ka Allah
Taala:
Enggai ka aku nganu kita, lalu nadai orang ti ka ngidup ka
kita.

- 23 Orang ti mri puji ka piring, iya ti bebasa ka aku:
Nyadi aku ka mandang ka penglepas Petara
Ngagai iya ti ngator pendiau iya betuku.

MASMUR 51

- KASIH ka aku, Tuhan Allah, nunda ka pengasih nuan:
Nunda ka pemesai penyinu nuan, buai penyalah aku.
- 2 Tuchi aku bendar ari penyai aku:
Lalu kendas samoa penyalah aku.
 - 3 Laban aku nemu penyalah diri:
Nyadi dosa aku mengkang di moa aku berari.
 - 4 Aku udah salah ngelaban Tuhan aja,
Lalu udah ngaga penyai ti dipeda Tuhan:
Awak ka Tuhan ditemu lurus, leboh iya ngukum orang,
Lalu betul leboh megai pechara.
 - 5 Nyadi aku endang jai leboh ada:
Amאי aku bisi penyalah, leboh agi dalam kandong indai aku.
 - 6 Tuhan rindu ka ati bendar dalam nyin:
Lalu Tuhan ka mri ka aku penemu dalam ati aku.
 - 7 Tuchi aku enggau daun isop, lalu aku ka tuchi:
Basu aku, lalu aku ka nyadi burak agi ari selju.
 - 8 Asoh aku ninga munyi pengaga enggau pengandal:
Awak ka tulang ti dipatah ka Tuhan tau nyamai.
 - 9 Kalih ka moa, Tuhan, anang meda penyalah aku:
Lalu buai samoa penyai aku.
 - 10 Gaga ka aku ati tuchi, Tuhan Allah:
Gaga baru dalam aku ati ti tetap.
 - 11 Anang muru aku ari Tuhan:
Anang ngambi Roh Alkudus ari aku.
 - 12 Asoh aku andal baru, olih kerja Tuhan ti ngelepas ka aku:
Lalu kring ka aku enggau ati ti deka ngerja utai badas.
 - 13 Udah nya aku ka ngajar orang bedosa pasal jalai Tuhan:
Lalu orang ti bepenyalah ka pulai ngagai Tuhan.
 - 14 Lepas ka aku ari penyalah ti kena ukum dibunoh, Tuhan
Allah, Petara ti penglepas aku:
Lalu mulut aku ka nyanyi, muji penglurus Tuhan.
 - 15 Buka mulut aku, Tuhan:
Lalu aku ka mandang ka puji Tuhan.
 - 16 Laban Tuhan enda rindu ka piring ti ka dibri aku ka
Tuhan:
Tuhan enggai nyambut piring ti ditunu.
 - 17 Piring ti dikarindu ka Tuhan Allah, nya ati ti runtoh:
Ati ti tusah, ti ngesal, enda dipechat ka Tuhan Allah.

- 18 Awak ka Tuhan ngaga pemadas ka nengri Sion:
Lalu niri ka kota Jerusalem, laban Tuhan endang nelap.
- 19 Udah nya Tuhan ka rindu ka piring, ti dibri enggau ati
lurus, iya nya piring ti ditunu, enggau piring ti ditunu
segala:
Udah nya orang ka nunu anak chapi ka piring datas alta
Tuhan.

MASMUR 52

- LAPA nuan ngemesai ka diri laban penyai diri, nuan orang
ti besai:
Pengasih Allah Taala meruan belama-lama.
- 2 Ati nuan berunding ka utai ti jai bendar:
Nuan baka lungga ti tajam, laban nuan nganu orang
enggau akal.
 - 3 Nuan rindu ka penyai, ukai ka pemadas:
Nuan rindu bejako bula, ukai bejako ti lurus.
 - 4 Nuan rindu ka samoa jako ti nganu:
Nuan ti pemula.
 - 5 Baka nya mega Allah Taala ka nganu nuan belama-lama:
Iya ka ngambi nuan, lalu muru nuan ari rumah,
Lalu ka muai nuan ari menoa orang ti idup.
 - 6 Orang ti lurus ka meda utai nya, lalu ka nangi ka Allah
Taala:
Iya ka katawa ka orang nya, ko iya,
 - 7 Tu orang ti enda arap ka Allah Taala ka kota iya:
Tang iya arap ka pemesai pengraja iya,
Lalu ngring ka diri ngaga penyai.
 - 8 Tang aku baka kayu ti bebuah, ti galak, di endor Allah
Taala:
Aku arap ka pengasih Allah Taala belama-lama.
 - 9 Aku ka muji Tuhan belama-lama, olih iya udah ngaga
utai nya:
Aku ka nusi nama Tuhan ti badas di moa anemiak
Tuhan.

10 HARI BULAN. SAMBIANG LEMAI

MASMUR 53

- ORANG ti budau udah bejako dalam ati diri, ko
sida, Endang nadai bisi petara:
Sida udah ngaga penyai ti dipegedi ka Allah Taala;
Nadai siko sida ti ngaga pemadas.

- 2 Allah Taala nilik mensia ari serga:
Awak ka meda enti bisi orang ti mereti,
Enti bisi ti ngiga Allah Taala.
- 3 Samoa sida udah mungkir; sida udah bebali jai:
Siko pen nadai ti ngaga pemadas.
- 4 Kati, orang ti ngaga penyai nadai bepenemu:
Sida ka ngulam anembiak aku, baka orang ti makai roti,
Lalu enda besambiang ka Allah Taala.
- 5 Leboh nya sida takut bendar enggau nadai kabuah:
Laban Allah Taala udah mambar ka tulang munsoh ti
ngelulong nuan;
Nuan udah ngemalu ka sida, laban Allah Taala enggai ka
sida.
- 6 Awak ka penglepas sida Israil datai ari Sion:
Leboh Allah Taala mai pulai anembiak iya,
Awak ka sida Jakob andal enggau sida Israil gaga.

MASMUR 54

- IDUP ka aku, Tuhan Allah, olih nuan endang kasih:
Lalu bechara ka aku, olih nuan endang bekuasa.
- 2 Dinga ka sambiang aku, Tuhan Allah:
Pending ka jako ti ditelah aku.
 - 3 Laban orang bansa bukai udah angkat ngelaban aku:
Nyadi orang ti mangah ka ngiga jalai munoh aku;
Sida nadai berunding ka Allah Taala.
 - 4 Tang Allah Taala ti nyaup aku:
Tuhan ti ngring ka samengat aku.
 - 5 Iya ka malas sida ti ngipa aku enggau penusah:
Rusak ka sida, olih penglurus jako, Tuhan.
 - 6 Enggau ati ti rindu, aku ka miring ka Tuhan:
Aku ka muji nama Tuhan, olih iya badas.
 - 7 Laban iya udah ngelepas ka aku ari samoa pamarinsa:
Nyadi mata aku udah meda pengrusak munsoh aku.

MASMUR 55

- DINGA ka sambiang aku, Tuhan Allah:
Anang ngelalai ka diri, leboh aku minta tulong.
- 2 Dinga ka aku, lalu saut aku:
Aku enda tau diau jenoh olih penusah, nyadi ati aku
kachau.
 - 3 Ati aku kachau, olih jako munsoh,
Olih orang jai ti ngalah ka aku:

- Laban sida nambah ka penyai aku,
Nyadi laban sida ringat, sida nganu aku.
- 4 Ati aku tusah bendar dalam nyin:
Nyadi aku baka orang ti takut ka diri mati.
 - 5 Aku takut lalu geta-getar:
Nyadi ati aku nyau nadai agi olih takut.
 - 6 Nyadi ko aku, Badas enti aku bisi sayap baka puna:
Enti baka nya aku ka terbai jauh, lalu diau enggau
lantang.
 - 7 Enti baka nya aku ka belelang ngagai menoa jauh,
Lalu diau di menoa puang.
 - 8 Aku ka beguai lari.
Lalu belalai ari biobalai, ari ribut ti balat.
 - 9 Tuhan, asoh jako sida beblit, lalu enda sa-munyi:
Laban aku udah meda orang ti mangah, enggau orang ti
ka belaban dalam nengri.
 - 10 Siang malam sida ngelingi iya datas kota:
Penyai enggau pengachau bisi dalam nyin.
 - 11 Pengrusak bisi di tengah iya:
Pemula enggau pengakal endang bisi di pasar iya.
 - 12 Laban ukai munsoh ti nganu aku;
Kra, enti baka nya, ulih aku nat ka iya:
Ukai mega orang ti begedi ati soh aku, ti ngemesai ka diri
ngelaban aku;
Kra, enti baka nya, aku ka ngelalai ka diri.
 - 13 Tang nuan, orang ti sabaka enggau aku:
Ti endang pangan aku, ti begulai enggau aku
 - 14 Tua suah berandau, lalu begulai nyamai:
Tua sama bejalai dalam rumah Allah Taala, enggau orang
mayoh.
 - 15 Awak ka sida ngenyit mati,
Awak ka sida nurun ka sabayan agi idup:
Laban penyai bisi di rumah sida, enggau dalam ati sida
mega.
 - 16 Tang aku ka ngangau ka Allah Taala:
Lalu Tuhan ka ngidup ka aku.
 - 17 Siang, petang, enggau tengah hari mega, aku besambiang,
lalu demoh:
Nyadi iya ka ninga ka aku.
 - 18 Iya udah nebus samengat aku, lalu udah mri selamat,
leboh aku nyau ka alah:
Laban sida ti ngelaban aku, mayoh bendar.

- 19 Allah Taala ka ninga sida, lalu nganu sida,
Laban iya ti endang meruan megai printah:
Iya ka nganu sida ti endang lantang,
Lalu enda takut ka Allah Taala.
- 20 Sida udah ngunjor ka jari ka nganu orang ti endang
bebaik enggau sida:
Sida udah mungkir ari semaia sida.
- 21 Mulut iya lemak, baka minyak chapi,
Tang ati iya ka ngelaban:
Taja jako iya manis,
Sida nganu baka pedang ti disintak.
- 22 Bai ngagai Tuhan utai ti ngemerat ka ati nuan, lalu iya ka
nyangga nuan:
Iya enda ngasoh orang lurus kena kachau belama-lama.
- 23 Tang nuan, Tuhan Allah, ka muai sida kadalam lubang ti
alai orang kena rusak:
Orang pemunoh enggau orang pengakal enda tau idup
datai ka sa-tengah umor sida;
Tang aku ka arap ka Tuhan.

11 HARI BULAN. SAMBIANG PAGI

MASMUR 56

- KASIH ka aku, Tuhan Allah; laban orang ka ngindik aku:
Besari-sari iya ngelaban aku lalu ngachau aku.
- 2 Sida ti ngipa aku ka ngindik aku besari-sari:
Laban mayoh orang sumbong ti ngelaban aku.
- 3 Leboh aku takut:
Aku ka arap ka Tuhan.
- 4 Olih saup Allah Taala, aku ka muji jako iya;
Aku enda takut laban aku arap ka Allah Taala:
Kati ko mensia tau nganu aku?
- 5 Besari-sari sida betenah ka aku:
Samoa pragam sida jai ngelaban aku.
- 6 Sida begempuru, lalu ngipa aku:
Sida nyidi bekau kaki aku,
Laban sida endang ka munoh aku.
- 7 Dini sida tau lepas olih penyai sida:
Anang enda ringat soh sida, anang enda ngemaroh ka sida,
Tuhan.
- 8 Tuhan nemu aku udah lari ari sida:
Taroh ai mata aku dalam balang Tuhan;
Ukai enda utai nya ditulis dalam surat Tuhan?

- 9 Uдах nya munsoh aku ka nikal pulai, leboh aku besam-
biang:
Tang aku nemu Allah Taala bisi enggau aku.
- 10 Olih saup Allah Taala aku ka muji jako iya:
Olih saup Tuhan aku ka muji jako iya.
- 11 Aku enda takut laban aku arap ka Allah Taala:
Kati ko mensia tau nganu aku?
- 12 Aku brat ka semaia aku enggau Tuhan Allah:
Aku mri piring kena muji Tuhan.
- 13 Laban Tuhan udah ngelepas ka samengat aku ari pemat, i,
Lalu ngintu kaki aku di endor aku tetrap:
Awak ka aku tau bejalai di moa Allah Taala,
Lalu diau dalam penampak enggau orang ti idup belama-
lama.

MASMUR 57

- KASIH ka aku Tuhan Allah, kasih ka aku,
Laban samengat aku bepanggih di Tuhan:
Kra, aku belalai dalam lindong sayap Tuhan,
Nganti penusah tu udah badu.
- 2 Aku ka ngangau ka Allah Taala ti pemadu tinggi:
Iya nya Petara ti ngator samoa utai ka aku.
- 3 Iya ka ngirum pesan ari serga, lalu ngidup ka aku,
Leboh orang ti ka ngindik aku ka nganu aku:
Allah Taala ka mandang ka pengasih enggau pemendar
iya.
- 4 Samengat aku dikelingi olih jelu singa;
Aku tindok di tengah munsoh ti mangah:
Iya nya orang ti bisi sangkoh enggau laja ka ngeli sida,
Enggau pedang ti tajam ka dilah sida.
- 5 Angkat ka diri, Tuhan Allah, ari atas langit:
Awak ka mulia Tuhan dipeda samoa isi dunya.
- 6 Sida udah nan jarin ka kaki aku;
Sida udah nusah ka samengat aku:
Sida udah numbak ka lubang di moa aku;
Nyadi sidaempu laboh kadalam iya.
- 7 Aku udah nentu ka ati aku, Tuhan Allah, aku udah nentu
ka ati aku:
Aku ka nyanyi lalu muji Tuhan.
- 8 Dani, angkat, samengat aku:
Taboh engkrebap enggau engkratong:
Akuempu ka dani enda betanggoh.

- 9 Aku ka muji Tuhan serta enggau orang mayoh:
 Aku ka nyanyi lalu muji Tuhan serta enggau orang bansa
 bukai.
- 10 Laban pengasih Tuhan besai, lalu nyintok ka langit:
 Lalu pemendar Tuhan nyintok ka remang.
- 11 Angkat ka diri, Tuhan Allah, ari atas langit:
 Awak ka mulia Tuhan dipeda samoa isi dunya.

MASMUR 58

- KATI, amai kita bendar ngeletak ukum ti lurus, kita orang
 ti besai:
 Kati, kita bechara ka orang enggau lurus?
- 2 Ukai baka nya; ati kita sigi ka ngerja penyai:
 Lalu jari kita ngaga penyai sablah menoa.
- 3 Orang ti jai tesat kenyau ari sida dikandong ka indai sida:
 Serta sida ada sida limpang, lalu bejako bula.
- 4 Ati sida bisa baka ular ti bisa:
 Sida baka ular ti bengal, ti enggai ninga.
- 5 Ti enggai ninga ka nyawa orang ti nimang:
 Taja iya pandai bendar nimang.
- 6 Tanggal ka ngeli sida, Tuhan Allah, dalam mulut sida:
 Ruyak ka ngeli gam sida anak singa, Tuhan.
- 7 Awak ka sida ambis, baka ai dras ti nyau:
 Leboh sida nimbak laja, awak ka laja nya patah.
- 8 Awak ka sida nyadi baka sintong ti ambis mati:
 Baka anak ti ada apin datai timpoh iya, lalu enda meda
 tawas.
- 9 Apin priok kita angkat olih api duri ti ditunu dibaroh:
 Iya ka ngasoh ribut mambar ka duri, iya ti apin kena api,
 enggau iya ti udah mau sama serta.
- 10 Orang ti lurus ka andal, leboh iya meda sida kena ukum:
 Kaki iya ka ngindik darah orang ti jai.
- 11 Lalu orang ka bejako munyi tu, Amai orang ti lurus bisi
 upah:
 Tentu bisi Petara, ti bechara dalam dunya.

11 HARI BULAN. SAMBIANG LEMAI

MASMUR 59

- IDUP ka aku ari munsoh aku, Tuhan Allah, ti Petara aku:
 Angkat ka aku ari atas sida ti ka ngelaban aku.
- 2 Lepas ka aku ari sida ti ngaga penyai:
 Lalu idup ka aku mega ari orang pemunoh.

- 3 Laban sida ngipa samengat aku;
 Sida ti kring begempuru ngelaban aku:
 Ukai laban aku bepenyalah tau ka bedosa, Tuhan.
- 4 Taja aku nadai penyalah, sida belawa, lalu nyikap diri:
 Angkat Tuhan, abas lalu saup aku.
- 5 Angkat ka diri, Tuhan, ti kapala bala serga, ti Petara sida
 Israil;
 Angkat lalu abas samoa sida orang petang:
 Anang kasih ka orang ti ngaga penyai.
- 6 Lemai hari sida pulai, sida baka ukuoi ti nyalak:
 Sida bejalai sablah nengri.
- 7 Nyadi jako mayoh macham pansut ari mulut sida:
 Dilah sida tajam baka pedang:
 Ko sida, Sapa ti ka ninga kitai?
- 8 Tang nuan Tuhan, ka katawa meda sida:
 Tuhan ka emplita enggau samoa orang petang.
- 9 Aku ka nganti Tuhan ti ngring ka aku:
 Laban Petara baka kota ti tinggi.
- 10 Allah Taala ti kasih ka aku, ka ngambat aku:
 Allah Taala ka ngasoh aku meda utai ti ka deka aku pasal
 sida munsoh aku.
- 11 Anang munoh sida enggai ka anembiak aku enda ingat:
 Pambar ka sida lalu alah ka sida,
 Tuhan ti trabai kami.
- 12 Awak ka sida ti sumbong kena tangkap:
 Laban penyalah jako sida ti pansut ari mulut sida,
 Laban jako sumpah enggau jako bula ti ditelah sida mega.
- 13 Enggau pengringat ambis ka sida, Tuhan, ambis ka sida,
 awak ka sida nadai agi:
 Awak ka orang nemu Petara mrintah sida Jakob,
 Enggau samoa mensia, datai ka samoa telok dunya.
- 14 Nyadi lemai hari, sida pulai, sida baka ukuoi ti nyalak:
 Lalu bejalai sablah nengri.
- 15 Awak ka sida bejalai kia kia ngiga pemakai:
 Lalu meruan dia samalam-malam, enti sida enda kenyang.
- 16 Taja baka nya, aku ka nyanyi pasal pengring Tuhan,
 Aku ka muji pengasih Tuhan pagi-pagi:
 Laban Tuhan baka kota ti tinggi ka aku,
 Baka endor aku belalai leboh aku tusah.
- 17 Aku ka nyanyi lalu muji Tuhan ti pengring aku:
 Laban Tuhan Allah nyadi kota tinggi ka aku, iya endang
 Petara ti kasih ka aku.

MASMUR 60

- TUHAN Allah udah muai kami, Tuhan udah ngalah ka kami:
 Tuhan udah ringat; anang enda mai kami pulai baru.
- 2 Tuhan udah ngasoh tanah berenyang; Tuhan udah mechah ka iya:
 Alit ka rekah iya, laban iya beguyat.
- 3 Tuhan udah mandang ka anembiak iya utai ti ngasoh tusah:
 Tuhan udah mri kami ngirup ai anggor ti ngasoh mabok.
- 4 Tuhan udah mri menira ka sida ti nangi ka Tuhan:
 Awak ka iya digantong mandang ka utai ti bendar.
- 5 Lepas ka sida ti dikarindu ka Tuhan:
 Asoh kami menang, Tuhan, enggau jari kanan nuan, lalu dinga ka kami.
- 6 Allah Taala udah bejako, olih iya kudus; Aku ka andal:
 Aku ka magi nengri Sikim, lalu bedua darong Sukut.
- 7 Menoa Giliad enggi aku, bansa Menasi mega enggi aku:
 Bansa Imprim baka topi ti ninding pala aku;
 Bansa Judah baka tungkat pemrintah ti dipegai aku.
- 8 Sida Moab baka dulang endor aku masu kaki aku:
 Aku ka ngasoh sida Idum nuchi kasut aku:
 Nyadi pasal Pilistia, iya ka di-alah ka aku.
- 9 Sapa ti tau ngulu ka aku ngagai nengri ti kring:
 Sapa ti tau nganjong aku ngagai Idum?
- 10 Ukai enda Tuhan Allah ti udah ninggal ka kami:
 Ukai enda Tuhan Allah ti enda mansang enggau bala kami?
- 11 Saup kami ngelaban munsoh kami:
 Laban penyaup mensia endang nadai guna.
- 12 Olih penyaup Allah Taala, kami ka brani bendar:
 Laban endang iya ti ngalah ka munsoh kami.

MASMUR 61

- DINGA ka kangau aku, Tuhan Allah:
 Pending ka sambiang aku.
- 2 Ari samoa telok dunya, aku ka ngangau ka Tuhan, leboh ati aku nyau nadai:
 Anjong aku ngagai batu ti enda ulih gagai aku kadiri.
- 3 Laban aku lari ari munsoh ngagai Tuhan:
 Baka ti ngagai kota ti tegoh.
- 4 Aku ka diau dalam rumah Tuhan berari:
 Aku ka belindong di sayap Tuhan.

- 5 Laban Tuhan Allah udah ninga semai aku:
 Tuhan udah mri pesaka ka sida ti nangi ka nama Tuhan.
- 6 Tuhan ka ngemanjai ka umor rajah:
 Umor iya ka panjai, baka serak orang ti betampong-tampong.
- 7 Iya ka megai printah di moa Allah Taala belama-lama:
 Asoh penelap enggau pemendar Tuhan ngintu iya.
- 8 Nyadi aku ka muji nama Tuhan berari:
 Awak ka tiap hari aku tau ngamai ka semai aku enggau Tuhan.

12 HARI BULAN. SAMBIANG PAGI

MASMUR 62

- SAMENGAT aku diau aja, nganti Allah Taala:
 Kra, iya ti ka ngelepas ka aku.
- 2 Iya aja ti baka kubau-batu aku, ti penglepas aku:
 Iya ti baka misgit tinggi aku; nya alai ati aku enda banget kachau.
- 3 Pengluma kita ngemba orang:
 Samoa kita ti malu iya,
 Iya baka dinding ti ka tumbang, baka pagar ti beguyat.
- 4 Sida sigi baum ka ngemaroh ka iya ari pendiau iya ti badas:
 Sida rindu bejako bula;
 Sida merkat ka iya enggau mulut, tang ati sida dalam nyin nyumpah iya.
- 5 Samengat aku diau aja, nganti Allah Taala:
 Laban ari iya datai penglepas ti di-adang aku.
- 6 Iya aja ti kubau-batu aku, enggau penglepas aku:
 Iya aja ti misgit tinggi aku; nya alai aku enda kachau.
- 7 Penglepas aku enggau mulia aku endang tanggong Allah Taala:
 Batu ti ngring ka aku enggau kota aku, iya nya Allah Taala.
- 8 Arap ka iya berari-ari, samoa kita orang;
 Padah ka iya samoa runding ati kita:
 Allah Taala ti ngibun kitai.
- 9 Orang ti bansa baroh sigi baka utai ngapa aja, nyadi orang ti bansa tinggi baka utai bula:
 Enti ditimbang enggau dachin, sida runggang;
 Sida lempong agi ari angin.
- 10 Anang arap ka jalai ti beduan orang,
 Anang arap ngapa ka jalai ngenchuri:
 Enti pengraja nambah, anang tetengok ka iya.

- 11 Sa-kali Allah Taala udah bejako;
Dua-kali aku udah ninga tu:
Allah Taala ti bempu kuasa.
- 12 Nyadi Tuhan mega ti bempu pengasih:
Laban Tuhan ti malas samoa orang nunda ka kerja sida.

MASMUR 63

- TUHAN Allah, nuan ti Petara aku; bendar aku ngiga Tuhan:
Samengat aku baka ti aus ngiga Tuhan, tuboh aku mega lepi tetengok ka Tuhan,
Dalam menoa ti rangkai, ti puang, ti endor nadai ai.
- 2 Baka nya aku udah ngiga Tuhan dalam rumah Tuhan ti kudus:
Awak ka meda kuasa enggau mulia Tuhan.
 - 3 Laban penelap Tuhan badas agi ari pengidup kami:
Nyadi mulut aku ka muji Tuhan.
 - 4 Baka nya aku ka muji Tuhan salama aku idup:
Aku ka ngunyor ka jari aku leboh aku besambiang nyebut nama Tuhan.
 - 5 Samengat aku ka kenyang, baka ti udah makai untak-tulang enggau lemak jelu:
Lalu mulut aku ka muji Tuhan enggau jako pengandal.
 - 6 Nyadi dalam kibong aku ingat ka Tuhan:
Aku berunding ka Tuhan sa-malam-malam.
 - 7 Laban Tuhan udah nyaup aku:
Lalu di lindong sayap Tuhan, aku gaga.
 - 8 Samengat aku bepanggai di Tuhan:
Jari kanan Tuhan ti ngring ka aku.
 - 9 Tang sida ti ngiga jalai ka ngerusak samengat aku:
Sida nya ka nurun ka sabayan.
 - 10 Sida ka mati olih pedang:
Lalu di-empa ukuoi kampong.
 - 11 Tang rajah ka gaga olih Allah Taala:
Nyadi samoa orang ti nyampi ngagai iya ka menang;
Laban mulut orang ti bejako bula ka dipampul.

MASMUR 64

- DINGA ka kangau aku, Tuhan Allah, leboh aku tusah:
Tuhan ka ngibun samengat aku, enda aku takut ka munsoh.
- 2 Tuhan ka ngintu aku ari orang ti jai, ti baum belalai:
Ari kaban orang ti ngerja penyai mega.

- 3 Sida udah ngaga jako sida tajam baka pedang ti di-ansah:
Lalu jako sida bisa baka laja ti ditimbak orang.
- 4 Sida belalai awak ka nimbak orang ti badas:
Sida ngenyit nimbak iya, lalu enda takut.
- 5 Sida ngras ka diri niteh ka kerja ti jai:
Sida baum nan panjok ti enda tau dipeda;
Ko sida, Sapa ti tau meda iya?
- 6 Sida baum ngaga kerja ti jai; ko sida, Ator kami tentu ka nyadi:
Lalu runding enggau pragam samoa sida dalam bendar.
- 7 Tang Allah Taala ka nimbak sida:
Sida ka ngenyit bakal olih laja.
- 8 Baka nya mega sida ka alah: jako sidaempu ka nyalah sida:
Samoa ti meda sida ka lari.
- 9 Nyadi samoa mensia ka takut:
Sida ka nusi kerja Allah Taala,
Lalu nemu reti ator iya.
- 10 Orang ti lurus ka andal olih Tuhan, lalu arap ka iya:
Lalu samoa orang ti bendar ati ka gaga.

12 HARI BULAN. SAMBIANG LEMAI

MASMUR 65

- ENDANG patut Tuhan, Petara kami, dipuji dalam nengri Sion:
Lalu orang ngamai ka semaia sida enggau Tuhan.
- 2 Tuhan ti ninga ka sambiang sida:
Samoa mensia ka ngosong Tuhan.
 - 3 Taja mayoh macham penyai ngalah ka aku:
Tuhan ka nuchi kami ari penyalah.
 - 4 Pemadu penglantang orang nya ti dipilih Tuhan, ti di-asoh ngagai Tuhan,
Awak ka iya tau diau dalam rumah Tuhan:
Kami ka puas olih pemadas rumah Tuhan,
Ti endor kaaba Tuhan ti kudus.
 - 5 Tuhan ti lurus ka ninga ka kami, lalu ngaga kerja ti besai:
Tuhan Allah ti pinglepas kami:
Tuhan ti dikarap ka orang di samoa telok dunya,
Enggau sida di tasik ti jauh ari kami.
 - 6 Tuhan ti nuduk ka bukit enggau pengring iya:
Lalu ngelulong diri enggau kuasa.
 - 7 Iya ngemadu ka auh tasik enggau auh glumbang:
Enggau munyi orang ti begau.

- 8 Lalu samoa orang ti diau di samoa telok dunya takut meda kuasa Tuhan:
Tuhan ti ngasoh andal endor matahari tumbuh, enggau endor iya padam mega.
- 9 Tuhan udah ngabas menoa lalu mri ujan;
Tuhan ngasoh iya galak bendar:
Sungai Allah Taala besai bendar;
Tuhan ngasoh orang bulih padi, udah menoa di-intu baka nya.
- 10 Tuhan manjah endor ti lengkap,
Lalu ngerata ka tinting:
Tuhan ngelemi ka tanah enggau ujan,
Lalu merkat ka padi ti baru ka tumbuh.
- 11 Tuhan nyukup ka pemadas iya tiap taun:
Sabarang endor Tuhan bejalai, dia ka bisi berkat.
- 12 Tuhan mri berkat ka kampong:
Nyadi orang andal sablah bukit.
- 13 Di padang bisi mayoh bedus:
Padi di tanah empran galak amai;
Nya alai orang manjong lalu gaga lalu nyanyi.

MASMUR 66

- Puji Allah Taala lalu panjong:
Samoa kita di dunya.
- 2 Nyanyi ka mulia nama iya:
Kemesai ka puji iya.
- 3 Padah ka Allah Taala, Nyampau pemesai kerja Tuhan:
Olih pemesai kuasa Tuhan, munsoh Tuhan ka datai lalu nunduk ka Tuhan.
- 4 Samoa dunya ka nyembah Tuhan,
Lalu ka nyanyi ka Tuhan:
Sida ka nyanyi muji nama Tuhan.
- 5 Aram kita, meda kerja Allah Taala:
Besai kuasa kerja iya enggau mensia.
- 6 Iya ngasoh tasik nyadi tanah kring;
Orang bedarat nengah ai:
Olih nya kitai andal ati di iya.
- 7 Iya megai printah enggau kuasa belama-lama;
Iya ngemata ka samoa bansa mensia:
Anang orang ti ngelaban ninggi ka diri.
- 8 Puji Tuhan Allah, Petara kami, kita samoa bansa orang:
Asoh munyi puji iya didinga orang.

- 9 Iya ngidup ka samengat kitai:
Lalu enda ngasoh kaki kitai teginsit.
- 10 Laban Tuhan Allah udah ngabas kami:
Tuhan udah ngabas kami, baka pirak ti udah dipresa.
- 11 Tuhan udah ngasoh kami disintak jarin:
Tuhan udah ngengkah ka ma ti brat di bau kami.
- 12 Tuhan ngasoh pala kami di-indik orang ti bekuda;
Kami udah nengah api, nengah ai:
Tang Tuhan mai kami pansut ngagai endor ti nyamai bendar.
- 13 Aku ka tama rumah Tuhan, mai piring ka ditunu:
Aku ka ngamai ka semaia aku,
- 14 Semaia nya ti disanggup mulut aku:
Ti disebut aku leboh aku tusah.
- 15 Aku ka mri ka Tuhan jelu ti gemu ka ditunu,
Serta enggau domba lelaki ti ditunu:
Aku ngenjok chapi enggau kambin.
- 16 Kitu ka, lalu dinga, samoa kita ti nangi ka Allah Taala:
Aku ka nusi ka kita utai ti digaga iya leboh iya ngidup ka aku.
- 17 Aku ngangau ka iya enggau mulut aku:
Lalu muji iya enggau jako aku.
- 18 Enti ati aku berunding ka penyai:
Tentu Tuhan enggai ninga ka aku.
- 19 Tang amai bendar Allah Taala udah ninga:
Iya udah mending ka jako sambiang aku.
- 20 Puji ka Allah Taala:
Ti enggai muai sambiang aku, ti enda kala enggai kasih ka aku.

MASMUR 67

- TUHAN Allah kasih ka kami, lalu bri berkat ka kami:
Asoh kami meda penampak moa Tuhan.
- 2 Awak ka jalai Tuhan tau ditemu dalam dunya:
Enggau penglepas Tuhan ditemu olih samoa bansa mensia.
- 3 Awak ka orang mayoh muji nuan, Tuhan Allah:
Awak ka samoa orang muji Tuhan.
- 4 Awak ka samoa bansa mensia andal, lalu nyanyi olih pengaga:
Laban Tuhan ka mrintah orang enggau lurus,
Lalu ngiring samoa bansa mensia di bumi.
- 5 Awak ka orang mayoh muji nuan, Tuhan Allah:
Awak ka samoa orang muji Tuhan.

- 6 Tanah udah numboh ka buah iya:
Lalu Allah Taala, Petara kami, ka merkat ka kami.
- 7 Allah Taala ka merkat ka kami:
Nyadi samoa telok dunya ka nangi ka iya.

13 HARI BULAN. SAMBIANG PAGI

MASMUR 68

- ALLAH Taala ka angkat, lalu munsoh iya ka pambar:
Nyadi sida ti begedi ka iya ka lari ari moa iya.
- 2 Tuhan ka muru sida, lalu sida ka nyau baka asap:
Baka lilin ti lela laban api,
Baka nya orang ti jai ka ambis nyau, laban moa Allah Taala.
Amai, sida ka gaga enggau pengandal.
- 4 Nyanyi ka Allah Taala, nyanyi lalu puji nama iya:
Gaga jalai raya ka iya ti bekuda nengah menoa puang;
Nama iya Allah Taala; gaga kita leboh iya datai.
- 5 Allah Taala ti diau di endor iya ti kudus:
Endang apai orang ti patu; iya bechara mega ka orang balu.
- 6 Allah Taala ngasoh orang ti diau kadiri begulai enggau orang mayoh:
Iya ngelepas ka orang tutup ngagai penglantang;
Tang orang ti ngelaban diau di menoa kusi.
- 7 Leboh Tuhan Allah mansang di moa anembiak iya:
Leboh Tuhan bejalai nengah menoa puang,
- 8 Tanah berenyang.
Ujan mega datai ari langit di moa Allah Taala:
Bukit Sinai mega beguyat, leboh Allah Taala datai, iya nya Petara sida Israil.
- 9 Tuhan Allah mri ujan penumbas iya:
Tuhan ngring ka anembiak iya leboh sida lelak.
- 10 Kaban anembiak Tuhan diau dia:
Enggau penelap Tuhan Allah ngidup ka orang ti umang.
- 11 Tuhan mansut ka jako:
Lalu besai bala orang ti nusi brita.
- 12 Samoa bala rajah lari, sida undor:
Nyadi orang ti meruan di rumah bedua prapasan.
- 13 Taja kita meruan dalam kandang domba:
Sayap puna baka ti dilapis enggau pirak;
Bulu iya baka mas ti kuning.

- 14 Leboh Allah Taala ti bekuasa mambar ka rajah di menoa nya:
Bisi selju di menoa Salmon.
- 15 Bukit Basan, iya nya bukit ti endor Allah Taala:
Bukit Basan, iya nya bukit ti tinggi punjong.
- 16 Kita bukit ti tinggi, lapa kita kapapas,
Leboh kita meda bukit nya ti dikarindu ka Allah Taala, ti endor iya diau:
Tuhan endang ka diau dia belama-lama.
- 17 Kreta prang Allah Taala duapuluh-ribu, amai beribu-ribu:
Tuhan diau enggau sida, baka iya diau dalam endor ti kudus, iya nya dalam Sinai.
- 18 Tuhan udah niki katas, Tuhan udah nangkap sida, lalu mai sida ti ditangkap:
Tuhan udah nyambut utai ti dibri mensia,
Enggau utai dibri sida ti ngelaban mega, awak ka Tuhan Allah tau diau enggau sida.
- 19 Puji ka Tuhan ti nyangga kitai besari-sari:
Iya nya Allah Taala, ti pinglepas kitai.
- 20 Allah Taala endang Petara ti ngelepas ka kitai:
Nyadi Allah Taala ti Tuhan ti tau ngelepas ka kitai ari mati.
- 21 Tang Allah Taala ka mechah ka pala munsoh iya:
Amai iya ka mlah pala sida ti meruan ngaga penyalah.
- 22 Tuhan bejako, ko iya, Aku ka mai sida pulai baru ari Basan:
Aku ka mai sida pulai baru ari tasik ti dalam.
- 23 Awak ka nuan tau ngerendam ka kaki nuan dalam darah:
Awak ka isi munsoh nuan tau nyadi pemakai ukuoi nuan.
- 24 Orang udah meda pejalai Tuhan Allah:
Iya nya pejalai Tuhan Allah, ti Rajah aku, leboh iya tama kadalam endor ti kudus.
- 25 Orang ti nyanyi bejalai dulu, orang ti betaboh niteh ka sida:
Di tengah bisi indu dara ti begendang.
- 26 Puji Allah Taala olih kita, leboh orang begempuru:
Puji Tuhan olih kita ti ari puris Israil.
- 27 Dia bisi kaban Benjamin ti mit, ti mrintah sida;
Orang tuai bansa Judah enggau kaban sida:
Orang tuai sida Sabulon, enggau orang tuai sida Naptali.
- 28 Pandang ka pengring diri, Tuhan Allah:
Kring ka diri, Tuhan Allah, ti udah nyangga kami.

- 29 Sida rajah ka mai utai ti ka dibri ka Tuhan:
Tegal kaaba Tuhan di Jerusalem.
- 30 Rara, olih nuan Tuhan, baya ti di bemban,
Enggau kaban chapi lelaki enggau anak chapi, iya nya
orang mayoh:
Nyadi samoa orang nunduk, lalu mri wang pirak;
Tuhan udah mambar sida ti rindu beprang.
- 31 Orang besai ka datai ari Misir:
Orang Itiopia ka beguai ngunyor ka jari ngagai Allah
Taala.
- 32 Nyanyi ka Allah Taala, samoa kita printah dunya:
Nyanyi lalu puji Tuhan.
- 33 Nyanyi ka iya ti diau di langit ti pemadu tinggi, ti endang
ari kalia:
Iya mansut ka nyawa iya, amai nyawa iya ti inggar.
- 34 Tusi olih kita pengring Allah Taala;
Enggau pemadas iya ti ngibun sida Israil:
Pengring iya dipeda di langit.
- 35 Pemadu pemesai Allah Taala ti di endor iya ti kudus:
Allah Taala ti Petara sida Israil, iya ti mri pengring
enggau kuasa ka anemiak iya.
Puji ka Allah Taala.

13 HARI BULAN. SAMBIANG LEMAI

MASMUR 69

- Idup ka aku, Tuhan Allah:
Laban aku nyau ka mati olih ai bah.
- 2 Aku tepurok di paya ti dalam, ti nadai endor berindik:
Aku nyau dalam ai, ti ka ngampoh aku.
- 3 Aku lelak bekangau; rekong aku nyau rangkai:
Mata aku nyau rabun leboh aku nganti Allah Taala.
- 4 Sida ti pedis ati soh aku enggau nadai kabuah, mayoh agi
ari bok pala aku:
Sida munsoh ti ka nganu aku enggau nadai kabuah, kring
bendar;
Lalu aku di-asoh mulai ka utai ti ukai di-ambi aku.
- 5 Tuhan Allah ti nemu pemudau aku:
Nyadi penyalah aku endang tampak dipeda Tuhan.
- 6 Anang orang ti nganti Tuhan kena pemalu tegal aku,
Tuhan Allah, ti kapala bala serga:
Anang orang ti ngiga Tuhan dibantah tegal aku, Tuhan
Allah, ti Petara sida Israil.

- 7 Aku udah dipechat orang tegal Tuhan:
Moa aku malu amai.
- 8 Aku dipeda suku juru baka orang bukai:
Aku baka orang ti enda dikelala menyadi aku.
- 9 Aku rajin ka rumah Tuhan enggau pengambis ati aku:
Nyadi jako ti enggau orang bejai Tuhan, sama bejai aku
mega.
- 10 Leboh aku nyabak lalu ngring ka ati aku olih bepasa:
Tegal nya orang bejai aku.
- 11 Leboh aku ngena kain kasar ka baju aku:
Orang ngenang aku enggau jako ensumbar.
- 12 Sida ti duduk di pasar bejako ka aku:
Nyadi orang ti mabok nyanyi pasal aku.
- 13 Tang aku besambiang ngagai Tuhan leboh iya ka ninga:
Dinga ka aku Tuhan Allah, ti kasih bendar,
Dinga ka aku Tuhan ti endang pinglepas ti bendar.
- 14 Lepas ka aku enggai ka aku tepurok di paya:
Awak ka aku dilepas ari sida ti pedis ati soh aku, ari tengah
ai ti dalam.
- 15 Anang nyagi aku ampoh olih ai ti bah,
Anang nyagi aku lemas olih ai ti dalam:
Anang nyagi aku ditambun dalam lubang tanah.
- 16 Saut aku, Tuhan; laban penelap Tuhan endang badas:
Nunda ka pengasih Tuhan ti besai, kalih ka moa lalu
malik soh aku.
- 17 Anang enda malik soh anemiak nuan, Tuhan:
Saut aku lengkas, laban aku tusah.
- 18 Datai ngosong aku, lalu tebus samengat aku:
Lepas ka aku ari munsoh aku.
- 19 Tuhan nemu orang ngutuk lalu mechat lalu ngemalu ka
aku:
Munsoh aku dipeda Tuhan magang.
- 20 Ati aku ambis olih orang ti ngutuk aku; aku sakit bendar:
Aku ngiga orang ti ka kasih ka aku, tang siko pen nadai;
Nyadi orang ti tau ngenyamai ka aku nadai temu aku.
- 21 Sida mri ka aku utai pait ka pemakai aku:
Leboh aku aus sida mri aku ngirup ai chuka.
- 22 Awak ka upih, kena mungkus bekal sida, nyadi ka pengru-
sak sida:
Nyadi leboh sida lantang, awak ka sida kena tangkap.
- 23 Awak ka mata sida rabun, ngambi ka sida enda meda:
Nyadi asoh kaki sida geta-getar berari.

- 24 Anang enda nganu sida, Tuhan:
Awak ka sida kena pengingat Tuhan ti balat.
- 25 Awak ka endor sida diau nyadi sunyi:
Anang nyagi orang diau di langkau sida.
- 26 Laban sida beduan orang ti udah kena ajar Tuhan:
Lalu sida rindu nusi pamarinsa orang ti udah kena anu Tuhan.
- 27 Awak ka penyalah sida nambah-menambah:
Anang nyagi sida bulih penglurus ti dibri Tuhan.
- 28 Awak ka nama sida dibuai ari surat, ti alai ditulis nama orang ti ka idup:
Anang nyagi nama sida ditulis begulai enggau nama orang ti lurus.
- 29 Tang aku tusah lalu pedis:
Tuhan ti pinglepas aku ka ngangkat ka aku.
- 30 Aku ka muji nama Tuhan enggau pantun:
Aku ka ngemesai ka iya enggau puji.
- 31 Nyadi Allah Taala rindu ka nya, lebih agi ari jelu lembu:
Lebih agi ari chapi ti betandok, ti betunjing.
- 32 Orang ti baroh ati udah meda lalu gaga:
Awak ka ati kita ti ngiga Tuhan lantang baru.
- 33 Laban Tuhan ninga ka orang ti saranta:
Lalu enda mechat orang ti ditangkap iya.
- 34 Awak ka serga enggau bumi muji Tuhan:
Tasik mega enggau samoa utai ti diau dalam iya.
- 35 Laban Allah Taala ka ngidup ka orang Sion; lalu niri ka nengri orang Judah:
Lalu orang ka diau dia lalu bempu iya berari.
- 36 Anak uchu anembiak iya mega ka bempu iya ka pesaka:
Lalu orang ti rindu ka nama iya ka diau dia.

MASMUR 70

- JAMPAT lepas ka aku Tuhan Allah:
Anang laun nyaup aku, Tuhan.
- 2 Asoh malu, asoh kena pechat
Sida ti ka munoh aku:
Asoh nikal pulai, asoh malu,
Sida ti ka ngerusak aku.
- 3 Asoh pulai laban pemalu:
Sida nya ti bejako ka aku.
- 4 Tang asoh andal, asoh gaga, sida ti ngiga Tuhan:
Awak ka sida ti rindu ka pengasih Tuhan bejako berari,
Puji ka Tuhan Allah.

- 5 Tang aku tu marinsa lalu tusah;
Lengkas ngosong aku, Tuhan Allah:
Tuhan ti penyaup, ti pinglepas aku;
Anang betanggoh, Tuhan ti Petara aku.

14 HARI BULAN. SAMBIANG PAGI

MASMUR 71

- AKU udah arap ka Tuhan:
Anang aku malu belama-lama.
- 2 Olih nuan, Tuhan, endang lurus, lepas ka aku, lalu idup ka aku:
Singit ka pending ngagai aku, lalu idup ka aku.
- 3 Nyadi kubau-batu ka aku, Tuhan, ti endor aku tau betan berari:
Tuhan udah mesan orang ngidup ka aku;
Laban Tuhan endang baka batu ka aku, endang kubau aku.
- 4 Lepas ka aku, Tuhan Allah ti Petara aku, ari jari sida ti jai:
Ari jari orang ti enda lurus, ti mangah.
- 5 Laban Tuhan Allah ti endang di-adang ka aku:
Tuhan ti udah dikarap ka aku kenyau ari aku agi biak.
- 6 Aku udah bepanggai di Tuhan kenyau ari aku ada:
Tuhan ti udah nyaup aku kenyau ari aku ada;
Nya alai aku ka muji Tuhan berari.
- 7 Aku diperening orang mayoh, baka utai ti nyelai:
Tang Tuhan endang kubau aku ti tegoh.
- 8 Mulut aku ka bejako lalu muji Tuhan:
Lalu aku ka bebasa ka Tuhan besari-sari.
- 9 Anang muai aku leboh aku nyau tuai:
Anang ninggal ka aku leboh aku nyau lembut tulang.
- 10 Laban munsoh bejako ka aku:
Nyadi sida ti nganti munoh aku baum, ko sida,
- 11 Petara iya udah ninggal ka iya:
Titeh ka iya, tangkap iya; laban nadai orang ti tau ngelepas ka iya.
- 12 Anang nuan jauh ari aku, Tuhan Allah:
Lengkas saup aku, Tuhan Allah, ti Petara aku.
- 13 Awak ka orang ti ngelaban samengat aku malu lalu rusak:
Awak ka sida ti ka nganu aku malu bendar, lalu dipechat orang.
- 14 Tang aku ka arap ka Tuhan berari:
Lalu mansang berari muji Tuhan.

- 15 Besari-sari mulut aku nusi penglurus Tuhan,
Aku nusi pasal Tuhan ti ngelepas ka orang mega:
Laban pengambis penyampau iya enda temu aku.
- 16 Aku ka datai mrita ka kerja Tuhan Allah ti besai:
Aku ka ngenang penglurus Tuhan aja.
- 17 Nuan, Tuhan Allah, udah ngajar aku kenyaou ari aku agi mit:
Salama tu aku endang nusi kerja Tuhan ti besai.
- 18 Datai ka aku udah tuai, nyau buban, Tuhan Allah, anang ninggal ka aku:
Datai ka aku udah nusi pengring Tuhan ngagai serak orang ti ka datai,
Enggau kuasa Tuhan ngagai orang ti apin bisi.
- 19 Rita penglurus Tuhan Allah datai ka langit;
Tuhan ti udah ngaga kerja ti besai:
Sapa ti baka Tuhan Allah?
- 20 Tuhan ti udah ngasoh kami ensepi penusah ti mayoh ti besai,
Tuhan ti ka ngidup ka kami baru:
Lalu ka mai kami pulai ari lubang tanah ti pemadu dalam.
- 21 Aku minta Tuhan ngemesai ka aku:
Lalu mulai ka aku baru, lalu ngelantang ka aku.
- 22 Aku ka muji Tuhan enggau gendang mega,
Amal aku ka muji jako Tuhan ti bendar:
Aku ka nyanyi muji Tuhan enggau engkratong,
Tuhan ti kudus, ti Petara Israil.
- 23 Aku ka nyanyi inggar, leboh aku begendang muji Tuhan:
Samengat aku mega, ti ditebus Tuhan, ka gaga.
- 24 Mulut aku mega ka nusi penglurus Tuhan besari-sari:
Laban sida ti ka nganu aku udah silu, udah malu mega.

MASMUR 72

- BRI ka rajah kuasa bechara enggau lurus, Tuhan Allah:
Bri penglurus ka anak rajah.
- 2 Iya ka ngeletak ukum ti lurus ka anemiak Tuhan:
Lalu bechara ka orang ti umang enggau patut.
- 3 Orang di bukit ka bulih untong salamat:
Orang di munggu ka bulih mega, olih sida diprintah enggau lurus.
- 4 Iya ka bechara ka orang ti umang:
Iya ka ngidup ka anak orang ti saranta,
Lalu ngalah ka orang ti nusah ka sida.

- 5 Sida ka nangi ka Tuhan salama matahari meruan:
Salama bulan tampak mega, datai ka pengambis serak orang.
- 6 Iya baka ujan ti nurun datas padang ti udah ditebas:
Baka ujan ti masah ka tanah.
- 7 Leboh maia iya, orang lurus ka nambah:
Lalu salamat ka meruan sablah dunya, datai ka bulan nyau nadai agi.
- 8 Iya ka megai printah ari tebing tasik sapiak, datai ka tebing tasik sapiak:
Ari batang ai datai ka pengambis telok dunya.
- 9 Sida ti diau di menoa puang ka meremi nyembah iya:
Munsoh iya ka nyungkor ka diri datai ka tanah.
- 10 Sida rajah Tarsis enggau samoa pulau ka nganjong chukai:
Sida rajah Arabi enggau Saba ka ngenjok utai.
- 11 Samoa rajah ka nyungkor ka diri nyembah iya:
Samoa bansa mensia ka betuai ka iya.
- 12 Olih iya ka ngidup ka orang ti saranta, leboh sida ngangau ka iya:
Enggau orang umang mega, leboh nadai bisi orang ti ka nyaup sida.
- 13 Iya ka kasih ka orang ti lemi enggau sida ti saranta:
Lalu ka ngidup ka nyawa orang ti umang.
- 14 Iya ka ngelepas ka sida ari orang ti ngakal, ti mangah:
Nyadi darah sida ka dirunding iya utai ti berega.
- 15 Sida ka di-idup ka, lalu orang ka mri ka iya mas ari Arabi:
Orang ka besampi ka iya berari-ari;
Lalu muji iya besari-sari.
- 16 Padi ka galak di menoa nya, datai ka punjong bukit:
Lalu buah iya ka bebenyut, baka kayu di Libanun;
Lalu orang di nengri ka nambah-menambah baka rumput.
- 17 Nama iya ka meruan belama-lama;
Nama iya ka meruan penglama matahari agi meruan:
Orang ka minta berkat baka berkat iya,
Lalu samoa bansa mensia ka ngumbai iya lantang.
- 18 Puji ka Tuhan Allah, ti Petara sida Israil:
Iya aja ti ngaga kerja ti besai.
- 19 Puji ka nama iya ti bemulia belama-lama:
Awak ka samoa dunya penoh olih mulia iya.
Amin, Amin.

14 HARI BULAN. SAMBIANG LEMAI

MASMUR 73

- ALLAH Taala tentu endang badas enggau Israil:
Iya nya enggau sida ti tuchi ati.
- 2 Tang kaki aku nyau ka limpang:
Kaki aku nyau ka klinchir.
 - 3 Laban aku nyau kapapas meda orang ti ngemesai ka diri:
Meda penyamai orang ti jai mega.
 - 4 Laban sida enda marinsa:
Nyadi tuboh sida grai lalu kring mega.
 - 5 Sida enda tusah baka orang bukai:
Sida enda kena kachau baka orang mayoh.
 - 6 Nya alai ati sida baka ati orang ti sumbong, ti ngena
tenggak di rekong sida:
Nyadi sida nyerayong diri enggau pemangah.
 - 7 Penyai pansut ari ati sida:
Runding ati sida nyau mayoh bendar.
 - 8 Sida mantah orang, lalu bejako pasal utai ti jai:
Sida bekenang ka jalai nusah orang, munyi orang ti
bekuasa.
 - 9 Sida mansut ka jako baka ti enggau kuasa ti ari serga:
Nyawa sida didinga sablah dunya.
 - 10 Nya alai anemiak aku niteh ka sida:
Lalu ati sida lantang, baka orang ti udah ngirup ambis ari
mangkok ti penoh.
 - 11 Nyadi ko sida, Baka ni Allah Taala tau nemu:
Kati, Iya ti Pemadu Tinggi bisi penemu?
 - 12 Dinga ka aku olih kita, sida nya endang jai:
Nyadi laban sida salalu lantang, pengraja sida nambah-
menambah.
 - 13 Tentu aku udah nuchi ati aku ngapa:
Lalu udah nuchi diri baka orang ti masu jari.
 - 14 Laban besari-sari aku kena kachau:
Lalu tiap pagi aku kena anu.
 - 15 Enti sema aku udah bejako, ko aku, Aku ka nusi utai nya:
Tentu aku udah nusah ka anemiak Tuhan.
 - 16 Aku salalu berunding baka ni aku tau mereti utai nya:
Tang tekelalu mar ka aku.
 - 17 Datai ka aku tama ka rumah Allah Taala:
Lalu berunding ka pengujung orang nya.
 - 18 Tentu Tuhan ngeletak sida diau di endor ti lichin:
Tuhan ngerebah ka sida lalu sida rusak.

- 19 Sida lalu tekenyit kena rusak:
Sida nyau temati-ati olih takut.
- 20 Baka mimpi dirunding kitai, ti udah dani, utai ngapa:
Baka nya utai sida dirunding Tuhan utai ngapa.
- 21 Laban ati aku kachau:
Lalu aku tusah dalam nyin.
- 22 Aku agu, aku enda nemu:
Aku dipeda Tuhan baka jelu.
- 23 Tang aku salalu enggau Tuhan:
Tuhan udah megai jari kanan aku.
- 24 Tuhan ka ngiring aku olih ajar:
Nyadi dudi hari iya ka nyambut aku enggau basa.
- 25 Sapa ti dikarap ka aku di serga, enti enda Tuhan:
Nyadi nadai utai ti ka tengok aku di dunya, enti enda
Tuhan.
- 26 Tuboh enggau ati aku ka nyau:
Tang Allah Taala ti pengring enggau untong aku belama-
lama.
- 27 Tang sida ti tesat jauh ari Tuhan ka nyau:
Tuhan ka ngerusak samoa sida ti mungkir ari Tuhan.
- 28 Tang badas aku ngadap Allah Taala:
Aku udah lari ngagai Tuhan Allah,
Awak ka aku tau nusi kerja Tuhan.

MASMUR 74

- LAPA Tuhan Allah udah muai kami belama-lama:
Lapa anu Tuhan baka api ti mau, ti ngerusak bedus ti
dalam padang Tuhan?
- 2 Ingat ka kaban anemiak nuan, Tuhan, ti ditebus Tuhan
ari kalia:
Ti ditebus nyadi kaban, nyadi pesaka Tuhan;
Ingat ka bukit Sion, ti endor Tuhan diau mega.
 - 3 Angkat ka diri, lalu ngagai endor ti udah lama rusak:
Pengrusak nya ti digaga munsoh di endor ti kudus.
 - 4 Munsoh Tuhan udah manjong dalam rumah Tuhan:
Lalu udah niri ka menira ka tanda sida udah menang.
 - 5 Sida dipeda baka orang ti mauk ka bliong:
Baka orang ti nebang kayu lulong.
 - 6 Nyadi diatu sida mantap, sida ngerusak samoa kayu ti
di-ukir:
Enggau kapak, enggau tukul sida.
 - 7 Sida udah nunu endor ti kudus, ti enggi Tuhan:

- Sida enda bebasa ka rumah Tuhan, tang ngeruboh ka iya datai ka tanah.
- 8 Ko sida dalam ati diri, Aram kitai ngerusak ka iya ambis: Lalu sida udah nunu samoa rumah Allah Taala di menoa nya.
- 9 Kresa rumah Tuhan, ti nyadi tanda pengarap kami, nadai agi dipeda kami:
Nabi pen nadai agi;
Nadai orang ti nemu pemadu penusah nya.
- 10 Kati, pengluma agi orang ti ngelaban ka mechat kami, Tuhan Allah:
Kati, munsoh ka bejai nama Tuhan belama-lama?
- 11 Lapa Tuhan nan ka jari, iya nya jari kanan Tuhan:
Mantai ka jari, unjor ka iya, lalu ngamok ka sida.
- 12 Tang Allah Taala ti endang Rajah aku ari kalia:
Iya ti ngelepas ka orang enggau kerja besai ti dipeda samoa mensia.
- 13 Enggau kuasa Tuhan udah magi ai tasik:
Tuhan udah mambar ka pala naga di tasik.
- 14 Tuhan ngeredak ka pala baya:
Lalu mri isi iya ka pemakai jelu ti di menoa puang.
- 15 Tuhan mlah batu lalu mansut ka ai enggau sungai:
Tuhan ngelangkang ka batang ai ti besai.
- 16 Tuhan ti bempu siang enggau malam mega:
Tuhan ti udah ngator bulan enggau bintang enggau matahari.
- 17 Tuhan ti udah magi tanah enggau tasik:
Musin kemarau enggau musin ujan udah digaga Tuhan.
- 18 Ingat ka munsoh ti udah mechat nuan, Tuhan:
Enggau orang budau ti udah bejai nama Tuhan.
- 19 Anang nyagi burong puna dibunoh jelu ti mangah, Tuhan:
Anang enda ingat ka kaban anemiak Tuhan ti tusah belama-lama.
- 20 Ingat ka semaia nuan enggau kami, Tuhan:
Laban bisi mayoh endor ti petang alai kami tau kena rusak.
- 21 Anang nyagi orang ti dikeduan pulai lebu, Tuhan:
Awak ka orang ti umang, enggau sida ti saranta, muji nama Tuhan.
- 22 Angkat lalu ngring ka diri bejako, Tuhan:
Ingat ka orang budau ti mechat Tuhan besari-sari.
- 23 Anang enda ingat ka jako munsoh nuan, Tuhan:
Bunyi achu orang ti ngelaban Tuhan didinga Tuhan berari.

15 HARI BULAN. SAMBIANG PAGI

MASMUR 75

- KAMI muji nuan, Tuhan Allah;
Kami muji nuan, olih Tuhan endang semak:
Orang nusi kerja Tuhan ti besai.
- 2 Ko Allah Taala, Uдах timpoh ti endang diletak aku datai:
Aku ka bechara enggau lurus.
- 3 Taja dunya enggau samoa mensia kena kachau:
Aku ti udah ngring ka adat Allah Taala.
- 4 Ko aku enggau orang ti sumbong, Anang ngemesai ka diri:
Ko aku enggau orang ti jai, Anang ngangkat ka pala, baka jelu ti nandok.
- 5 Anang ngangkat ka pala kita tinggi, baka jelu ti ka nandok:
Anang bejako kasar, baka orang ti sumbong, ti enggai nunduk ka diri.
- 6 Ukai ari timor ukai ari barat:
Ukai ari salatan, datai penyaup kami.
- 7 Tang Allah Taala ti megai pechara:
Siko digaga iya baroh, siko digaga iya tinggi.
- 8 Lalu di jari Tuhan bisi mangkok, nyadi ai anggor dalam nyin mansau;
Rempah bisi digulai dia, lalu Tuhan ngisi mangkok orang ari nya:
Tang rampang ai anggor nya ka di-irup ambis samoa orang ti jai di dunya.
- 9 Tang aku ka nusi kerja besai belama-lama:
Aku ka nyanyi lalu muji Allah Taala, ti Petara Jakob.
- 10 Aku ka ngalah ka kuasa orang ti jai:
Tang aku ka ngemesai ka kuasa orang ti lurus.

MASMUR 76

- DI menoa orang Judah, Allah Taala endang dikelala:
Lalu nama iya besai di menoa sida Israil.
- 2 Rumah iya di Salim:
Lalu Sion nyadi endor iya diau.
- 3 Dia iya matah ka laja ti ditimbak enggau panah:
Trabai mega enggau pedang enggau samoa senyata prang.
- 4 Tuhan ti endang bemulia, Tuhan ti pemadu manah:
Ti datai ari bukit ti endang meruan belama-lama.
- 5 Sida ti besai ati udah ngantok lalu tindok, lalu utai sida udah di-ambi orang:
Lalu jari samoa orang ti kring udah nyau lemi.

- 6 Leboh sida kena rara nuan Tuhan Allah, ti Petara Jakob:
Kreta enggau kuda nyau baka orang ti enda tau bejalai agi.
- 7 Nuan, Tuhan, ti patut ditakut ka orang:
Sapa ti tau meruan bediri di moa Tuhan, leboh Tuhan ringat?
- 8 Nuan, Tuhan ti ngeletak ukum ari serga:
Samoa dunya takut lalu diau, enda engkertik.
- 9 Leboh nya Allah Taala angkat ka bechara:
Awak ka ngidup ka samoa orang ti enda besai ati di dunya.
- 10 Tentu Tuhan ka dipuji leboh sida ti ngelaban udah alah:
Lalu Tuhan ka ngerara sida ti enggai nunduk.
- 11 Anang enda besemaia enggau Allah Taala, ti Petara kita:
Awak ka samoa orang ti ka nyadi anembaik iya mai utai ti ka dibri ka iya ti patut dikenangi ka orang.
- 12 Iya ka nekat ati orang ti besai:
Nyadi samoa rajah dunya takut ka iya.

MASMUR 77

- AKU ka ngangau ka Allah Taala enggau nyawa inggar:
Inggar amai aku ka ngangau ka Allah Taala, lalu iya ka mending aku.
- 2 Leboh aku tusah aku ngosong Tuhan:
Jari aku meruan di-unjor samalam-malam,
Ati aku lalu enda lantang.
 - 3 Leboh aku ka ingat ka Allah Taala, ati aku kachau:
Leboh aku ka sambiang ati aku rigau.
 - 4 Tuhan ti ngring ka mata aku bejaga:
Aku tusah bendar lalu enda tau bejako.
 - 5 Aku berunding ka pendiau aku ti udah:
Enggau maia ti dulu kalia.
 - 6 Aku ingat ka pantun ti dinyanyi aku malam hari:
Aku berunding dalam ati diri;
Lalu ati aku ngiga reti utai.
 - 7 Kati, Tuhan ka muai orang belama-lama:
Kati, iya enggai agi kasih ka orang?
 - 8 Kati, pengasih iya nyau nadai agi belama-lama:
Kati, semaia iya enda di-amai ka belama-lama?
 - 9 Kati, Allah Taala enda ingat lalu enda kasih ka kami:
Kati, iya udah badu sinu ati laban iya ringat?
 - 10 Nyadi ko aku, Nya kabuah aku tusah:
Tang aku ka ingat ka kuasa jari kanan Iya ti Pemadu
Tinggi dulu kalia.

- 11 Aku ka nusi kerja Tuhan:
Laban aku ingat ka utai nyelai ti digaga Tuhan kalia.
- 12 Aku ka ngenang samoa kerja Tuhan:
Lalu berunding ka utai ti digaga Tuhan.
- 13 Jalai nuan, Tuhan Allah, endang jalai ti lurus:
Petara ni ti besai baka Allah Taala?
- 14 Tuhan endang Petara ti ngaga utai nyelai:
Nuan, Tuhan, udah mandang ka pengring nuan ngagai orang mayoh.
- 15 Nuan udah nebus anembiak nuan enggau lengan ti kring,
Tuhan:
Iya nya anak uchu Jakob saduai Josep.
- 16 Ai tasik meda nuan, Tuhan Allah;
Ai tasik meda nuan, Tuhan, lalu takut:
Ai ti dalam belenggang.
- 17 Ujan laboh ari moa-hari;
Lalu langit mansut ka nyawa:
Laja Tuhan mega nyau pansut berari.
- 18 Munyi guntor nuan, Tuhan, didinga serta biobalai:
Kilat nampak ka dunya;
Bumi nyau beguyat lalu berenyang.
- 19 Tuhan bejalai nengah tasik,
Ai ti besai nyadi jalai Tuhan:
Bekau kaki Tuhan enda ditemu orang.
- 20 Nuan, Tuhan, udah ngulu ka anembiak nuan baka kaban domba:
Olih jari Musa saduai Aron.

15 HARI BULAN. SAMBIANG LEMAI

MASMUR 78

- DINGA ka ajar aku, kita ti anembiak aku:
Singit ka pending kita, lalu dinga ka jako aku.
- 2 Aku ka nusi jako empama:
Aku ka madah ka jako dalam ti ari kalia.
 - 3 Utai nya ti udah didinga, ti ditemu kitai:
Ti ditusi aki ini kitai mega.
 - 4 Nadai kitai ka belalai ka iya ari anak uchu sida;
Kitai nusi ka serak orang ti ka datai kerja Tuhan ti dipuji:
Kitai nusi pengring iya mega enggau kerja besai ti digaga iya.
 - 5 Laban iya ngaga pengingat ka diriempu enggau kaban sida Jakob,
Lalu ngeletak ka adat ka sida Israil:

- Nya ti pesan iya enggau aki ini kitai,
Awak ka sida nusi iya ngagai anak uchu sida.
- 6 Awak ka serak ti dudi, iya nya anak ti apin ada, tau nemu iya:
Lalu tau angkat lalu nusi iya ka anak sida.
- 7 Awak ka sida tau tentu arap ka Allah Taala:
Lalu tau ingat ka kerja Allah Taala,
Lalu ngintu pesan iya.
- 8 Enggai ka sida niteh ka jalai aki ini sida,
Sida nya serak orang ti kras, ti ngelaban:
Serak orang ti enda nentu ka ati sida,
Ati sida enda meruan arap ka Allah Taala.
- 9 Anak Ipraim ti besenyata, ti megai panah:
Nikal pulai leboh beprang.
- 10 Sida mungkir ka semaia sida enggau Allah Taala:
Lalu enggai niteh ka adat iya.
- 11 Lalu sida enda ingat ka utai ti digaga iya:
Enggau kerja besai ti dipeda sida digaga iya.
- 12 Utai nyelai digaga iya ti dipeda aki ini sida:
Di menoa Misir enggau di tanah Soan mega.
- 13 Iya magi tasik, lalu nganjong sida ka sebrai:
Iya ngempuru ka ai, lalu nugong iya.
- 14 Siang hari iya ngiring sida enggau remang:
Malam hari enggau randang api.
- 15 Iya mlah batu di menoa puang;
Lalu mri sida ngirup ai baka ti ari lubang ti dalam.
- 16 Iya mansut ka ai ari batu:
Lalu ngasoh iya anyut baka sungai.
- 17 Tang sida agi bepenyalah ngelaban iya:
Sida ngelaban Iya ti Pemadu Tinggi di menoa puang.
- 18 Nyadi ati sida enda arap ka Allah Taala:
Tang sida minta pemakai ti ka tengok sida.
- 19 Lalu sida bejako ngelaban Allah Taala:
Ko sida, Tau Allah Taala ngemas ka mija di menoa puang?
- 20 Kami nemu iya mlah batu lalu mansut ka ai,
Lalu sungai nyau bah:
Tau iya mri roti ka kami,
Tau iya mri lauk ka anembiak iya?
- 21 Nya alai leboh Tuhan ninga iya ringat,
Nyadi iya nganu sida Jakob enggau api:
Lalu sida Israil mega kena anu iya.
- 22 Olih sida mungkir ari Allah Taala:
Lalu enda arap ka penglepas iya.

- 23 Tang iya mesan moa-hari:
Lalu muka pintu langit.
- 24 Nyadi iya nuang ka Mana, ti di-empa sida:
Lalu mri ka sida pemakai ari serga.
- 25 Samoa sida makai roti malikat:
Iya mri ka sida bekal ti chukup.
- 26 Iya ngasoh ribut ari timor betiup di langit:
Lalu olih kuasa iya, iya mai pansut ribut ari salatan.
- 27 Iya nuang ka lauk datas sida, baka amau tanah:
Enggau burong, baka pasir di tebing tasik.
- 28 Nyadi iya ngelaboh ka nya di tapak langkau sida:
Ngelingi endor sida diau.
- 29 Nya alai sida makai kenyang:
Lalu iya mri ka sida utai ti ka tengok sida.
- 30 Tang sida apin puas tengok ka nya:
Lalu nyawa sida agi makai utai nya,
- 31 Leboh sida kena anu Allah Taala,
Lalu iya munoh sida ti rangka agi:
Lalu ngerusak ka sida Israil ti agi bujang.
- 32 Taja baka nya sida agi bepenyalah:
Lalu enda arap ka kerja besai ti digaga iya.
- 33 Nya alai iya ngambis ka umor sida baka orang ti madam ka seput:
Lalu ngasoh sida takut salama sida idup.
- 34 Leboh iya munoh skeda sida, sida ka nanya ka iya:
Lalu sida pulai, lalu bendar ngiga Allah Taala.
- 35 Nyadi sida ingat ka Allah Taala ti kota-batu sida:
Enggau Petara ti pemadu tinggi, ti penglepas sida.
- 36 Tang sida ngelangkong iya enggau joko:
Lalu bula ka iya enggau mulut sida.
- 37 Tang ati sida enda tentu arap ka iya:
Lalu sida enda ngintu semaia sida enggau iya.
- 38 Tang olih iya sinu ati, iya ngampun penyalah sida, lalu enda munoh sida:
Suah iya enda nganu sida;
Lalu enda ringat soh sida.
- 39 Nyadi iya ingat ka sida ti endang mensia aja:
Sida baka ribut ti mansa lalu nyau.
- 40 Suah amai sida ngelaban iya di menoa puang:
Lalu nusah ka iya di menoa ti sunyi.
- 41 Nyadi sida mungkir laban ati sida enda arap ka Allah Taala:
Lalu sida ngasoh ringat Iya ti Kudus, ti Petara Israil.

- 42 Sida enda ingat ka kuasa iya:
Enda ingat ka timpoh iya ngelepas ka sida ari munsoh.
- 43 Enda sida ingat mega klai ti digaga iya di menoa Misir:
Enggau kerja nyelai di menoa Soan.
- 44 Iya nya batang ai ti di-ubah iya nyadi darah:
Sungai sida mega, lalu nadai bisi ai ti tau di-irup sida.
- 45 Iya ngasoh ngagai sida mayoh kringit ti makai sida:
Enggau engkatak ti nganu sida.
- 46 Iya ngasoh ulat makai utai ti ditanam sida:
Lalu pengawa sida dirusak olih buntak.
- 47 Iya ngerusak kayu anggor sida enggau ujan batu:
Enggau kayu tebilian sida rusak olih ujan batu ti besai.
- 48 Iya ngasoh jelu sida ditinggang ujan batu:
Enggau kaban jelu sida dipangka ka nitar.
- 49 Iya ngasoh sida kena ukum ti besai:
Iya ringat, iya nganu, iya nusah ka sida,
Olih kaban malikat ti ngerusak sida.
- 50 Iya ngaga jalai ti alai iya tau nganu sida:
Lalu iya enggai ngelepas ka samengat sida ari pemat, i,
Tang nyagi sida kena penyakit ti munoh sida.
- 51 Iya munoh samoa anak ti tuai di menoa Misir:
Iya nya sida ti kring, ti dulu ada di rumah sida Ham.
- 52 Tang iya nganjong anembiak iya baka bedus:
Lalu ngulu ka sida di menoa puang baka kaban domba.
- 53 Iya nganjong sida manah-manah, ngambi ka sida enda takut:
Tang munsoh sida lemas di tasik.
- 54 Lalu iya mai sida ngagai menoa iya ti kudus:
Ngagai tanah bukit ti ulih iya enggau kuasa iya.
- 55 Iya muru bansa bukai di moa sida,
Lalu magi ka sida menoa orang nya:
Lalu ngasoh kaban Israil diau di rumah sida.
- 56 Taja baka nya sida enda arap, tang sida ngelaban Allah
Taala ti pemadu tinggi:
Lalu enda niteh ka pesan iya.
- 57 Tang sida mungkir lalu bula ka semai baka aki sida:
Sida limpang ka bukai, sida baka panah ti salah timbak.
- 58 Laban sida nampok di bukit, lalu ngasoh Allah Taala ringat:
Lalu sida nusah ka ati iya, olih engkrama ti digaga sida.
- 59 Leboh Allah Taala ninga nya iya ringat:
Lalu enggai diau enggau sida Israil.

- 60 Nya alai iya ninggal ka rumah grija di Siloh:
Ti diletak ka iya nyadi endor iya diau enggau mensia.
- 61 Nyadi iya nyagi utai, ti tanda pengring iya, di-ambi orang:
Enggau klai mulia iya di-ambi munsoh iya.
- 62 Lalu iya nyagi anembiak iya dibunoh enggau pedang:
Nyadi iya ringat soh sida ti endang enggi iya.
- 63 Sida ti bujang dipakai api:
Nya alai sida ti dara enggai nyanyi, laban sida enda belaki.
- 64 Imam sida dibunoh enggau pedang:
Nyadi nadai indu balu ti ngulit ka sida.
- 65 Udah nya Tuhan angkat baka orang ti baru dani:
Baka orang ti udah ngring ka diri olih ai anggor, lalu manjong.
- 66 Lalu iya mantap munsoh iya ti lari:
Iya ngasoh sida malu belama-lama.
- 67 Nyadi iya enggai diau di rumah Joseph:
Iya enda milih kaban Ipraim.
- 68 Tang iya milih kaban sida Judah:
Bukit Sion ti dikarindu ka iya.
- 69 Iya niri ka kaaba iya baka bukit ti tinggi:
Baka dunya ti digaga iya tetap belama-lama.
- 70 Iya milih Daud anembiak iya:
Lalu ngambi iya ari kandang domba.
- 71 Iya ngambi iya leboh iya niteh ka domba ti indu enggau anak sida:
Awak ka iya tau ngibun Jakob anembiak iya, enggau Israil ti enggi iya.
- 72 Nyadi iya ngibun sida enggau ati ti badas:
Lalu ngiring sida enggau jari ti jimat.

16 HARI BULAN. SAMBIANG PAGI

MASMUR 79

- Orang petang udah datai di menoa ti endang enggi nuan,
Tuhan Allah:
Sida udah ngerusak ka rumah Tuhan ti kudus,
Lalu udah ngeruboh ka nengri Jerusalem.
- 2 Bangkai anembiak Tuhan dibuai nyadi pemakai burong:
Isi sida ti dikarindu ka Tuhan dibuai lalu di-empa jelu kampong.
- 3 Darah sida disiuh ka orang, baka ai, ngelingi Jerusalem:
Nadai orang ti ka numbak ka bangkai sida.

- 4 Kami udah dibantah orang ti diau semak kami:
Sida ti diau ngelingi kami mechat lalu katawa meda kami.
- 5 Kati, pengl lama agi Tuhan ka nganu kami:
Kati, pengringat Tuhan ka mau baka api berari-ari?
- 6 Anang enda nganu orang petang ti enda nemu Tuhan:
Enggau bansa sida ti enda sambiang nelah nama Tuhan.
- 7 Laban sida udah ngambis ka orang Jakob:
Lalu udah ngerusak ka umai sida.
- 8 Anang malas kami tegal penyalah aki ini kami:
Awak ka pengasih Tuhan mentas datai di kami,
Olih kami nyau marinsa bendar.
- 9 Saup kami, awak ka nama nuan tau dipuji, Tuhan Allah ti
pinglepas kami:
Lepas ka kami, lalu ampun penyalah kami, tegal nama
nuan.
- 10 Lapa orang ka bejako, Dini Petara sida:
Asoh orang petang lengkas nemu
Darah anembiak Tuhan ti disiuh udah dibalas Tuhan.
- 11 Awak ka sabak orang ti ditangkap didinga nuan, Tuhan:
Enggau kuasa besai, idup ka sida ti diletak kena bunoh.
- 12 Lalu balas tujuh kali bansa orang nya ti diau nampih
kami:
Olih sida udah bejako mantah nuan, Tuhan.
- 13 Nyadi kami ti anembiak Tuhan, ti domba di padang
Tuhan,
Ka muji Tuhan berari:
Lalu kami ka nusi pemesai kuasa Tuhan ka samoa serak
orang.

MASMUR 80

- DINGA ka kami, Tuhan ti pengibun orang Israil,
Tuhan ti ngulu ka sida Joseph, baka ti ngulu ka kaban
bedus:
Pandang ka kuasa diri, nuan ti duduk di tengah sida
Kerubin.
- 2 Angkat enggau kuasa, Tuhan ti ngulu ka sida Ipraim,
Bejamin enggau Manasi:
Lalu datai ngelepas ka kami.
 - 3 Bai kami pulai ngagai nuan, Tuhan Allah:
Asoh kami meda penampak moa Tuhan, lalu kami ka
idup.
 - 4 Nuan, Tuhan Allah, ti kapala bala serga:
Penglama agi Tuhan ka ringat, lalu enda ninga ka sam-
biang anembiak nuan?

- 5 Tuhan udah ngasoh sida nyabak tiap hari:
Lalu ai mata sida berujan nyampau amai.
- 6 Tuhan udah nyagi orang belaya pasal tanah kami:
Nyadi munsoh kami katawa meda kami.
- 7 Bai kami pulai ngagai nuan, Tuhan Allah, ti kapala bala
serga:
Asoh kami meda penampak moa Tuhan lalu kami ka idup.
- 8 Tuhan udah mai kayu anggor ari menoa Misir:
Tuhan udah muru orang bansa bukai, lalu nanam iya di
menoa sida.
- 9 Tuhan udah mensiang endor ti alai nanam iya:
Lalu iya be-urat dalam, lalu galak di menoa nya.
- 10 Bukit nyau lindong olih daun iya:
Nyadi dan iya besai, baka dan kayu tebilian.
- 11 Kayu nya nambah datai ka tebing tasik:
Lalu iya nyapi datai ka tebing ai.
- 12 Lapa Tuhan udah ngeruntoh ka pagar iya:
Lalu samoa orang ti mansa ngambi buah iya?
- 13 Babi kampong ngerusak ka iya:
Nyadi jelu kampong makai iya.
- 14 Kami minta Tuhan pulai ngagai kami, nuan ti kapala bala
serga:
Tilik ari serga, peda, lalu abas kayu anggor nya.
- 15 Lalu intu kayu nya ti ditanam Tuhan-empu:
Enggau anak kayu ti di-ibun Tuhan datai ka iya besai.
- 16 Kayu anggor nya ditebang nyadi kayu api, lalu ditunu:
Baka nya orang kena rusak leboh Tuhan ringat.
- 17 Intu enggau kuasa orang nya ti endang diprintah Tuhan-
empu:
Enggau anak uchu orang nya ti endang di-ibun Tuhan.
- 18 Lalu kami enggai mungkir:
Idup ka kami, lalu kami ka besambiang nelah nama
Tuhan.
- 19 Bai kami pulai ngagai nuan, Tuhan Allah, ti kapala bala
serga:
Asoh kami meda penampak moa Tuhan, lalu kami ka
idup.

MASMUR 81

- NYANYI enggau nyawa inggar, lalu puji Allah Taala, ti
penyaup kitai:
Begendang lalu puji Allah Taala, ti Petara Jakob.

- 2 Nyanyi masmur, tebah ka dumbak:
Enggau engkratong ti badas enggau engkrebap.
- 3 Sepu trumpit leboh anak bulan:
Leboh bulan kumbong mega, leboh hari besai.
- 4 Laban nya endang adat orang Israil:
Nya endang letak Allah Taala ti Petara Jakob.
- 5 Adat nya ti diletak iya nyadi pengingat ka sida Joseph,
Leboh sida mansang ngelaban orang Misir:
Ti endor kitai ninga jako siko, ti apin dikelala aku,
- 6 Ko iya, Aku ngasoh sida badu ngesan utai brat:
Lalu sida enda agi bekerja enggau bakul.
- 7 Kita ngangau leboh marinsa, lalu aku ngelepas ka kita,
Saut aku didinga kita, munyi guntor ti pansut ari moa-
hari:
Lalu aku nguji kita di ai Meribah.
- 8 Dinga kita ti anemiak aku, lalu aku ka ngajar kita:
Badas amai enti kita orang Israil ka ninga ka aku.
- 9 Anang betuai ka petara ti disembah sida bansa buhai:
Anang nyembah petara ti dipetuai ka sida orang petang.
- 10 Aku tu Allah Taala, Petara kita,
Ti nganjong kita pansut ari menoa Misir:
Perangap ka nyawa kita, lalu aku ka ngasoh kita makai
kenyang.
- 11 Tang anemiak aku enggai ninga ka jako aku:
Lalu orang Israil enggai ngasi ka aku.
- 12 Nya alai aku neju ka sida niteh ka pengras ati diri:
Awak ka sida tau ngaga barang ti ka deka sida.
- 13 Badas amai enti anemiak aku ka ninga ka aku:
Enti orang Israil ka niteh ka jalai aku.
- 14 Enti pia, enda lama da aku ka ngalah ka munsoh sida:
Lalu jari aku ka ngelaban orang ti ngachau sida.
- 15 Orang ti pedis ati soh Tuhan ka datai nunduk ka sida
Israil:
Tang sida Israil ka meruan lantang belama-lama.
- 16 Aku ka mai sida bulih padi ti mayoh bendar:
Lalu ngenyang ka sida enggau ai renyuan di-ambi ari
lubang batu.

16 HARI BULAN. SAMBIANG LEMAI

MASMUR 82

ALLAH Taala bediri megai sida ti digempuru ka iya:
Iya megai pechara di tengah sida ti disuroh iya megai
printah.

- 2 Ko iya, Penglama agi kita ka mutus ka pechara enda
enggau lurus:
Lalu kasih ka orang ti salah?
- 3 Anang enda ngaum ka sida ti lemi, sida ti patu:
Anang enda lurus ngeletak ka sida ti tusah, ti umang.
- 4 Idup ka sida ti lemi, sida ti saranta:
Lepas ka sida ari jari orang ti jai.
- 5 Sida ti megai printah nadai bepenemu, nadai mereti;
Sida enda meda, baka orang ti begama-gama:
Samoa adat menoa nyau kena kachau laban sida.
- 6 Nyadi ko aku, kita ti penyuroh Allah Taala endang baka
Petara:
Samoa kita endang anak Iya ti Pemadu Tinggi.
- 7 Taja baka nya, kita ka mati baka mensia:
Lalu kena rusak baka barang orang buhai ti megai printah.
- 8 Angkat, Tuhan Allah, lalu bechara ka mensia:
Laban nuan, Tuhan, ka bempu samoa bansa mensia.

MASMUR 83

- ANANG enda angkat, Tuhan Allah:
Anang enda bejako, anang diau jenoh meda kami, Tuhan
Allah.
- 2 Laban munsoh Tuhan begau:
Lalu sida ti pedis ati soh Tuhan udah ngangkat ka diri
belaban.
 - 3 Sida baum ngiga akal ngelaban anemiak Tuhan:
Lalu sempekat ngelaban orang ti di-intu Tuhan ari
penusah.
 - 4 Sida bejako, ko sida, Aram kitai ngambis ka bansa sida:
Awak ka nama Israil nadai agi di-ingat ka orang.
 - 5 Nyadi samoa sida ti baum, sa-ati magang:
Sida besemaia enggau diri sama diri ka ngelaban Tuhan.
 - 6 Sida ti belangkau di Idom, enggau sida orang Ismail:
Sida orang Moab enggau sida orang Agar.
 - 7 Sida Gibal enggau Amon enggau Amalik:
Sida di menoa Pilistia, sida ti diau ti nengri Tur.
 - 8 Orang di menoa Asiria bisi enggau sida:
Lalu udah nulong sida Lot.
 - 9 Gaga enggau sida, Tuhan, baka ti enggau sida Midian:
Baka ti enggau Sisera enggau Jabin di ai Kison.
 - 10 Ti ambis mati di nengri Indur:
Bangkai sida nyau but di tanah.

- 11 Gaga orang ti kapala sida, baka pengulu Orib enggau Pengulu Sib:
Lalu gaga orang ti tuai sida, baka rajah Sibah enggau rajah Salmana.
- 12 Laban sida udah bejako, ko sida, Aram kitai ngambi lalu bempu:
Tanah Allah Taala.
- 13 Gaga sida, Tuhan Allah, baka amau tanah ti kebu olih angin:
Baka skau padi ti nyau pambar olih ribut.
- 14 Gaga sida baka api ti makai babas:
Lalu baka daun api ti ngangus ka bukit.
- 15 Baka nya Tuhan ka nyidi sida enggau biobalai:
Lalu nakut ka sida enggau ribut ti balat.
- 16 Asoh moa sida malu:
Awak ka sida tau ngangau nelah nama Tuhan.
- 17 Awak ka sida malu, lalu ambis ati berari:
Awak ka ati sida kachau, lalu sida kena rusak.
- 18 Awak ka sida tau nemu Tuhan, ti benama Allah Taala:
Iya aja ti pepadu tinggi, ti mrintah samoa dunya.

MASMUR 84

- NYAMPAU pemanah rumah Tuhan:
Tuhan ti kapala bala serga.
- 2 Samengat aku tetengok, lalu leलगau ka rumah Tuhan:
Enggau ati, enggau nyawa, aku nyanyi muji Allah Taala,
Petara ti endang idup.
 - 3 Nyadi burong pipit udah nemu ka diri rumah,
Enggau burong lelayang bisi sarangan ti alai ngengkah ka anak iya:
 - 4 Iya nya endor dampih alta nuan, Tuhan ti kapala bala serga:
Tuhan ti Rajah aku, ti Petara aku.
 - 5 Lantang sida ti dikring ka Tuhan:
Ti bisi ati besambiang ngagai Sion.
 - 6 Taja sida nengah lebak kayu menyan ti nadai ai, pengarap sida ngasoh sida lantang baka ti olih lubang ai:
Nyadi leboh musin ujan datai, iya nyadi galak amai.
 - 7 Makin sida mansang bejalai, makin tulang sida kring:
Nyadi samoa sida sampal datai ngosong Allah Talla di Sion.
 - 8 Dinga ka sambiang aku, Tuhan Allah, ti kapala bala serga:
Pending ka aku, nuan ti Petara Jakob.

- 9 Anang enda meda, nuan Allah Taala ti nerabai kami:
Ingat ka iya ti dipilih Tuhan.
- 10 Tentu badas agi kami diau sa-hari di balai Tuhan, ari kami diau sa-ribu hari di endor lain:
Rindu agi aku bediri di pintu rumah Allah Taala,
Ari diau dalam rumah orang ti bepenyalah.
- 11 Laban Tuhan Allah Taala baka matahari, baka trabai:
Tuhan ka mri pengasih enggau basa;
Nadai utai ti enda badas ti dibri iya ka sida ti diau lurus.
- 12 Tuhan Allah ti kapala bala serga:
Beberkat orang nya ti arap ka Tuhan.

MASMUR 85

- NUAN, Tuhan, udah mri pengasih ka menoa Tuhan-empu:
Tuhan udah mai pulai sida Jakob ti kena tangkap.
- 2 Tuhan udah ngampun penyalah anemiak Tuhan:
Tuhan udah muai dosa sida.
 - 3 Tuhan udah badu ringat soh kami:
Tuhan nadai agi nganu kami enggau balat.
 - 4 Bai kami ngagai nuan, nuan Allah Taala ti penglepas kami:
Lalu anang agi ringat soh kami.
 - 5 Kati, Tuhan ka nganu kami berari-ari:
Kati, Tuhan salalu ka ringat datai ka samoa serak mensia?
 - 6 Kati, Tuhan enggai berubah, lalu ngidup ka kami:
Awak ka anemiak Tuhan tau andal ati ngenang Tuhan?
 - 7 Enjok ka kami pengasih nuan, Tuhan:
Lalu asoh kami meda penelap Tuhan.
 - 8 Aku ka ninga ka jako Allah Taala, Petara ti bekuasa:
Laban iya ka bejako pasal selamat enggau anemiak iya,
enggau sida ti dikarindu ka iya;
Tang anang ngasoh sida limpang baru ngagai penyai.
 - 9 Iya tentu salalu dampih sida ti nangi ka iya, awak ka iya tau ngelepas ka sida:
Awak ka mulia iya tau dipeda di menoa kami.
 - 10 Pengasih enggau pemendar sama begulai:
Penglurus enggau selamat mega, baka pangan ti besium,
laban gaga betemu.
 - 11 Penemu ti bendar mansang di dunya:
Lalu penglurus Allah Taala dipandang ka ari serga.
 - 12 Tuhan ka mri utai ti badas:
Nyadi utai ti ditanam kami ka galak.

- 13 Penglurus ka ngulu ka iya:
Lalu ka mai kami niteh ka bekau kaki iya.

17 HARI BULAN. SAMBIANG PAGI

MASMUR 86

- SINGIT ka pending nuan, Tuhan, lalu dinga ka aku:
Laban aku tusah enggau umang.
- 2 Intu samengat aku, laban aku dikarindu ka Tuhan:
Nuan Tuhan, ti Petara aku, idup ka anemiak ti arap ka Tuhan.
- 3 Kasih ka aku, Tuhan:
Laban aku ngangau ka Tuhan besari-sari.
- 4 Asoh anemiak nuan, Tuhan, andal ati:
Laban ati aku berunding ka Tuhan.
- 5 Laban nuan, Tuhan, endang badas, endang ka ngampun penyalah mega:
Nuan, Tuhan, kasih bendar ka samoa sida ti ngangau ka Tuhan.
- 6 Pending ka sambiang aku, Tuhan:
Lalu dinga ka nyawa aku, leboh aku minta utai.
- 7 Leboh aku tusah aku ka ngangau ka Tuhan:
Laban nuan, Tuhan, ka ninga ka aku.
- 8 Nadai petara bukai ti besai agi, enti enda nuan Tuhan:
Nadai kerja mega ti digaga, ti besai agi ari kerja Tuhan.
- 9 Samoa bansa mensia ti digaga Tuhan ka datai nyembah nuan Tuhan:
Lalu sida ka ngemesia ka nama Tuhan.
- 10 Laban Tuhan endang bekuasa, lalu ngaga kerja ti besai:
Nuan, Tuhan, siko aja ti Petara.
- 11 Ajar aku jalai nuan, Tuhan; aku ka niteh ka ajar Tuhan ti bendar:
Saup aku nangi ka Tuhan enggau pengambis ati aku.
- 12 Aku ka muji nuan, Tuhan, ti Petara aku, enggau pengambis ati aku:
Lalu aku ka ngemesai ka nama Tuhan belama-lama:
- 13 Laban pengasih Tuhan enggau aku endang besai:
Nyadi Tuhan udah ngelepas ka samengat aku, enggai ka aku nurun ka sabayan.
- 14 Orang ti sumbong udah angkat ngelaban aku, Tuhan Allah:
Nyadi kaban sida ti mangah udah ngiga jalai munoh aku;
Lalu sida enda iboh ka nuan, Tuhan.

- 15 Tang nuan, Tuhan, endang Petara ti sinu ati, ti kasih ka orang:
Tuhan enda jampat ringat tang kasih amai, lalu jako Tuhan endang bendar.
- 16 Malik soh aku, Tuhan, lalu kasih ka aku:
Kring ka anemiak nuan, Tuhan,
Lalu idup ka anemiak nuan, Tuhan.
- 17 Bri ka aku klai, ti nentu ka Tuhan rindu ka aku:
Awak ka sida ti pedis ati soh aku tau malu, leboh sida meda Tuhan udah nyaup aku, udah ngelantang ka aku mega.

MASMUR 87

- TUHAN rindu ka nengri ti di-aroh ka iya datas bukit ti kudus:
Iya rindu ka nengri Sion, lebih agi ari samoa nengri sida Jakob.
- 2 Utai badas ditusi pasal nuan:
Nuan ti nengri Allah Taala.
- 3 Aku ka ngerunding sida orang Misir enggau sida orang Babilon, sabaka enggau sida ti endang ngaku aku, ko Allah Taala:
Peda sida orang Pilistia enggau sida orang Tur, enggau sida orang Itiopia:
Samoa sida nya baka orang ti endang ada di menoa nya
- 4 Leboh orang nusi pasal Sion, ko sida, Orang bansa tu, orang bansa nya sama ada dia:
Nyadi Iya ti Pemadu Tinggi ka ngring ka adat nengri nya.
- 5 Ko jako Tuhan leboh iya niap, leboh iya nulis nama bansa orang:
Bansa tu ti ada dia.
- 6 Nyadi sida ti nyanyi, ti betanda, ka nyebut, ko sida:
Nuan nengri ti pun pengidup kami.

MASMUR 88

- TUHAN, Petara ti ngelepas ka aku:
Siang malam aku udah ngangau ka Tuhan.
- 2 Awak ka sambiang aku datai di Tuhan:
Pending ka kangau aku.
- 3 Laban ati aku tusah amai:
Nyadi samengat aku nyau ka datai di sabayan.
- 4 Aku dirunding orang baka ti udah mati, baka sida ti ditumbak di pendam:
Aku baka orang ti nadai penyaup agi.

- 5 Aku dibuai begulai enggau bangkai orang ti mati,
Aku baka sida ti dibunoh, ti ditumbak di pendam:
Ti enda agi di-ingat ka Tuhan,
Ti enda agi di-intu jari Tuhan.
- 6 Tuhan udah ngengkah ka aku di lubang kebong ti pemadu
dalam:
Di endor ti petang, di tasik dalam.
- 7 Anu Tuhan ninggang aku:
Nyadi Tuhan nusah ka aku enggau glumbang ti besai.
- 8 Tuhan udah nyeliah ka pangan jauh ari aku;
Tuhan udah nyuroh aku dipegedi ka sida:
Aku kena tutup, lalu enda tau pansut.
- 9 Mata aku nyau rabun olih penyakit:
Besari-sari aku ngangau ka nuan, Tuhan;
Aku udah ngunyor ka jari besambiang ngagai Tuhan.
- 10 Kati, Tuhan tau mandang ka kerja besai ngagai orang ti
udah mati:
Kati, sida ti nyau parai tau angkat lalu muji Tuhan?
- 11 Kati, bangkai orang di pendam tau nusi pengasih Tuhan:
Tau ka sida ti kena rusak di sabayan tau nusi pemendar
Tuhan?
- 12 Kati, kerja Tuhan ti besai tau ditemu di endor ti petang:
Tau ka penglurus Tuhan ditemu di endor orang nadai agi
ingat ka utai?
- 13 Tang aku tu, Tuhan, udah ngangau ka Tuhan:
Nyadi pagi hari sambiang aku datai di Tuhan.
- 14 Lapa nuan, Tuhan, muru samengat aku:
Lapa nuan, Tuhan, belalai lalu enggai malik soh aku?
- 15 Kenyau ari aku ti agi biak aku tusah, aku nyau ka mati:
Aku udah nat ka diri diparinsa ka Tuhan datai ka ati aku
nyau runtoh.
- 16 Pengingat Tuhan ti balat, baka ai ti ngelemas ka aku:
Aku nyau ka mati diparinsa ka Tuhan.
- 17 Pamarinsa nya baka ai ti ngelulong aku besari-sari:
Lalu samoa macham penusah ngelingi aku.
- 18 Tuhan udah mindah ka sida ti rindu ka aku, enggau
pangan aku jauh ari aku:
Lalu sida ti ngelala aku nadai agi dipeda aku olih petang.

17 HARI BULAN. SAMBIANG LEMAI

MASMUR 89

AKU nyanyi pasal pengasih Tuhan berari-ari:

- Enggau mulut, aku ka nusi pemendar Tuhan ngagai
samoa serak mensia.
- 2 Nyadi ko aku, Pengasih ka nambah-menambah belama-
lama:
Tuhan udah nentu ka pemendar iya di serga.
- 3 Aku udah besanggup enggau iya ti dipilih aku:
Aku udah besemaia enggau Daud, anembiak aku.
- 4 Aku ka ngring ka anak uchu nuan belama-lama:
Lalu aku ka netap ka printah nuan datai ka samoa serak
orang.
- 5 Nyadi samoa sida di serga ka muji kerja besai ti digaga
nuan, Tuhan:
Pemendar nuan mega ka dipuji samoa kaban sida orang ti
tuchi.
- 6 Sapa ti di serga ti tau dipebanding enggau Tuhan:
Dini anak Allah Taala ti sabaka enggau Tuhan?
- 7 Iya nya Petara ti ditakut ka samoa kaban sida orang ti
tuchi:
Lalu dikanangi ka, lebih agi ari samoa sida ti begulai
enggau iya.
- 8 Nuan, Tuhan, Allah Taala ti kapala bala serga,
Sapa ti bekuasa baka nuan, Tuhan Allah:
Nyadi Tuhan endang bendar, endang tau dikarap ka
orang.
- 9 Tuhan ti mrintah glumbang di tasik:
Leboh lelangan nyau nyadi, Tuhan ti nedoh ka iya.
- 10 Tuhan ti udah ngalah ka sida orang Misir, lalu sida nyadi
baka orang ti mati:
Enggau lengan ti kring, nuan, Tuhan, udah mambar ka
munsoh Tuhan.
- 11 Tuhan ti bempu langit, Tuhan ti bempu dunya mega:
Tuhan ti udah ngaga bumi enggau samoa isi iya.
- 12 Menoa utara enggau menoa salatan digaga Tuhan:
Bukit Tabor enggau bukit Hermon andal nusi nama
Tuhan.
- 13 Lengan Tuhan endang bekuasa:
Jari Tuhan kring, lalu jari kanan Tuhan bekuasa.
- 14 Ator enggau ukum ti diletak printah Tuhan endang lurus:
Pengasih enggau pemendar endang bisi enggau Tuhan.
- 15 Beberkat orang nya ti salalu ninga munyi pengandal:
Sida diau dalam penampak ti datai ari nuan, Tuhan.
- 16 Sida andal besari-sari, olih sida nemu nama Tuhan:
Nyadi sida nyadi besai, olih penglurus Tuhan.

- 17 Laban Tuhan ti pengring sida, ti dipuji sida:
Nyadi enggau penelap, Tuhan ka ninggi ka kuasa kami.
- 18 Laban trabai kami endang dibri Tuhan:
Nyadi rajah kami endang anembiak Tuhan ti kudus, ti Petara Israil.
- 19 Dulu kalia Tuhan pegari di orang ti dikarindu ka Tuhan, lalu bejako enggau sida:
Ko Tuhan, Aku udah mri ka iya ti kring kuasa nyaup orang,
Aku udah ngangkat ka siko ti dipilih aku ari orang mayoh.
- 20 Aku udah ngiga lalu nemu Daud, anembiak aku:
Aku udah merkat ka iya, olih ngunsut iya enggau minyak ti kudus.
- 21 Jari aku ka nyaup iya berari:
Nyadi lengan aku ka ngring ka iya.
- 22 Munsoh iya nadai tau nganu iya:
Lalu sida ti jai nadai tau nusah ka iya.
- 23 Tang aku ka ngalah ka munsoh iya:
Lalu nganu sida ti pedis ati soh iya.
- 24 Nyadi pemendar enggau pengasih aku ka meruan enggau iya:
Lalu olih iya arap ka nama aku, kuasa iya ka besai.
- 25 Jari iya ka megai perintah datai ka tasik:
Lalu jari kanan iya datai ka batang ai.
- 26 Iya ka ngangau ka aku, ko iya, Tuhan ti Apai aku:
Tuhan ti Petara aku, ti baka batu ti ninding aku, ti pinglepas aku.
- 27 Nyadi aku ka ngeletak iya nyadi anak tuai aku:
Besai agi ari samoa rajah di dunya tu.
- 28 Pengasih aku ka ngintu iya belama-lama:
Nyadi semaia ti digaga aku enggau iya, ka bendar di-amai ka aku berari.
- 29 Turun-menurun iya ka mengkang belama-lama:
Nyadi perintah iya ka meruan berari, salama bisi langit.
- 30 Enti anak uchu iya muai adat aku:
Lalu enda niteh ka letak aku,
- 31 Enti sida mungkir lalu enda nunduk ka ator aku:
Lalu enda ngintu pesan aku,
- 32 Aku ka ngelunsin sida tegal penyalah sida:
Lalu nyipat sida tegal penyai sida.
- 33 Tang aku enda badu kasih ka iya:
Nyadi pemendar aku ka meruan enggau iya,
- 34 Aku enggai mungkir ka semaia aku:
Aku enggai ngubah ka jako aku.

- 35 Utai siti udah disanggup aku, lalu aku enggai salah:
Aku enggai bula enggau Daud.
- 36 Turun-menurun iya ka mengkang belama-lama:
Lalu perintah iya ka meruan berari-ari baka matahari.
- 37 Iya ka meruan berari baka bulan:
Baka saksi di langit ti endang tau dikarap ka.
- 38 Tang nuan, Tuhan, udah muai anembiak nuan, lalu udah enggai ka iya:
Tuhan udah nganu anembiak ti diberkat ka Tuhan.
- 39 Tuhan enda ngamai ka semaia enggau anembiak Tuhan:
Tuhan udah ngempas ka makota iya di tanah.
- 40 Tuhan udah ngeruntoh ka samoa pagar anembiak iya:
Lalu udah ngeruboh ka samoa kota iya.
- 41 Samoa orang ti mansa nengah jalai nya ngerampas utai iya:
Lalu sida bansa orang ti ngelingi iya mechat iya.
- 42 Tuhan udah ngemesai ka kuasa munsoh iya:
Lalu udah ngandal ka ati samoa sida ti ngelaban iya.
- 43 Tuhan udah bekalih ka mata pedang iya awak ka iya alah:
Lalu enda ngring ka iya, awak ka iya enda tan leboh beprang.
- 44 Tuhan udah madam ka penampak nama iya:
Lalu udah ngerusak ka kuasa perintah iya.
- 45 Tuhan ngasoh iya jampat tuai:
Lalu nyuroh iya malu amai.
- 46 Kati, penglama agi Tuhan ka ngelalai ka diri:
Kati, pengringat Tuhan ka mau baka api berari-ari?
- 47 Ingat ka pementas pematu aku:
Tuhan udah ngaga samoa mensia baka utai ti ngapa.
- 48 Orang ni ti kring, ti tau idup berari, lalu enda mati:
Orang ni ti tau ngelepas ka samengat diri enggai ka iya tama sabayan?
- 49 Tuhan, dini pengasih nuan ti kalia:
Ti disemaia Tuhan mri ka Daud, olih pemendar Tuhan?
- 50 Tuhan, anang enda ingat ka pemalu anembiak Tuhan:
Ingat ka ati aku ti tusah nanggong pemalu orang mayoh.
- 51 Iya nya jako ti enggau munsoh mechat kami, Tuhan:
Ti enggau sida niteh ka anembiak ti diberkat ka Tuhan, lalu mantah iya.
- 52 Puji ka Tuhan belama-lama:
Amin. Amin.

18 HARI BULAN. SAMBIANG PAGI

MASMUR 90

- ENGGAU nuan, Tuhan, bisi endor diau:
Tiap serak orang pen tau diau enggau Tuhan.
- 2 Apin bukit nyadi,
Apin Tuhan ngaga tanah enggau bumi:
Tuhan endang Petara, ari trubah-rubah datai ka belama-
lama.
- 3 Tuhan mulai ka mensia nyadi amau tanah:
Ko Tuhan, Pulai kita anak mensia.
- 4 Laban sa-ribu taun dirunding Tuhan asai ti kemari, udah
iya nyau:
Amai, asai ti sa-jam leboh orang tindok malam.
- 5 Mensia ditaban Tuhan, baka ti di-anyut ai bah; sida nyau
baka orang ti tindok:
Tumu pagi sida baka rumput ti baru tumbuh.
- 6 Pagi hari iya tumbuh lalu galak:
Lemai hari iya ditebas lalu layu.
- 7 Laban kami nyau ambis leboh kena anu Tuhan:
Nyadi kami tusah leboh Tuhan ringat.
- 8 Tuhan udah ngengkah ka penyalah kami di moa Tuhan:
Lalu penyalah kami ti digaga belalai udah ditrang ka olih
penampak moa Tuhan.
- 9 Laban timpoh kami nyau tembu, leboh Tuhan nganu:
Nyadi umor kami jampat nyau, baka seput.
- 10 Pemanjai umor kami tujuh-puluh taun,
Enti orang kring tau datai ka lapan-puluh taun:
Nyadi tuai ti tengok ka mensia sigi ngasoh lelak enggau
tusah;
Laban iya jampat ambis, lalu kami udah nyau.
- 11 Sapa ti tau nemu kuasa ti enggau Tuhan tau nganu:
Enggau pengringat mega, ti alai orang takut ka Tuhan?
- 12 Nya alai saup kami ngingat ka pemanjai umor kami:
Awak ka ati kami mansang bulih penemu.
- 13 Pulai baru ngagai aku, Tuhan; penglamma agi aku tusah:
Anang enda berubah, lalu kasih ka anembiak nuan,
Tuhan.
- 14 Pagi-pagi anang enda ngelantang ka kami enggau pengasih
nuan, Tuhan:
Awak ka kami tau andal lalu gaga salama kami idup.
- 15 Asoh ati kami andal sapenglamma Tuhan udah medis ka kami:
Sapenglamma kami udah marinsa.

- 16 Pandang ka kerja nuan ngagai anembiak nuan, Tuhan:
Enggau mulia Tuhan ngagai anak kami.
- 17 Awak ka pemadas Tuhan ti Petara kami meruan enggau kami,
Lalu ngring ka kerja jari kami:
Anang enda ngring ka kerja ti digaga jari kami, Tuhan.

MASMUR 91

- ORANG ti diau di endor Iya ti Pemadu Tinggi:
Ka meruan dalamibun Iya ti Pemadu Bekuasa.
- 2 Aku ka bejako pasal Tuhan, ko aku, Iya ti peninding aku,
iya ti kota aku:
Iya ti Petara aku, ti dikarap ka aku.
- 3 Laban iya ti ka ngelepas ka nuan ari jarin orang ti ngasu:
Ari penyakit ti nganu mega.
- 4 Iya ka ngelindong nuan, baka burong ti ngelindong ka
anak iya enggau sayap;
Nyadi nuan ka belalai dibaroh sayap iya:
Pemendar iya nyadi trabai enggau dinding nuan.
- 5 Enda nuan ka takut ka utai ti tau nganu malam hari:
Tau ka laja ti ditimbak siang hari.
- 6 Enda nuan ka takut ka penyakit ti datai malam hari:
Tau ka utai ti ngerusak tengah hari.
- 7 Taja sa-ribu orang kena rampit besindi nuan;
Enggau sapuluh ribu puak ka kanan nuan:
Nadai penyakit nya ka datai di nuan.
- 8 Tang enggau mata nuanempu nuan ka merening:
Lalu meda ukum sida ti jai.
- 9 Laban ko jako nuan, Tuhan ti peninding aku:
Nya alai nuan udah diau enggau Iya ti Pemadu Tinggi.
- 10 Nadai penyai ti tau nganu nuan:
Nadai penyakit ti tau datai di rumah nuan.
- 11 Laban iya ka ngasoh malikat iya ngintu nuan:
Lalu sida ka ninding nuan sabarang endor nuan bejalai.
- 12 Sida ka nyangga nuan enggau jari sida:
Enggai ka kaki nuan terempas di batu.
- 13 Nuan tau ngindik jelu singa enggau tedong:
Anak singa enggau ular ka di-indik nuan.
- 14 Ko Allah Taala, Laban iya rindu lalu bepanggai di aku,
nya alai aku ka ngelepas ka iya:
Lalu aku ka angkat ka iya laban iya bebasa ka nama aku.
- 15 Iya ka ngangau ka aku, lalu aku ka nyaut iya;
Nadai aku ka ninggal ka iya leboh iya tusah:
Aku ka ngelepas ka iya, lalu ngemesai ka iya.

- 16 Enggau umur ti panjai, aku ka ngelantang ka iya:
Lalu aku ka ngasoh iya meda penglepas aku.

MASMUR 92

- ENDANG patut orang mri puji ka Tuhan:
Lalu nyanyi masmur muji nama nuan,
Tuhan ti Pemadu Tinggi.
- 2 Awak ka orang nusi pengasih Tuhan genap pagi:
Enggau pemendar Tuhan tiap malam.
- 3 Enggau blikan ti betali sapuluh, enggau engkrebap mega:
Enggau lagu orang ti nebah engkratong.
- 4 Laban nuan, Tuhan, udah ngandal ka ati aku enggau utai
ti digaga Tuhan:
Aku ka gaga laban kerja nuan, Tuhan.
- 5 Nyampau pemesai kerja nuan, Tuhan:
Pragam Tuhan dalam bendar.
- 6 Orang ti berunding ka utai dunya tu aja enda tau nemu:
Nyadi orang ti agu enda tau mereti utai nya.
- 7 Leboh orang ti bepenyalah nyau lantang, baka rumput ti
galak;
Leboh sida ti ngerja penyai nyau betambah:
Tu kabuah nya, awak ka sida tau kena pengrusak belama-
lama.
- 8 Tang nuan, Tuhan, endang Allah Taala:
Tuhan ti megai printah belama-lama.
- 9 Laban, peda munsoh nuan Tuhan,
Peda munsoh Tuhan nyau rusak:
Lalu samoa sida ti ngerja penyai nyau pambar.
- 10 Tang Tuhan udah ngemesai ka kuasa aku, awak ka nyadi
kring baka tandok krebau:
Aku nyau kring, baka orang ti di-unsut enggau minyak ti
baru digaga.
- 11 Nyadi mata aku udah meda munsoh nyau alah:
Lalu pending aku udah ninga pasal sida ti angkat ngelaban
aku, ti udah kena ukum.
- 12 Orang ti lurus ka lantang, baka kayu nyiur ti galak:
Iya ka mansang besai baka kayu tras di bukit Libanun.
- 13 Sida baka kayu ti ditanam ngelingi rumah Tuhan:
Ti galak di padang Allah Taala, Petara kami;
- 14 Uдах iya nyau tuai, iya agi ka bebuah:
Agi ka bisi ai dalam iya, daun iya agi ka chelum.
- 15 Awak ka mandang ka penglurus Tuhan:
Iya ti kota aku, lalu nadai bisi penyai enggau iya.

18 HARI BULAN. SAMBIANG LEMAI

MASMUR 93

- TUHAN ti udah megai printah; iya udah masok ka gari ti
manah;
Tuhan udah bengepan; pengring iya baka belulang ti
melit punggong iya:
Ator dunya udah tetap, iya enda tau berubah.
- 2 Printah Tuhan endang tetap ari kalia:
Ari trubah-rubah Tuhan endang bisi.
- 3 Ai ti bah nyau berauh, Tuhan,
Sungai ti bah nyau beguru-guru:
Ai ti besai nyau bebakat.
- 4 Tuhan ti di serga endang pemadu besai:
Besai agi ari ai ti bah, ti berauh,
Besai agi ari glumbang tasik.
- 5 Adat Tuhan endang tentu:
Rumah nuan, Tuhan, endang ka meruan kudus
Datai ka belama-lama iya.

MASMUR 94

- TUHAN endang Petara ti bisi kuasa ngukum orang:
Tuhan endang Petara ti bisi kuasa ngukum orang; pan-
dang ka diri, Tuhan.
- 2 Angkat ka diri, Tuhan, ti bechara ka samoa mensia:
Balas orang ti sumbong ati, baka ti patut sida dibalas.
- 3 Tuhan, kati, penglama agi orang ti jai tau menang:
Kati, penglama agi orang ti jai enda ulih di-alah ka?
- 4 Kati, penglama agi sida ka bejako mansut ka jako sum-
bong:
Lalu samoa sida ti ngerja penyai ngemesai ka diri mega?
- 5 Sida marinsa ka anembiak nuan, Tuhan:
Lalu ngerusak ka pesaka Tuhan.
- 6 Sida munoh indu ti balu enggau orang temuai:
Anak patu mega dibunoh sida.
- 7 Nyadi ko sida, Tuhan enda meda kami:
Allah Taala, ti Petara Jakob enda berunding ka pengawa
kami.
- 8 Berunding, samoa kita ti nadai penemu:
Kita ti bli, kamaia kita ka mereti?
- 9 Iya ti ngaga pending orang; kati, enda ka iya tau ninga:
Iya ti ngaga mata orang; kati, enda ka iya tau meda?

- 10 Iya ti ngajar samoa bansa mensia; kati enda ka iya tau ngukum orang:
Iya ti mri penemu ka mensia; kati iyaempu nadai penemu?
- 11 Tuhan nemu pragam mensia:
Nemu mega nya baka utai ngapa.
- 12 Untong orang ti dirara nuan, Tuhan:
Ti di-ajar pasal adat Tuhan.
- 13 Awak ka Tuhan mri ka iya ati ti enda kachau maia penusah:
Datai ka orang ti jai ditangkap olih panjok ti disedia ka sida.
- 14 Laban Tuhan enggai muai anembiak iya:
Iya enggai ninggal ka pesaka iya.
- 15 Kra, orang ka berubah, lalu bechara enggau lurus:
Nyadi samoa sida ti lurus ati ka niteh ka adat nya.
- 16 Sapa ti ka angkat lalu ngring ka aku ngelaban sida ti bepenyalah:
Sapa ti ka berdiri enggau aku ngelaban sida ti ngerja penyai?
- 17 Enti Tuhan enda nyaup aku:
Enda lama alai samengat aku nyau ka sabayan.
- 18 Leboh aku bejako, ko aku, Kaki aku udah teklinchir:
Pengasih nuan, Tuhan, ti nyangga aku.
- 19 Taja ati aku dalam nyin kachau olih pragam mayoh macham:
Samengat aku andal dikelantang ka Tuhan.
- 20 Kati, sida ti jai, ti megai pechara, tau saum enggau Tuhan:
Sida nya ti ngeletak adat ti nganu orang?
- 21 Sida besempetak ka munoh orang ti lurus:
Lalu ngeletak orang ti nadai penyalah kena bunoh.
- 22 Tang Tuhan ka nyadi baka misgit ti tinggi ka aku:
Nyadi Allah Taala, ti Petara aku, ka nyadi kubau-batu ka aku.
- 23 Iya ka ngasoh penyalah orang ninggang sidaempu;
Lalu iya ka ngasoh sida kena bunoh tegal penyai sidaempu:
Tuhan Allah, ti Petara kami, ka ngasoh sida kena bunoh.

19 HARI BULAN. SAMBIANG PAGI

MASMUR 95

Aram kitai nyanyi ka Tuhan:
Lalu manjong muji kuasa penglepas kitai.

- 2 Aram kitai ngadap iya enggau masmur:
Lalu nyanyi ka iya enggau puji:
- 3 Laban Tuhan endang Petara ti besai:
Iya Rajah ti besai, ti ari atas samoa petara.
- 4 Jari iya megai samoa darong bumi:
Nyadi iya ti bempu samoa bukit ti tinggi.
- 5 Iya ti bempu tasik, laban nya digaga iya:
Jari iya mega, ti ngaga samoa tanah.
- 6 Aram kitai nyembah iya, lalu nyungkor ka diri:
Lalu besugang di moa Tuhan, ti ngaga kitai.
- 7 Laban iya ti Petara kitai;
Nyadi kitai ti anembiak ti di-ibun iya, baka kaban domba ti di-intu iya:
Badas amai enti kitai ngasi ka nyawa iya sa-hari-tu.
- 8 Anang ngras ka ati diri, baka orang ti di Meribah:
Baka ti digaga orang di Masah, di menoa sunyi.
- 9 Leboh aki ini kita ngiroh aku:
Sida nentu ka aku, lalu meda kerja ti digaga aku.
- 10 Empat-puloh taun aku tusah olih serak orang nya:
Nyadi ko aku, Sida tu ti tesat ati,
Sida enda ngelala jalai aku.
- 11 Nya alai leboh aku ringat, aku besemaia:
Tentu sida nadai tau bulih penyamai di menoa aku.

MASMUR 96

- NYANYI ka Tuhan pantun ti baru:
Nyanyi ka Tuhan, samoa kita di dunya.
- 2 Nyanyi ka Tuhan, puji nama iya:
Tiap hari tusi brita pasal iya ti ka ngelepas ka orang.
- 3 Padah ka pemesai iya ngagai samoa bansa mensia:
Enggau kerja nyelai iya ngaga samoa mensia.
- 4 Laban Tuhan endang besai, iya patut bendar dipuji orang:
Iya patut dikenangi ka, lebih agi ari petara buhai.
- 5 Laban samoa petara orang petang mina utai ngapa aja:
Tang Tuhan ti ngaga langit.
- 6 Basa enggau kuasa endang sigi enggau iya:
Pengring enggau pemanah meruan di rumah iya.
- 7 Tusi pasal Tuhan, samoa kita kaban orang:
Puji iya tegal pemesai enggau pengring iya.
- 8 Tusi pasal pemesai nama Tuhan:
Datai, lalu mai piring ngagai rumah iya.
- 9 Sembah Tuhan lalu ngena gari ti kudus:
Takut ka iya, samoa kita di dunya.

- 10 Padah ka samoa mensia Tuhan ti megai perintah:
Dunya mega tetap olih iya, lalu nadai tau beguyat:
Tuhan ka bechara ka orang enggau lurus.
- 11 Awak ka langit andal lalu dunya gaga:
Awak ka tasik enggau samoa utai dalam iya berauh;
- 12 Awak ka padang enggau samoa utai di iya andal:
Lalu samoa kayu kampong ka nyanyi lalu gaga.
- 13 Utai nya ka nyanyi di moa Tuhan, olih iya datai;
Iya datai ka bechara ka mensia:
Iya ka bechara ka dunya enggau lurus,
Ka samoa bansa mensia enggau bendar.

MASMUR 97

- TUHAN ti megai perintah. Awak ka dunya andal:
Awak ka samoa pulau gaga mega.
- 2 Remang enggau petang ngelingi Tuhan:
Perintah iya endang lurus, ukum iya endang ngena.
- 3 Bisi api ti mau di moa iya:
Lalu ngangus munsoh iya kiba kanan.
- 4 Kilat iya nampak ka dunya:
Orang meda lalu geta-getar.
- 5 Bukit anchur di moa Tuhan, baka lilin lela;
Iya anchur di moa Tuhan, ti mrintah samoa dunya.
- 6 Langit udah nusi penglurus iya:
Nyadi samoa mensia udah meda mulia iya.
- 7 Samoa orang ti nyembah beralah ka malu,
Sida ti ngemesai ka diri nyembah petara ngapa:
Sembah Tuhan, samoa kita petara.
- 8 Nengri Sion ninga rita lalu andal:
Nyadi anak uchu Judah gaga;
Olih pechara ti diputus ka nuan, Tuhan.
- 9 Laban nuan, Tuhan, ti pemadu tinggi ari samoa utai di
dunya:
Nuan, Tuhan, tinggi agi ari samoa petara orang petang.
- 10 Kita ti rindu ka Tuhan, anang enda begedi ka utai jai:
Tuhan ti ngintu samangat anembiak ti dikarindu ka
iya;
Iya ngelepas ka sida ari jari orang ti jai.
- 11 Tuhan nungkun ka api ti nerang ka orang ti lurus:
Nyadi orang ti badas ati andal samoa.
- 12 Gaga kita ti lurus, olih kita arap ka Tuhan:
Lalu bri puji, ngenang nama iya ti kudus.

19 HARI BULAN. SAMBIANG LEMAI

MASMUR 98

- NYANYI ka Tuhan pantun ti baru;
Kra, iya udah ngaga kerja ti nyelai:
Jari kanan iyaempu enggau lengan iya ti kudus udah mai
iya menang.
- 2 Tuhan udah madah ka diri ka ngelepas ka orang:
Iya udah mandang ka penglurus iya ngagai samoa bansa
mensia.
- 3 Iya udah ingat ka pengasih enggau pemendar iya enggau
sida orang Israil:
Orang ti di punggung bumi udah meda kuasa Allah Taala,
Petara kitai ti ngelepas ka orang.
- 4 Panjong lalu puji Allah Taala, samoa kita ti di dunya:
Nyanyi lalu gaga lalu bri puji.
- 5 Bri puji ka Tuhan enggau engkratong:
Enggau engkratong enggau lagu ti manah.
- 6 Enggau suling enggau ensrunai:
Enggau munyi orang ti gaga, puji Tuhan ti Rajah.
- 7 Awak ka tasik enggau samoa utai dalam iya berauh:
Dunya enggau samoa orang ti diau dalam iya.
- 8 Awak ka ai beguru-guru, munyi orang ti betempap jari:
Awak ka bukit nyanyi lalu gaga.
- 9 Gaga baka nya di moa Tuhan, olih iya datai bechara ka
mensia:
Iya ka bechara ka dunya enggau lurus,
Ka samoa bansa mensia enggau ator ti ngena.

MASMUR 99

- TUHAN ti megai perintah; samoa bansa mensia takut:
Iya duduk dikelingi malikat; dunya nyau beguyat.
- 2 Tuhan endang besai di nengri Sion:
Iya megai perintah atas samoa bansa mensia.
- 3 Awak ka orang muji nama Tuhan ti besai, ti patut
dikanangi ka:
Tuhan ti endang kudus.
- 4 Tuhan ti endang kring, ti Rajah mega, ti rindu ngeletak
ukum ti lurus:
Tuhan ti udah ngring ka ator ti ngena;
Tuhan ti mutus ka pechara enggau lurus ka sida orang
Jakob.

- 5 Kemesai ka Tuhan, ti Petara kitai,
Lalu nyungkor ka diri di kaki iya:
Tuhan ti endang kudus.
- 6 Musa enggau Aron ti imam iya,
Enggau Samuel ti siko sida ti ngangau nyebut nama iya:
Sida nya ngangau ka Tuhan, lalu iya ninga ka sida.
- 7 Iya bejako enggau sida ari remang:
Sida ngintu pesan iya, enggau adat ti diletak iya ka sida.
- 8 Nuan, Tuhan, Petara kami ti nyaut sida:
Nuan, Tuhan, Petara ti ngampun sida
Taja nuan ngukum penyalah sida.
- 9 Kemesai ka Tuhan, ti Petara kitai,
Lalu besembah di bukit iya ti kudus:
Laban Tuhan ti Petara kitai, ti endang kudus.

MASMUR 100

- PANJONG, puji Tuhan:
Samoa kita di dunya.
- 2 Betuai ka Tuhan enggau gaga:
Ngadap iya enggau nyanyi.
 - 3 Temu olih kita, Tuhan ti endang Petara:
Iya ti udah ngaga kitai, nyadi kitai endang enggi iya;
Kitai ti anembiak iya, kaban domba ti ditupi iya.
 - 4 Tama ka pintu iya enggau puji;
Kadalam balai iya enggau nyanyi:
Bri puji ka iya lalu ngenang nama iya.
 - 5 Laban Tuhan ti endang badas; pengasih iya meruan
berari:
Lalu pemendar iya datai ka serak turun-menurun.

MASMUR 101

- AKU ka nyanyi pasal pengasih enggau pechara ti lurus:
Aku ka nyanyi muji nuan, Tuhan.
- 2 Enggau ati ti bendar, aku ka ngator pendiau diri enggau
penyimat:
Kamaia nuan, Tuhan, ka datai ngosong aku?
Indah ka dalam rumah akuempu aku ka ngator pendiau
diri enggau ati ti tuchi bendar.
 - 3 Aku enggai ngemata ka utai ngapa:
Aku begedi ka kerja sida ti jai;
Aku enggai ka iya meruan enggau aku.
 - 4 Ati ti manchal ka dibuai aku:
Aku enggai ka kerja ti jai.

- 5 Iya ti betenah ka pangan diri, ka dirusak ka aku
Aku enggai ka orang sumbong ti bisi ati besai.
- 6 Aku ka ngemata ka orang ti lurus ati di menoa aku, awak
ka mai sida begulai enggau aku:
Iya ti diau tuchi ka nyadi anembiak aku.
- 7 Orang pengakal nadai tau diau di rumah aku:
Iya ti bejako bula nadai tau begulai enggau aku.
- 8 Genap pagi aku ka muru sida ti jai di menoa tu:
Awak ka ngambis ka sida ti ngerja penyai di nengri Tuhan.

20 HARI BULAN. SAMBIANG PAGI

MASMUR 102

- DINGA ka sambiang aku, Tuhan:
Awak ka kangau aku datai di Tuhan.
- 2 Anang enda malik ngagai aku leboh aku tusah;
Pending ka aku:
Jampat saut aku leboh aku ngangau.
 - 3 Laban umor aku nyau ambis, baka asap ti ayap:
Nyadi tulang aku asai ti baka lumpung kayu ti dipakai api.
 - 4 Ati aku asai baka rumput ti layu laban panas:
Nyadi ati aku nadai iboh ka makai.
 - 5 Olih nyawa aku enda badu bedemoh:
Tulang aku nyau bekerampit enggau kulit aku.
 - 6 Aku baka burong raya ti linggar diau di menoa sunyi:
Aku baka burong pok ti diau di temawai.
 - 7 Aku bejaga lalu runggu:
Baka burong tekalau ti inggap di prabong rumah.
 - 8 Munsoh aku beduan aku besari-sari:
Sida ti kras ngelaban. aku bejai aku, ngena nama aku
nyumpah orang.
 - 9 Nyadi dalam penusah aku, aku udah makai amau, baka
orang makai roti:
Lalu ai mata aku neritik utai ti di-empa aku.
 - 10 Olih Tuhan ringat, olih Tuhan nganu:
Nya alai Tuhan udah ngambi aku lalu muai aku.
 - 11 Umor aku baka kelemayang ti nyau ka ayas:
Nyadi aku baka rumput ti layu.
 - 12 Tang nuan, Tuhan, endang ka meruan:
Lalu samoa serak orang ka ngingat ka Tuhan.
 - 13 Tuhan ka angkat, lalu ka kasih ka sida ti di nengri Sion:
Laban endang timpoh sida dikasih ka, lalu timpoh ti
diletak udah datai.

- 14 Laban anembiak Tuhan rindu ka batu ti tinggal udah nengri nya kena rusak:
Nyadi sida sinu ati meda tugong uras dia.
- 15 Nyadi samoa bansa mensia ka takut ka nama Tuhan:
Enggau samoa rajah dunya ka nangi ka pemesai Tuhan.
- 16 Laban Tuhan udah niri ka baru nengri Sion:
Iya udah pegari enggau mulia iya.
- 17 Iya udah ninga ka sambiang sida ti umang:
Lalu udah mending ka sampi sida.
- 18 Rita tu ka ditulis lalu dibacha serak orang ti ka datai:
Nyadi bansa mensia ti ka ada dudi hari ka muji Tuhan.
- 19 Laban Tuhan udah nilik ari endor iya ti kudus:
Tuhan ti di serga udah meda dunya;
- 20 Awak ka ninga sabak orang ti kena tutup:
Lalu ka ngelepas ka sida ti diletak kena bunoh.
- 21 Awak ka orang tau nusi brita Tuhan di Sion:
Lalu muji iya di Jerusalem.
- 22 Leboh orang bansa mayoh begempuru:
Enggau samoa bansa mensia mega, awak ka betuai ka Tuhan.
- 23 Iya ngelemi ka pengring aku leboh bejalai:
Iya ngemandak ka umor aku.
- 24 Nyadi ko aku, Anang ngambi aku dalam tangan umor aku:
Umor Tuhan meruan belama, datai ka pengambis serak orang.
- 25 Dulu kalia Tuhan nuduk ka dunya:
Langit mega endang digaga jari Tuhan.
- 26 Utai nya ka nyau, tang Tuhan ka meruan:
Amai, samoa utai nya ka mansang tuai, baka gari ti lama;
Tuhan ka nganti iya baka baju, lalu iya ka nyau.
- 27 Tang Tuhan endang meruan baka salama:
Lalu umor Tuhan nadai bepemadu.
- 28 Sida anembiak Tuhan ka diau dia berari:
Lalu anak uchu sida ka meruan tetap di moa Tuhan.

MASMUR 103

- NUAN samengat aku anang enda muji Tuhan:
Samoa utai ti dalam aku, anang enda muji nama iya ti kudus.
- 2 Nuan samengat aku anang enda muji Tuhan:
Anang enda ingat ka samoa penelap iya.
- 3 Tuhan ti ngampun samoa penyalah nuan:
Tuhan ti ngrai ka samoa penyakit nuan.

- 4 Tuhan mega ti nebus nyawa nuan ari pengrusak:
Iya ti ngemesai ka nuan, olih iya nelap, olih iya kasih kanuan.
- 5 Iya ti ngenyang ka nyawa nuan enggau utai ti badas:
Lalu nuan kring baru, baka leboh nuan agi biak, baka menaul ti kring.
- 6 Tuhan ngaga kerja ti lurus:
Lalu mutus ka pechara ka samoa sida ti kena keduan.
- 7 Iya madah ka jalai iya ngagai Musa:
Enggau kerja iya ngagai sida anak Israil.
- 8 Tuhan pemadu sinu, pemadu nelap:
Iya lobah ringat, nyadi pengasih iya endang besai.
- 9 Iya enda nganu berari:
Nadai mega iya ringat belama-lama.
- 10 Iya enda ngukum kitai nunda ka penyalah kitai:
Nadai mega iya malas penyai kitai.
- 11 Baka peninggi langit ari dunya:
Baka nya pemesai pengasih iya enggau sida ti nangi ka iya.
- 12 Baka penyauh timor ari barat:
Baka nya penyuah penyalah kitai udah dibuai iya.
- 13 Baka apai ti kasih ka anak iya:
Baka nya Tuhan kasih ka sida ti nangi ka iya.
- 14 Laban iya nemu baka ni kitai digaga:
Iya ingat ka kitai ti sigi endang amau tanah.
- 15 Pasal mensia, umor iya baka umor rumput:
Baka bungai di padang, baka nya iya tumbuh.
- 16 Laban ribut betiup mansa iya, lalu iya nyau:
Lalu endor iya nadai agi ditemu.
- 17 Tang pengasih Tuhan endang meruan kenyau ari trubah-rubah, datai ka belama-lama enggau sida ti nangi ka iya:
Lalu penglurus iya meruan enggau anak uchu orang.
- 18 Pengasih iya meruan mega enggau orang ti ngintu semaia sida:
Enggau sida ti ingat ka pesan iya, lalu niteh ka nya.
- 19 Tuhan udak nuduk ka printah iya di langit:
Lalu iya mrintah samoa mensia.
- 20 Puji Tuhan, kita ti malikat iya:
Kita ti kring, ti niteh ka jako iya,
Kita ti mending ka munyi jako iya.
- 21 Puji Tuhan, kita ti bala iya:
Kita ti penyuroh iya, ti ngaga utai ti ka deka iya.
- 22 Anang enda muji iya, samoa utai ti digaga iya,
Di sabarang endor iya megai printah:
Nuan samengat aku, anang enda muji Tuhan.

20 HARI BULAN. SAMBIANG LEMAI

MASMUR 104

- NUAN samengat aku, anang enda muji Tuhan:
 Nuan, Tuhan, ti Petara aku, nuan ti pemadu besai;
 Tuhan ti endang patut dipebasa ka, Tuhan ti besai kuasa.
- 2 Tuhan diau dikelingi mulia iya, baka ti dirasok ka klambi:
 Tuhan ti ngidar langit, baka ti ngidar langkau kain.
 - 3 Tuhan ti ngentak tiang rumah dalam ai:
 Tuhan ti ngena remang ka kreta iya;
 Lalu terbai ngena ribut ka sayap iya.
 - 4 Tuhan ngasoh malikat iya nyadi baka ribut:
 Lalu anembiak ti di-asoh iya nyadi baka daun api ti mau.
 - 5 Iya ngentak ka dunya datas penuduk iya:
 Awak ka iya enda nginsit belama-lama.
 - 6 Tuhan ngampoh ka dunya enggau ai tasik:
 Datai ka bukit ampoh olih ai.
 - 7 Leboh kena rara Tuhan, ai nya lalu surut:
 Leboh ninga munyi guntor Tuhan, iya pen lalu langkang.
 - 8 Nyadi bukit mansang tinggi, darong mansang dalam:
 Naka ti diletak Tuhan.
 - 9 Tuhan udah ngator antara ka ai tasik; enggai ka iya ngelui
 nya:
 Enggai ka iya datai baru, lalu ngampoh ka dunya.
 - 10 Iya ngaga lubang ai ti di lebak:
 Lalu di bukit bisi sungai.
 - 11 Ti alai jelu kampong ngirup:
 Lalu keldai kampong ngemadu ka aus sida.
 - 12 Besindi ai nya burong ngaga sarangan:
 Lalu munyi sida didinga sablah dan kayu.
 - 13 Tuhan nuang ka ai datas bukit ari rumah iya:
 Lalu mensia kenyang olih buah ti digaga Tuhan.
 - 14 Tuhan numboh ka rumput ka pemakai jelu,
 Enggau engkayu ka guna mensia:
 Awak ka orang tau bulih pemakai ari tanah;
 - 15 Bulih mega ai anggor ti ngelantang ka ati mensia:
 Enggau minyak ti enggau iya ngunsut bok iya, awak ka iya
 dipeda manah,
 Enggau roti mega ti ngring ka ati mensia.
 - 16 Samoa kayu Tuhan mansang galak:
 Iya nya kayu tras di Libanun, ti ditanam Tuhan.
 - 17 Ti alai burong ngaga sarangan iya:
 Lalu burong kuju diau di kayu ru.

- 18 Bukit ti tinggi, nya endor kambin diau:
 Nyadi batu, nya endor landak ngelalai ka diri.
- 19 Tuhan ngaga bulan awak ka orang nemu timpoh:
 Nyadi matahari nemu maia iya ka padam.
- 20 Tuhan ngator petang, lalu iya malam:
 Maia samoa jelu kampong pansut.
- 21 Sida anak singa negong niteh ka jelu ti digagai sida:
 Lalu sida ngiga pemakai ti dibri Allah Taala.
- 22 Matahari pen tumbuh sida lalu pulai:
 Lalu gali dalam lubang sida.
- 23 Mensia belaboh pengawa diri:
 Lalu bekerja datai ka lemai.
- 24 Nyampau pemayoh kerja nuan, Tuhan;
 Tuhan udah ngaga samoa utai olih penau iya:
 Dunya penoh olih utai ti digaga Tuhan.
- 25 Din tasik ti dalam, ti besai:
 Ti endor mayoh utai nyemenang, ti enda ulih ditesa;
 Utai ti idup, ti besai enggau ti mit.
- 26 Dia mega kapal belayar:
 Dia mega diau ikan paus ti digaga Tuhan.
- 27 Samoa utai nya bepanggai di Tuhan:
 Awak ka nuan, Tuhan, tau mri ka sida pemakai leboh
 timpoh sida.
- 28 Tuhan mri pemakai ka sida, lalu sida ngambi iya:
 Tuhan muka jari lalu mri ka sida, lalu sida kenyang olih
 utai ti badas.
- 29 Leboh Tuhan ngalih ka moa iya sida tusah:
 Tuhan ngambi pulai seput sida, lalu sida mati,
 Lalu pulai nyadi tanah.
- 30 Nuan, Tuhan, ngasoh roh nuan datai, lalu utai tau nyadi:
 Lalu utai ti idup di dunya di-asoh Tuhan nyadi baru.
- 31 Awak ka mulia Tuhan meruan belama-lama:
 Awak ka Tuhan andal meda kerja iya.
- 32 Iya merening dunya lalu iya berenyang:
 Iya negu bukit lalu iya berasap.
- 33 Aku ka nyanyi ka Tuhan sapemanjai umor aku:
 Aku ka nyanyi muji Petara aku salama aku idup.
- 34 Awak ka runding ati aku dikarindu ka Tuhan:
 Aku ka andal olih aku arap ka Tuhan.
- 35 Peneka aku samoa orang ti bepenyalah ambis di dunya;
 Lalu orang ti jai nadai agi:
 Nuan, samengat aku, anang enda muji Tuhan.
 Alleluya.

21 HARI BULAN. SAMBIANG PAGI

MASMUR 105

- Puji Tuhan olih kita, tusi nama iya:
Padah ka orang mayoh utai ti digaga iya.
- 2 Nyanyi ka iya, nyanyi masmur ka iya:
Bekenang ka samoa kerja iya ti besai.
 - 3 Andal kita, olih kita arap ka nama iya ti kudus:
Awak ka sida ti ngiga Tuhan andal ati.
 - 4 Ngadap Tuhan lalu minta penyaup iya:
Giga iya berari.
 - 5 Ingat ka kerja besai ti digaga iya:
Utai nyelai mega enggau ukum ti diletak iya.
 - 6 Kita anak uchu Ibrahim ti anembiak iya:
Kita ti anak Jakob ti dipilih iya.
 - 7 Iya endang Allah Taala, ti Petara kitai:
Iya ti mrintah samoa menoa.
 - 8 Iya ingat ka semaiia iya berari:
Iya nya jako ti diletak iya meruan datai ka serak orang beribu-ribu.
 - 9 Iya nya semaiia ti digaga iya enggau Ibrahim:
Enggau penyanggup iya enggau Isak.
 - 10 Lalu iya nentu ka semaiia iya, lalu ngeletak adat ka sida Jakob:
Lalu semaiia iya meruan belama-lama enggau sida Israil.
 - 11 Ko iya, Aku ka mri menoa Kanan ka kita:
Awak ka nyadi pesaka ka kita.
 - 12 Leboh bansa sida agi mimit:
Amai mimit bendar, lalu sida sigi orang temuai aja di menoa nya.
 - 13 Nyadi leboh sida nadai tentu pendiau, tang begulai enggau mayoh bansa bukai:
Lalu mindah berari ari menoa siti ngagai menoa siti;
 - 14 Iya enda nyagi orang ngayah ka sida:
Tang iya ngerara sida rajah tegal sida.
 - 15 Ko iya, Anang ngachau sida ti dipilih nyadi anembiak aku:
Anang nganu sida nabi aku.
 - 16 Nyadi iya ngasoh samoa menoa nya lapar:
Lalu ngambis ka samoa pemakai orang.
 - 17 Iya ngasoh orang siko kin, dulu ari sida:
Iya nya Joseph ti dijual nyadi ulun orang.
 - 18 Kaki iya diparinsa ka sida enggau glang:
Iya ditan ka enggau rantai besi,

- 19 Datai ka timpoh semaiia Tuhan di-amai ka:
Lalu iya ditemu Tuhan orang ti arap ka jako iya.
- 20 Rajah menoa nya ngasoh orang muka pasong iya:
Iya ti mrintah orang mayoh ngelepas ka iya.
- 21 Iya ngasoh iya nyadi kapala dalam rumah iya:
Lalu ngibun samoa utai iya.
- 22 Iya bisi kuasa mrintah samoa pengulu, nunda ka peneka iya:
Lalu iya ngajar sida ti tuai orang, awak ka sida bulih penemu.
- 23 Baka nya orang Israil datai di menoa Misir:
Lalu sida Jakob nemuai ngagai menoa Ham.
- 24 Lalu Allah Taala ngasoh anembiak iya nambah-menambah:
Datai ka sida kring agi ari orang ti ngelaban sida.
- 25 Iya ngras ka ati orang, lalu sida begedi soh anembiak iya:
Lalu ngakal sida nya ti betuai ka iya.
- 26 Iya nyuroh Musa kin, ti anembiak iya:
Enggau Aron mega ti dipilih iya.
- 27 Saduai mandang ka orang klai ti mayoh macham:
Enggau kerja besai mega di menoa Ham.
- 28 Iya ngasoh petang, lalu menoa nya nyadi petang:
Lalu orang ngasi ka jako iya.
- 29 Iya ngasoh ai nyadi darah:
Lalu ikan sida ambis mati.
- 30 Engkatak betambah lalu menoh ka menoa sida:
Indah ka bilik rajah betama sida.
- 31 Iya bejako lalu lalat mayoh bendar datai:
Enggau kringit mega di samoa menoa sida.
- 32 Iya ngasoh ujan batu laboh datas sida:
Enggau kilat di menoa sida, baka api ti mau.
- 33 Iya ngerusak kayu anggor enggau buah ti ditanam sida:
Lalu mumpung ka kayu di menoa sida.
- 34 Iya bejako lalu buntak datai:
Enggau ulat mega, mayoh amai ti enda ulih ditiap.
- 35 Lalu makai ambis daun engkayu di menoa sida:
Nyadi samoa padi di tanah sida ambis di-empa.
- 36 Iya munoh samoa anak ti tuai di menoa sida:
Iya nya dirunding sida ka pun pengring sida.
- 37 Nyadi leboh iya nganjong sida pansut, sida mai pirak enggau mas:
Siko pen nadai lemi dalam kaban sida.

- 38 Sida orang Misir andal leboh sida angkat:
Laban takut bendar ka sida.
- 39 Allah Taala ngelindong ka sida enggau remang:
Lalu ngasoh api nerang ka sida malam hari.
- 40 Sida minta, lalu iya mri burong empitu ka sida:
Lalu iya ngasoh sida kenyang makai roti ti laboh ari langit.
- 41 Iya mlah batu lalu pansut ai:
Ti anyut di menoa sunyi baka sungai.
- 42 Laban iya ingat ka jako iya ti kudus:
Ingat mega ka Ibrahim ti anemiak iya.
- 43 Iya ngambi pansut anemiak iya enggau gaga:
Lalu sida ti dikarindu ka iya enggau nyanyi.
- 44 Iya mri ka sida menoa bansa bukai:
Lalu sida bulih untong ari kerja orang bukai.
- 45 Awak ka sida tau ngintu pesan iya:
Lalu niteh ka letak iya.
Alleluya.

21 HARI BULAN. SAMBIANG LEMAI

MASMUR 106

ALLELUYA.

- Puji Tuhan, olih iya badas:
Laban pengasih iya meruan belama-lama.
- 2 Sapa ti tau nusi kerja besai ti digaga Tuhan:
Tau ka madah ka samoa utai ti alai iya patut dipuji?
- 3 Beberkat sida ti niteh ka letak iya:
Enggau orang nya ti salalu ngaga utai ti lurus.
- 4 Ingat ka aku, Tuhan, enggau pengasih, baka nuan kasih ka
anemiak nuan:
Datai Tuhan lalu ngelepas ka aku.
- 5 Awak ka aku tau meda penglantang sida ti dipilih Tuhan;
Awak ka aku tau andal meda pengandal bansa sida ti
dikarindu ka Tuhan:
Awak ka aku tau nyanyi puji serta enggau orang ti enggi
Tuhan.
- 6 Kami udah bepenyalah sama enggau aki ini kami:
Kami udah bedosa lalu udah ngaga penyai.
- 7 Aki kami di menoa Misir nadai berunding ka kerja besai ti
digaga Tuhan;
Sida enda ingat ka pengasih Tuhan ti besai:
Tang sida ngelaban Tuhan di tasik, iya nya Tasik
Mansau,

- 8 Taja baka nya iya ngidup ka sida tegal nama iya:
Awak ka iya tau mandang ka kuasa iya.
- 9 Iya ngerara Tasik Mansau mega lalu iya langkang:
Lalu iya nganjong sida nengah tasik, baka ti nengah tanah
pantai.
- 10 Lalu iya ngidup ka sida ari kuasa orang ti pedis ati soh
sida:
Lalu ngelepas ka sida ari kuasa munsoh sida.
- 11 Nyadi ai ngelemas ka munsoh sida:
Datai ka nadai siko ti tinggal agi idup.
- 12 Udah nya sida arap ka jako iya:
Lalu nyanyi muji iya.
- 13 Tang enda lama udah nya sida enda ingat ka kerja iya:
Sida enda nganti ator iya;
- 14 Tang sida ingin ka utai jai di menoa puang:
Lalu enda arap ka kuasa Allah Taala di menoa sunyi.
- 15 Nyadi iya mri ka sida utai ti dipinta sida:
Tang serta nya iya ngasoh sida sakit lalu mati.
- 16 Sida kapapas ka Musa ti sa-kaban enggau sida:
Enggau Aron mega, iya ti anemiak Tuhan ti kudus.
- 17 Nyadi tanah terbuka, lalu sida Datan laboh kadalam nyin:
Tanah mega ngelamun kaban sida Abiram.
- 18 Nyadi api pansut di endor kaban sida:
Lalu ngangus ka orang nya ti jai.
- 19 Sida ngaga gambar anak chapi di bukit Horib:
Lalu nyembah engkrama ti disalin sida.
- 20 Baka nya sida enda nyembah Allah Taala ti bemulia:
Tang nyembah gambar chapi ti makai rumput.
- 21 Sida enda ingat ka Allah Taala ti ngelepas ka sida:
Ti udah ngaga kerja besai di menoa Misir;
- 22 Enggau kerja nyelai mega di menoa Ham:
Enggau utai ti nakut ka orang di Tasik Mansau.
- 23 Nya alai iya madah ka diri ka munoh sida:
Tang Musa, ti dikarindu ka iya, minta Tuhan kasih ka
sida,
Minta Tuhan enda ringat, enggai ka iya ngerusak sida.
- 24 Nyadi sida mantah menoa nya ti manah:
Sida enda arap ka jako iya.
- 25 Tang sida meruan dalam langkau sida, lalu bejako
memut:
Lalu enggai ninga ka jako Tuhan.
- 26 Nya alai iya ngunjor ka jari lalu besemaia enggau sida:
Ka ngalah ka sida di menoa puang,

- 27 Lalu ka mambar ka anak uchu sida di menoa orang bukai:
Lalu ngasoh sida lari sablah menoa.
- 28 Sida begulai enggau kaban orang ti nyembah antu Baal-pior:
Lalu makai piring ti di-enjok ka beral ti enda idup.
- 29 Nyadi sida ngasoh Allah Taala ringat olih kerja sida:
Lalu penyakit ti balat nganu sida.
- 30 Udah nya Pinias angkat lalu ngukum sida:
Lalu penyakit nya badu.
- 31 Nyadi nya dirunding ka penglurus iya:
Datai ka pengambis serak orang.
- 32 Sida ngasoh Allah Taala ringat mega di ai Meribah:
Lalu Musa kena penusah tegal sida.
- 33 Laban sida enggai niteh ka ajar Roh Allah Taala:
Lalu Musa tekelangjur bejako enggau mulut iya.
- 34 Sida enggai munoh ambis orang petang:
Baka ti di-asoh Allah Taala.
- 35 Tang jadi enggau orang petang:
Lalu belajar ka kerja sida.
- 36 Lalu betuai ka beral sida:
Lalu sida kena rusak olih nya.
- 37 Amai, sida munoh anak sida:
Awak ka nginselan antu.
- 38 Lalu munoh orang ti nadai penyalah, iya nya anak sidaempu:
Ti dibunoh sida nginselan antu di menoa Kanan;
Lalu menoa nya nyadi kudi olih darah orang nya.
- 39 Baka nya sida nyadi jai olih kerja sida:
Lalu mungkir olih utai ti digaga sida.
- 40 Nya alai Tuhan ringat soh anembiak iya:
Lalu iya begedi ka sida ti enggi iya.
- 41 Nyadi iya ngasoh sida alah olih orang petang:
Lalu orang ti pedis ati mrintah sida.
- 42 Munsoh mega ngayah ka sida:
Lalu sida nunduk ka ator orang nya.
- 43 Suah amai Allah Taala ngelepas ka sida:
Tang ati sida ngelaban iya;
Lalu sida kena rusak olih penyai sidaempu.
- 44 Taja baka nya Allah Taala meda pamarinsa sida:
Lalu ninga ka kangau sida.
- 45 Lalu iya ingat ka semaia iya enggau sida:
Lalu ati iya berubah, nunda ka pengasih iya ti besai.
- 46 Nyadi iya ngasoh orang sinu ati ka sida:
Iya nya samoa orang ti udah nangkap sida.

- 47 Idup ka kami, Tuhan ti Petara kami,
Ambi kami pulai ari tengah orang petang:
Awak ka kami tau ngenang nama Tuhan ti kudus,
Lalu menang, lalu muji Tuhan.
- 48 Puji Tuhan, ti Petara orang Israil,
Kenyau ari trubah-rubah, datai ka belama-lama:
Lalu samoa orang ka nyebut, *Amin*.
Alleluya.

22 HARI BULAN. SAMBIANG PAGI

MASMUR 107

- Puji Tuhan, olih iya badas:
Nyadi pengasih iya meruan belama-lama.
- 2 Awak ka orang ti udah ditebus Tuhan bejako munyi nya:
Iya nya sida ti ditangkap munsoh, ti udah ditebus Tuhan.
- 3 Nyadi Tuhan udah ngempuru ka sida ari samoa menoa:
Ari timor, ari barat,
Ari utara, ari selatan.
- 4 Sida tesat di menoa sunyi, niteh ka jalai ti jarang ditengah orang:
Sida enda tetemu ka nengri ti dipangkang mensia.
- 5 Sida lapar, sida aus:
Ati sida nyau ambis dalam nyin.
- 6 Nyadi sida ngangau ka Tuhan olih sida tusah:
Lalu iya ngelepas ka sida ari pamarinsa sida.
- 7 Iya ngulu ka sida nengah jalai ti lurus:
Awak ka sida tau ngagai nengri ti alai bisi orang.
- 8 Awak ka sida muji Tuhan laban pengasih iya:
Olih kerja nyelai ti digaga iya ka anak mensia.
- 9 Laban iya ngelantang ka ati sida ti lelungau ka iya:
Lalu sida ti lapar di-asoh iya kenyang enggau utai ti badas.
- 10 Iya meda sida ti duduk di endor petang, nganti maia diri kena bunoh:
Enggau sida ti marinsa, ti dipasong enggau rantai besi;
- 11 Laban sida ngelaban jako Allah Taala:
Lalu enggau niteh ka ajar Iya ti Pemadu Tinggi.
- 12 Nya alai iya ngemaroh ka ati sida enggau penusah:
Sida nyau lemi, lalu nadai bisi orang ti nyaup sida.
- 13 Nyadi sida ngangau ka Tuhan, olih sida tusah:
Lalu iya ngelepas ka sida ari pamarinsa sida.
- 14 Iya mai sida pansut ari endor petang, ti alai sida nganti diri kena bunoh:
Lalu muka pasong sida.

- 15 Awak ka sida muji Tuhan, laban pengasih iya:
Olih kerja nyelai ti digaga iya ka anak mensia.
- 16 Laban iya udah mambar ka pintu temaga:
Lalu matah ka pagar besi.
- 17 Orang ti budau kena penusah olih penyalah sidaempu:
Olih penyai sida mega.
- 18 Ati sida nadai iboh ka barang utai ti di-empa:
Lalu sida nyau ka mati.
- 19 Nyadi sida ngangau ka Tuhan laban sida tusah:
Lalu iya ngelepas ka sida ari pamarinsa sida.
- 20 Nyadi iya mansut ka jako iya, lalu ngrai ka sida:
Lalu ngelepas ka sida ari pengrusak.
- 21 Awak ka sida muji Tuhan, laban pengasih iya:
Olih kerja nyelai ti digaga iya ka anak mensia.
- 22 Awak ka sida muji iya enggau piring:
Lalu bepantun ngenang kerja iya.
- 23 Sida ti belayar di tasik enggau kapal:
Ti bedagang nengah tasik besai,
- 24 Orang nya ti meda kerja Tuhan:
Enggau utai nyelai ti digaga iya di tasik.
- 25 Laban iya bejako, lalu ribut ti balat datai:
Ti ngasoh glumbang nyadi.
- 26 Kapal sida disagu katas ngagai langit, lalu nurun ka baroh
antara glumbang:
Ati sida nyau ambis olih penusah.
- 27 Sida belinggang, sida kia kia, baka orang ti mabok:
Lalu penemu sida nyau nadai agi.
- 28 Nyadi sida ngangau ka Tuhan, olih sida tusah:
Lalu iya ngelepas ka sida ari pamarinsa sida.
- 29 Iya nedoh ka biobalai:
Lalu glumbang pen badu.
- 30 Nyadi sida andal laban tasik nyau tedoh:
Lalu iya mai sida ngagai pengkalan ti digagai sida.
- 31 Awak ka sida muji Tuhan, olih pengasih iya:
Olih kerja nyelai ti digaga iya ka anak mensia.
- 32 Awak ka sida ngemesai ka iya, leboh orang mayoh
begempuru:
Lalu muji iya leboh orang tuai baum.
- 33 Iya ngubah ka sungai nyadi pantai:
Lubang ai mega nyadi tanah ti kring.
- 34 Tanah ti badas di-asoh iya nyadi pasir, nyadi kusi:
Tegal penyai orang ti diau dia.

- 35 Iya ngubah ka menoa sunyi nyadi danau:
Tanah ti kring mega di-asoh iya nyadi lubang ai.
- 36 Nyadi iya ngasoh orang lapar diau dia:
Lalu sida ngaga nengri ti endor sida diau.
- 37 Dia sida bumai, lalu nanam kayu anggor:
Ti galak lalu bebuah.
- 38 Iya mri berkat ka sida mega, lalu sida nambah-menambah:
Lalu jelu sida pridi beranak.
- 39 Nyadi leboh kaban sida nyau kurang, sida nyau ambis ati:
Olih pamarinsa, olih penyai, olih penusah.
- 40 Iya ngemaroh ka orang ti besai:
Lalu nesat ka sida di menoa puang ti nadai bisi jalai.
- 41 Tang iya ngangkat ka orang ti umang, lalu ngelepas ka
sida ari pamarinsa:
Lalu anak sida mayoh, baka kaban domba.
- 42 Sida ti lurus ati meda, lalu andal:
Nyadi samoa jako jai nadai didinga agi.
- 43 Awak ka orang ti bepenemu berunding ka utai nya:
Awak ka sida bepragam ka pengasih Tuhan.

22 HARI BULAN. SAMBIANG LEMAI

MASMUR 108

- AKU udah nentu ka ati aku, Tuhan Allah:
Aku ka nyanyi, amai, samengat aku ka nyanyi.
- 2 Taboh engkrebap enggau engkratong:
Akuempu ka dani enda betanggoh.
 - 3 Aku ka muji nuan, Tuhan, serta enggau orang mayoh:
Aku ka nyanyi lalu muji Tuhan serta enggau orang bukai.
 - 4 Laban pengasih Tuhan endang besai, lalu nyintok ka
langit:
Lalu pemendar Tuhan nyintok ka remang.
 - 5 Angkat ka diri, Tuhan Allah, ari atas langit:
Awak ka mulia Tuhan dipeda samoa isi dunya.
 - 6 Lepas ka sida ti dikarindu ka Tuhan:
Idup ka sida enggau jari kanan Tuhan, lalu dinga ka aku.
 - 7 Allah Taala udah bejako, olih iya kudus; ko iya, Aku ka
andal:
Aku ka magi nengri Sikim lalu bedua darong Sukut.
 - 8 Menoa Giliad enggi aku; bansa Manasi mega enggi aku:
Bansa Iprim baka topi ti ninding pala aku;
Bansa Judah baka tungkat pemrintah ti dipegai aku.
 - 9 Sida Moab baka dulang ti endor aku masu kaki aku:
Aku ka ngasoh sida Idom nuchi kasut aku;

- Aku ka manjong, olih aku menang neglaban sida Pilistia.
- 10 Sapa ti tau ngulu ka aku ngagai nengri ti kring:
Sapa ti tau nganjong aku ngagai Idom?
- 11 Ukai enda Tuhan Allah ti udah ninggal ka kami:
Ukai enda Tuhan Allah ti enda mansang enggau bala kami?
- 12 Saup kami ngelaban munsoh kami:
Laban penyaup mensia endang nadai guna.
- 13 Olih penyaup Allah Taala kami ka brani bendar:
Laban endang iya ti tau ngalah ka munsoh kami.

MASMUR 109

- ANANG enda nyaut aku:
Allah Taala ti dipuji aku;
- 2 Laban orang udah ngasoh sida ti jai, ti bula, bejako ngelaban aku:
Sida udah nyalah aku enggau jako ti bula.
- 3 Sida ti ngelingi aku bejako kasar:
Lalu ngelaban aku enggau nadai kabuah.
- 5 Taja aku rindu ka sida, sida ngelaban aku:
Tang aku meruan sambiang.
- 5 Nyadi aku udah badas enggau sida, tang sida malas aku enggau penyai:
Aku udah rindu ka sida, tang sida malas enggau ati pedis soh aku.
- 6 Asoh orang jai mrintah orang nya:
Enggau orang ti nyalah iya bediri ngimbai iya berari.
- 7 Leboh iya kena pechara, lak ka iya diletak salah:
Lak ka sambiang iya enda didinga, laban iya salah.
- 8 Lak ka umor iya pandak:
Lak ka orang bukai megai pengawa iya mega.
- 9 Lak ka anak iya nyadi patu:
Enggau bini iya nyadi balu.
- 10 Lak ka anak iya enda jenoh, minta utai sablah orang:
Awak ka sida bejalai jauh ngiga pemakai, olih nadai rumah endor diau.
- 11 Lak ka orang ti bejali ka wang ngerampas samoa utai iya:
Awak ka orang bansa bukai ngambi untong ari kerja iya.
- 12 Anang ngasoh orang kasih ka iya:
Anang nyagi orang sinu meda anak iya ti patu.
- 13 Anang ngasoh anak iya beranak:
Awak ka nama iya punas, nadai agi di-ingat ka serak orang ti dudi.

- 14 Awak ka penyalah aki ini iya di-ingat ka Tuhan:
Anang Tuhan ngampun dosa indai iya.
- 15 Lak ka penyalah iya endang dipeda Tuhan:
Lalu anang orang nya agi di-ingat ka mensia.
- 16 Laban iyaempu nadai bisi kasih ka orang:
Tang iya beduan orang ti saranta, ti umang,
Enggau sida ti tusah ati mega, awak ka munoh sida.
- 17 Iya rindu nyumpah orang, lalu iyaempu kena sumpah:
Nyadi iya enda rindu minta berkat ka orang, lalu iyaempu nadai bulih berkat.
- 18 Iya ngeriri ka diri ngena jako sumpah, baka orang ngena baju:
Nyadi jako nya masok kadalam ati iya, baka ai ti di-irup iya,
Baka isi lemak ti ngring ka tulang iya.
- 19 Nyala alai asoh jako sumpah nya ngelekat di iya, baka baju ti dipasok ka iya:
Baka belulang kena melit punggong.
- 20 Nya ukum ti diletak Tuhan ka munsoh aku:
Ka sida mega ti bejako nganu samengat aku.
- 21 Tang kring ka aku, Tuhan Allah, ti Tuhan aku, tegal nama nuan:
Lepas ka aku, olih pengasih nuan ti besai.
- 22 Laban aku saranta, aku umang:
Nyadi ati aku nyau tusah dalam nyin.
- 23 Ati aku nyau nadai agi, baka kelemayang nyau, leboh matahari ka padam:
Aku dibai kia kia, baka buntak ti bepuput ka ribut.
- 24 Pala patong aku nyau lemi, olih aku enda makai:
Nyadi tuboh aku nyau kurus, nadai isi.
- 25 Aku nyau dibantah orang:
Leboh sida meda aku, sida ngilik ka pala, beduan aku.
- 26 Saup aku, Tuhan ti Petara aku:
Idup ka aku, olih nuan endang kasih ka orang.
- 27 Awak ka orang tau ngelala kuasa Tuhan:
Lalu nemu Tuhan ti udah ngaga utai nya.
- 28 Taja sida nyumpah aku, nuan Tuhan, ka mri berkat:
Sida ti ngelaban ka kena malu, tang anemiak Tuhan ka andal.
- 29 Sida ti ngelaban aku ka kena malu:
Sida ka ditinggang pemalu, baka ti dibungkus enggau kain.

- 30 Bendera aku ka muji Tuhan enggau nyawa aku:
Amai, aku ka muji iya serta enggau orang mayoh.
- 31 Laban iya ka ngring ka orang ti umang:
Awak ka ngidup ka iya ari sida ti ka ngeletak iya kena bunoh.

23 HARI BULAN. SAMBIANG PAGI

MASMUR 110

ALLAH Taala bejako enggau tuan aku, ko iya, Duduk puak ka kanan aku:

- Datai ka aku ngasoh munsoh nuan nunduk ka nuan.
- 2 Tuhan ka bepait tungkat ari Sion, nyadi tanda nuan:
Ko iya, Pegai perintah nuan datas munsoh nuan.
- 3 Leboh nuan manggil orang ngayau, anemiak nuan enda betanggoh datai:
Rerak tawas sida datai bengepan enggau gari ti kudus,
Anemiak nuan datai, baka ai ambun pagi hari.
- 4 Tuhan udah besemaia, nyadi iya enggai mungkir:
Nuan ka meruan imam belama-lama;
Nuan ti ari purih Melkisdik.
- 5 Tuhan meruan ari puak kanan nuan:
Iya ka ngalah ka sida rajah, leboh sida ka nganu orang.
- 6 Iya ka megai pechara ka samoa bansa mensia;
Olih kuasa iya menoa nya ka penoh olih bangkai orang:
Iya ka ngalah ka mayoh sida ti mrintah menoa bukai.
- 7 Iya ka ngirup ai sungai ti dipansa jalai:
Udah nya iya ka kring lalu menang.

MASMUR 111

ALLELUYA.

- Aku ka muji Tuhan enggau pengambis ati aku:
Leboh orang lurus begempuru, leboh orang mayoh datai sambiang.
- 2 Kerja Tuhan endang besai:
Nyadi samoa sida ti rindu ka kerja nya berunding ka iya.
- 3 Kerja iya mandang ka pemesai enggau mulia iya:
Nyadi penglurus iya meruan belama-lama.
- 4 Iya ngeletak pengingat ka kerja besai ti digaga iya:
Tuhan endang nelap, endang sinu.
- 5 Iya mri pemakai ka sida ti nangi ka iya:
Iya ka ingat ka semai iya belama-lama.
- 6 Iya mandang ka penau iya ngagai anemiak iya, olih kerja iya:

- Olih iya mri ka sida tanah enggau pesaka orang bansa bukai.
- 7 Kerja iya mandang ka pemendar iya enggau ukum iya ti ngena:
Samoa pesan iya endang tentu.
- 8 Pesan iya meruan belama-lama:
Ti diletak enggau bendar, enggau lurus mega.
- 9 Tuhan udah ngasoh anemiak iya dilepas;
Iya nyanggup semai iya belama-lama:
Nama iya endang kudus, endang dikanangi ka.
- 10 Kenangi ka Allah Taala, laban nya ti pun penemu;
Nyadi orang ti niteh ka pesan iya ka bulih ati ti mereti
Tuhan ka dipuji mensia belama-lama.

MASMUR 112

ALLELUYA.

- Beberkat orang ti nangi ka Tuhan:
Lalu rindu bendar ka pesan iya.
- 2 Anak uchu iya ka besai kuasa di menoa nya:
Nyadi serak orang ti lurus ka bulih berkat.
- 3 Pengraja enggau utai mayoh bisi di rumah iya:
Nyadi penglurus iya meruan belama-lama.
- 4 Orang ti lurus endang bisi api ti nerang ka petang:
Orang nya nelap, iya sinu, iya lurus.
- 5 Lantang pendiau orang ti kasih, lalu bejali ka orang:
Ti ngator olah iya enggau ngena.
- 6 Laban iya enda tau kena kachau:
Nyadi iya ti lurus ka dikenang orang belama-lama.
- 7 Iya enda takut ninga brita penusah:
Ati iya tentu, olih iya arap ka Tuhan.
- 8 Ati iya tetap, lalu iya enda tau takut:
Datai ka iya meda munsoh iya nyau alah.
- 9 Iya udah magi utai iya, iya udah mri ka sida ti umang;
Penglurus iya meruan belama-lama:
Kuasa enggau basa iya ka besai.
- 10 Orang ti jai ka meda, lalu ka tusah;
Sida ka begrit ngeli, lalu nadai agi dipeda:
Nyadi sida ti jai nadai tau bulih utai ti ka deka sida.

MASMUR 113

ALLELUYA.

- Puji Tuhan, kita ti anemiak iya:
Puji nama Tuhan.

- 2 Awak ka nama Tuhan dipuji:
Kamaiatu, lalu ka belama-lama.
- 3 Ari endor matahari tumbuh datai ka endor iya padam:
Nama Tuhan ka dipuji,
- 4 Tuhan megai perintah atas samoa bansa mensia:
Nyadi mulia iya dipeda di langit.
- 5 Sapa ti baka Tuhan, Petara kitai:
Ti duduk megai perintah di endor ti pemadu tinggi,
- 6 Ti ngemaroh ka diri awak ka meda:
Lalu berunding ka utai ti di langit, enggau utai ti di bumi
mega?
- 7 Iya angkat ka orang ti umang ari latak:
Lalu nanggong orang saranta ari tugong uras.
- 8 Awak ka ngasoh iya begulai enggau sida pengulu:
Iya nya enggau sida pengulu anemiak iya.
- 9 Iya ngasoh indu ti punas diau lantang di rumah iya:
Lalu beranak, lalu ngintu anak iya enggau ati ti gaga.
Alleluya.

23 HARI BULAN. SAMBIANG LEMAI

MASMUR 114

- LEBOH sida Israil angkat ari menoa Misir:
Enggau sida Jakob ari menoa orang ti lain jako;
- 2 Allah Taala diau enggau sida Judah:
Lalu mrintah sida Israil.
 - 3 Tasik meda, lalu surut:
Ai Jordan nyau pulai baru.
 - 4 Bukit engkebut, baka anak domba ti merjok:
Nyadi munggu mega, baka anak bedus.
 - 5 Kati alai tasik surut:
Enggau ai Jordan nyau pulai baru?
 - 6 Kati baka bukit engkebut, baka anak domba ti merjok:
Enggau munggu, baka anak bedus?
 - 7 Awak ka dunya berenyut laban Tuhan bisi datai:
Laban Allah Taala, ti Petara Jakob bisi datai.
 - 8 Tuhan ngasoh tanah bebatu nyadi letong ai:
Enggau batu ti kring nyadi lubang ai.

MASMUR 115

- UKAI kami ti patut dipuji, Tuhan, ukai kami ti patut
dipuji;
Tang nama Tuhan ti patut dipuji:
Tegal pengasih enggau pemendar Tuhan.

- 2 Nama kabuah Tuhan nyagi orang bukai bejako:
Ko sida, Dini alai Petara sida?
- 3 Tang Petara kami endang di serga:
Iya ngaga barang utai ti ka deka iya.
- 4 Beralah, ti disembah sida, digaga ari pirak enggau mas aja:
Iya digaga jari mensia.
- 5 Mulut iya bisi, tang bejako enda tau:
Mata iya bisi, tang meda enda tau.
- 6 Pending iya bisi, tang ninga enda tau:
Idong iya bisi, tang nyium enda tau.
- 7 Jari iya bisi, tang megai utai enda tau;
Kaki iya bisi, tang bejalai enda tau:
Nadai mega iya tau bejako enggau mulut.
- 8 Orang ti ngaga beralah ka nyadi sabaka enggau iya:
Iya nya orang ti arap ka iya.
- 9 Kita orang Israil, arap kita ka Tuhan:
Iya endang penyaup, endang peninding orang.
- 10 Kita ti purih Aron, arap kita ka Tuhan:
Iya endang penyaup, endang peninding orang.
- 11 Kita ti nangi ka Tuhan, arap kita ka Tuhan:
Iya endang penyaup, endang peninding orang.
- 12 Tuhan ti udah ingat ka kami, ka merkat ka kami:
Iya ka merkat ka sida purih Israil;
Iya ka merkat ka sida purih Aron.
- 13 Iya ka merkat ka sida ti nangi ka Tuhan:
Samoa sida, tau ka besai, tau ka mit.
- 14 Tuhan ka ngasoh kita nambah-menambah:
Kita enggau anak kita mega.
- 15 Tuhan ka merkat ka kita:
Tuhan ti ngaga langit enggau bumi.
- 16 Langit endang enggi Tuhan:
Tang dunya dibri iya ka mensia.
- 17 Sida ti udah mati nadai tau muji Tuhan:
Nadai mega tau sida ti udah nurun ka sabayan.
- 18 Tang kami ka muji Tuhan:
Kamaiatu, lalu ka belama-lama.
Alleluya.

24 HARI BULAN. SAMBIANG PAGI

MASMUR 116

- AKU rindu ka Tuhan, laban iya ninga:
Laban iya ninga ka nyawa enggau sambiang aku.

- 2 Kra, iya udah mending ka aku:
Nyadi aku ka ngangau ka iya salama aku idup.
- 3 Aku tusah baka orang ti ngerunding diri ka mati;
Aku pedis baka orang ti ka nurun ka sabayan:
Aku ngasai ka penusah enggau pamarinsa.
- 4 Nyadi aku ngangau nyebut nama Tuhan:
Aku minta nuan, Tuhan, ngelepas ka samengat aku.
- 5 Tuhan endang nelap, endang lurus:
Amai, Allah Taala, Petara kami endang kasih ka orang.
- 6 Tuhan ngintu sida ti nadai penemu:
Aku kena penusah lalu iya ngidup ka aku.
- 7 Anang enda samengat aku diau lantang baka menya:
Laban Tuhan udah badas enggau aku.
- 8 Laban Tuhan udah ngelepas ka samengat aku ari pematih:
Iya ngasoh mata aku badu belai,
Lalu kaki aku enda trap.
- 9 Aku ka bejalai di moa Tuhan:
Dalam menoa orang ti agi idup.
- 10 Aku agi arap leboh aku bejako munyi tu:
Ko aku, Aku marinsa amai.
- 11 Aku beguai bejako, ko aku:
Samoa mensia endang bula.
- 12 Baka ni aku tau malas Tuhan:
Laban samoa pemadas iya enggau aku?
- 13 Aku ka ngirup ari mangkok nya ti dikena orang leboh
muji Tuhan:
Aku ka ngangau nyebut nama Tuhan.
- 14 Aku ka ngamai ka semaia aku enggau Tuhan:
Di moa samoa anemiak iya.
- 15 Ukai Tuhan enda iboh:
Leboh sida ti dikarindu ka iya kena bunoh.
- 16 Tentu amai aku anemiak nuan, Tuhan:
Aku anemiak Tuhan, aku anak anemiak Tuhan;
Tuhan udah muka pasong aku.
- 17 Aku ka mri ka Tuhan piring ti endang dibri leboh orang
ka muji Tuhan:
Lalu aku ka ngangau nyebut nama Tuhan.
- 18 Aku ka ngamai ka semaia aku enggau Tuhan:
Di moa samoa anemiak iya,
- 19 Di balai rumah Tuhan:
Di tengah kita orang Jerusalem.
Alleluya.

MASMUR 117

- Puji Allah Taala samoa kita mensia:
Kemesai ka iya samoa kita bansa mensia.
- 2 Laban pengasih iya enggau kitai endang besai:
Lalu pemendar iya meruan belama-lama.
Alleluya.

MASMUR 118

- Puji Allah Taala laban iya badas:
Laban pengasih iya meruan belama-lama.
- 2 Awak ka sida Israil madah ka orang:
Pengasih iya meruan belama-lama.
 - 3 Awak ka sida purih Aron madah ka orang:
Pengasih iya meruan belama-lama.
 - 4 Awak ka sida ti nangi ka Tuhan madah ka orang:
Pengasih iya meruan belama-lama.
 - 5 Leboh aku tusah, aku ngangau ka Allah Taala:
Nyadi Allah Taala ninga ka aku, lalu ngelepas ka aku
ngagai endor ti lantang.
 - 6 Tuhan ti penyaup aku;
Aku enda takut:
Nama ti tau digaga mensia ka aku?
 - 7 Tuhan bisi enggau aku, awak ka nyaup aku:
Nya alai aku meda munsoh nyau alah, baka ti ka deka aku.
 - 8 Badas agi orang ti bepanggih di Tuhan:
Anang iya arap ka mensia.
 - 9 Badas agi orang bepanggih di Tuhan:
Anang iya arap ka sida ti besai kuasa.
 - 10 Samoa bansa mensia ngelingi lalu ngelaban aku:
Tang aku ngalah ka sida, olih aku arap ka nama Tuhan.
 - 11 Sida ngelingi aku; amai, sida ngelingi aku:
Nyadi aku ngalah ka sida, olih aku arap ka nama Tuhan.
 - 12 Sida ngelingi aku, lalu aku baka ti dibalut manyi; sida
nyau nadai agi, baka api ti di babas udah dirara:
Aku ngalah ka sida, olih aku arap ka nama Tuhan.
 - 13 Kita udah balat numbok aku, ngambi ka aku alah:
Tang Tuhan ti penyaup aku.
 - 14 Tuhan ti ngring ka aku, lalu aku ka nyanyi ngenang iya:
Nyadi iya ti penglepas aku.
 - 15 Dalam rumah orang ti lurus endang bisi munyi orang ti
andal, ti udah dilepas ka Tuhan.
Jari kanan Tuhan endang ngaga kerja ti besai.

- 16 Jari kanan Tuhan endang bekuasa:
Jari kanan Tuhan endang ngaga kerja ti besai.
- 17 Aku enda ka mati, tang aku ka idup:
Lalu nusi utai ti digaga Tuhan.
- 18 Bender Tuhan udah ngajar aku:
Tang iya enda ngasoh aku kena bunoh.
- 19 Buka ka aku pintu rumah Iya ti Lurus:
Aku ka tama nengah iya, lalu ka muji Tuhan.
- 20 Tu pintu rumah Tuhan:
Sida ti lurus ka tama nengah iya.
- 21 Aku muji nuan, Tuhan, laban Tuhan udah ninga ka aku:
Tuhan nyadi penglepas aku.
- 22 Batu siti nya ti dikenggai ka tukang:
Nyau beguna agi ari samoa batu bukai kena ngaga rumah.
- 23 Iya nya diletak Tuhan:
Nyadi iya nya nyelai bendar ti dipeda kitai.
- 24 Tu hari ti diletak Tuhan:
Kitai ka andal, kitai ka gaga sa-hari-tu.
- 25 Idup ka kami, kami minta nuan, Tuhan:
Ngelantang ka kami, kami minta nuan, Tuhan.
- 26 Beberkat orang ti tama kadalam rumah Tuhan nyembah
Allah Taala:
Kami merkat ka kita dalam rumah Tuhan.
- 27 Allah Taala endang Petara, lalu iya nerang ka kitai:
Jelu ti ka disembelih, tanchang enggau tali, lalu bai ngagai
alta ti kudus.
- 28 Nuan, Tuhan, endang Petara aku; lalu aku ka muji nuan:
Nuan, Tuhan, endang Petara aku, lalu aku ka ngemesai ka
nuan.
- 29 Puji Tuhan olih iya badas:
Laban pengasih iya meruan belama-lama.

24 HARI BULAN. SAMBIANG LEMAI

MASMUR 119

- BEBERKAT sida ti lurus ati:
Ti niteh ka ajar Tuhan.
- 2 Beberkat sida ti niteh ka peneka iya:
Sida ti ngiga iya enggau pengambis ati.
- 3 Sida nya nadai ngerja utai ti enda lurus:
Sida niteh ka jalai Tuhan.
- 4 Tuhan udah ngeletak ka adat:
Awak ka orang tau rajin ngintu iya.

- 5 Asoh ati aku tetap:
Awak ka aku tau niteh ka pesan Tuhan.
- 6 Nyadi aku enda malu:
Leboh aku ingat ka letak Tuhan.
- 7 Aku ka muji Tuhan enggau bendar ati:
Leboh aku nemu ukum Tuhan ti lurus.
- 8 Aku ka niteh ka pesan Tuhan:
Anang ninggal ka aku kadiri.
-
- 9 Baka ni orang bujang tau ngintu olah diri tuchi:
Olih iya ngintu diri nunda ka jako Tuhan.
- 10 Aku udah ngiga Tuhan enggau pengambis ati aku:
Anang nyagi aku limpang ari adat ti diletak Tuhan.
- 11 Aku udah naroh jako Tuhan dalam ati aku:
Enggai ka aku salah ngelaban Tuhan.
- 12 Nuan, Tuhan, ti patut dipuji:
Ajar aku pesan nuan.
- 13 Aku udah nusi enggau mulut aku:
Samoa ator ti ditelah Tuhan.
- 14 Aku udah andal niteh ka peneka Tuhan:
Baka orang ti andal laban bulih pengraja.
- 15 Aku ka berunding ka adat Tuhan:
Lalu ingat ka jalai Tuhan.
- 16 Aku ka andal niteh ka pesan Tuhan:
Aku ka ingat ka jako Tuhan.
-
- 17 Anang enda badas enggau anemiak nuan, Tuhan, awak
ka aku tau idup:
Lalu aku tau ngasi ka jako Tuhan.
- 18 Asoh mata aku menchelak awak ka aku tau meda:
Utai nyelai ti di-ajar Tuhan.
- 19 Aku baka orang temuai di dunya tu:
Anang enda Tuhan nerang ka letak iya enggau aku.
- 20 Pendiaau aku nyau runggu, olih tetengok:
Ka niteh ka ator Tuhan berari.
- 21 Tuhan ngerara sida ti sumbong:
Nyadi sida ti enda ngasi ka letak Tuhan kena anu iya.
- 22 Asoh aku badu kena malu, kena pechat:
Laban aku udah niteh ka peneka Tuhan.
- 23 Orang ti besai duduk lalu bejako ngelaban aku:
Tang anemiak Tuhan berunding ka pesan Tuhan

- 24 Aku anda mega ngaga peneka Tuhan:
Lalu kena ajar iya.
-
- 25 Ati aku nyau ambis lalu aku enda tau angkat:
Idup ka aku, Tuhan, nunda ka jako nuan.
- 26 Aku udah nusi pendiau diri, lalu Tuhan ninga ka aku:
Ajar aku pesan Tuhan.
- 27 Asoh aku nemu jalai nunda ka adat Tuhan:
Awak ka aku tau berunding ka kerja Tuhan ti besai.
- 28 Aku nyabak olih ati ti tusah:
Kring ka aku nunda ka jako Tuhan.
- 29 Buai ari aku ati ti bula:
Lalu olih pengasih bri ka aku ajar Tuhan.
- 30 Aku udah milih pendiau ti lurus:
Aku salalu ingat ka ator Tuhan.
- 31 Aku kran niteh ka peneka Tuhan:
Anang nyagi aku kena malu, Tuhan.
- 32 Aku kras niteh ka letak Tuhan:
Leboh Tuhan nerang ka ati aku.
-

25 HARI BULAN. SAMBIANG PAGI

MASMUR 119

- 33 AJAR aku jalai pesan nuan, Tuhan:
Lalu aku ka niteh ka iya berari-ari.
- 34 Bri ka aku penemu, lalu aku tau niteh ka ajar Tuhan:
Amai, aku ka ngintu iya enggau pengambis ati aku.
- 35 Iring aku niteh ka jalai pesan Tuhan:
Olih aku rindu ka jalai nya.
- 36 Ubah ka ati aku awak ka ngerja peneka Tuhan:
Anang ngasoh aku ngiga untong enggau akal.
- 37 Kalih ka mata aku, enggai ka aku meda utai ti enda tentu:
Lalu idup ka aku niteh ka jalai Tuhan.
- 38 Anang enda ngamai ka jako nuan enggau aku ti anembiak
Tuhan:
Jako nya ti ngajar orang nangi ka Tuhan.
- 39 Buai pemalu nya ti dikatakut ka aku:
Laban ator Tuhan endang badas.
- 40 Peda aku ti tetengok niteh ka adat Tuhan:
Idup ka aku, olih Tuhan endang lurus.
-

- 41 Asoh pengasih nuan, Tuhan, datai nulong aku:
Lalu aku ka dilepas ka nunda ka jako Tuhan.
- 42 Baka nya aku tau nyaut sida ti bejai aku:
Olih aku arap ka jako Tuhan.
- 43 Anang ngasoh mulut aku kurang jako ti bendar:
Laban aku endang ngadang ator Tuhan.
- 44 Baka nya aku ka ngintu ajar Tuhan berari-ari:
Datai ka belama-lama.
- 45 Nyadi aku ka diau lantang:
Laban aku udah belajar ka adat Tuhan.
- 46 Aku ka nusi peneka Tuhan di moa sida rajah:
Enda aku ka malu.
- 47 Lalu aku ka andal niteh ka letak Tuhan:
Ti dikarindu ka aku.
- 48 Aku ka ngangkat ka jari aku besambiang nunda ka letak
Tuhan ti dikarindu ka aku:
Lalu aku ka berunding ka pesan Tuhan.
-
- 49 Ingat ka jako nuan enggau anembiak nuan, Tuhan;
Laban Tuhan udah ngandal ka ati aku.
- 50 Tu ti ngelantang ka aku leboh aku tusah:
Iya nya jako Tuhan ti ngidup ka aku.
- 51 Bendar amai sida ti sumbong udah beduan aku:
Tang aku meruan niteh ka ajar Tuhan.
- 52 Aku ingat ka ukum Tuhan ti endang ari kalai:
Lalu ngelantang ka ati diri.
- 53 Ati aku nyau ringat bendar dalam nyin:
Ka tegal orang ti jai, ti udah badu niteh ka ajar Tuhan.
- 54 Aku nyanyi pasal pesan Tuhan:
Dalam rumah ti endor aku nemuai.
- 55 Malam hari aku udah ingat ka nama nuan, Tuhan:
Lalu udah niteh ka ajar Tuhan.
- 56 Tu ti ka guna aku:
Awak ka aku ngintu adat Tuhan.
-
- 57 Tuhan ti untong aku:
Aku udah madah ka diri ka ngintu jako Tuhan.
- 58 Aku minta berkat Tuhan enggau pengambis ati aku:
Kasih ka aku nunda ka jako Tuhan.
- 59 Aku berunding ka pendiau diri:
Lalu mutar ka ati diri ngaga peneka Tuhan.
- 60 Aku beguai, enda aku betanggoh:
Awak ka aku tau niteh ka letak Tuhan.

- 61 Taja aku kena tangkap jarin orang ti jai:
Aku salalu ingat ka ajar Tuhan.
- 62 Tengah malam aku ka angkat lalu muji Tuhan:
Olih ator Tuhan ti lurus.
- 63 Aku bepangan enggau sida ti nangi ka Tuhan:
Enggau sida mega ti ngintu adat Tuhan.
- 64 Pengasih nuan, Tuhan, endang bisi sablah dunya:
Ajar aku pesan Tuhan.
-
- 65 Tuhan udah ngaga enggau anemiak iya:
Nunda ka jako Tuhan.
- 66 Ajar aku ngelala utai ti badas, lalu bri ka aku penemu:
Laban aku udah arap ka letak Tuhan.
- 67 Apin aku marinsa aku tesat:
Tang diatu aku ngintu jako Tuhan.
- 68 Tuhan endang badas, lalu ngaga utai ti badas:
Ajar aku pesan Tuhan.
- 69 Sida ti sumbong ati udah betenah ka aku enggau jako ti
bula:
Tang aku ka ngintu adat Tuhan enggau pengambis ati
aku.
- 70 Ati sida kras, baka ti alit olih gemu:
Tang aku rindu ka ajar Tuhan.
- 71 Aku untong laban pamarinsa aku:
Laban olih nya aku udah nemu pesan Tuhan.
- 72 Ajar jako Tuhan berguna agi ka aku:
Ari sa-ribu singkap wang mas enggau pirak.

25 HARI BULAN. SAMBIANG LEMAI

MASMUR 119

- 73 JARI Tuhan ti udah ngaga aku, ti udah ngring ka aku
mega:
Bri ka aku penemu, awak ka aku tau belajar ka letak
Tuhan.
- 74 Awak ka orang ti nangi ka Tuhan meda aku lalu gaga:
Laban aku udah arap ka jako Tuhan.
- 75 Tuhan, aku nemu ator nuan endang lurus:
Nyadi olih Tuhan endang tau dikarap ka nya alai Tuhan
nyagi aku kena penusah.
- 76 Aku minta nuan, Tuhan, ngasoh pengasih nuan ngelan-
tang ka aku:
Nunda ka jako Tuhan enggau anemiak nuan.

- 77 Awak ka Tuhan sinu ka aku, ngambi ka aku tau idup:
Laban aku rindu ka ajar Tuhan.
- 78 Awak ka sida ti sumbong ati kena malu, laban sida udah
ngalah ka aku enggau jako ti bula:
Tang aku ka berunding ka adat Tuhan.
- 79 Awak ka sida ti nangi ka Tuhan datai ngagai aku:
Nyadi sida ka nemu peneka Tuhan.
- 80 Awak ka ati aku bendar niteh ka pesan Tuhan:
Enggai ka aku kena malu.
-
- 81 Ati aku nyau ambis, tetengok dilepas ka Tuhan:
Tang aku arap ka jako Tuhan.
- 82 Mata aku nyau rabun nganti jako Tuhan di-amai ka:
Nyadi ko aku, Kamaia Tuhan ka ngelantang ka aku?
- 83 Laban gambal aku udah berubah, baka balang ti udah
chelum olih asap:
Tang ukai laban nya aku enda ingat ka pesan Tuhan.
- 84 Brapa pemanjai umur anemiak Tuhan:
Kamaia Tuhan ka ngeletak ukum ka sida ti beduan aku?
- 85 Sida ti sumbong udah numbak ka engkelubang ka nerap
ka aku:
Sida nya ti enda niteh ka ajar Tuhan.
- 86 Samoa letak Tuhan tau dikarap ka orang:
Sida beduan aku enggau jako ti bula; saup aku, Tuhan.
- 87 Aku nyau ka mati kena anu sida di menoa tu:
Tang aku enda muai adat Tuhan.
- 88 Idup ka aku, nunda ka pengasih nuan, Tuhan:
Baka nya aku tau niteh ka jako ti madah ka peneka Tuhan.
-
- 89 Jako Tuhan meruan di serga:
Datai ka belama-lama.
- 90 Tuhan endang tau dikarap ka orang datai ka pengambis
serak mensia:
Tuhan ti udah negap ka dunya, lalu iya meruan.
- 91 Iya meruan datai ka sa-hari-tu nunda ka ator Tuhan:
Laban samoa utai nunduk ka Tuhan.
- 92 Enti aku enda rindu ka ajar Tuhan:
Tentu ati aku nyau ambis olih permarinsa.
- 93 Aku ka ingat ka adat Tuhan berari:
Laban olih nya Tuhan ngidup ka aku.
- 94 Aku endang enggi nuan; idup ka aku, Tuhan:
Laban aku udah belajar ka adat Tuhan.

- 95 Sida ti jai udah ngipa aku awak ka munoh aku:
Tang aku ka berunding ka peneka Tuhan.
- 96 Aku udah meda samoa utai bisi pengujong:
Tang letak Tuhan endang pemadu iya.
-
- 97 Nyampau pemesai pengrindu aku ka ajar Tuhan:
Aku berunding ka iya besari-sari.
- 98 Letak Tuhan ngasoh aku pandai agi ari munsoh aku:
Labang iya endang enggau aku berari.
- 99 Penemu aku besai agi ari penemu samoa pengajar aku:
Laban aku berunding ka peneka Tuhan.
- 100 Aku tau mereti utai agi ari sida ti tuai:
Laban aku udah ngintu adat Tuhan.
- 101 Aku nagang diri niteh ka jalai ti salah:
Awak ka aku tau ngintu jako Tuhan.
- 102 Aku nadai limpang ari ator Tuhan:
Laban Tuhan ti udah ngajar aku.
- 103 Nyampau pemanah jako Tuhan sepi aku:
Manah agi ari ai manyi ti di-empa aku.
- 104 Olih adat Tuhan aku bulih penemu:
Nya alai aku begedi ka samoa ajar ti bula.
- 26 HARI BULAN. SAMBIANG PAGI
MASMUR 119
- 105 JAKO Tuhan baka lampu ti enggau ngiring kaki aku:
Iya nerang ka jalai aku.
- 106 Aku udah besemaia, lalu aku ka ngamai ka iya:
Aku ka ngintu ator Tuhan ti lurus.
- 107 Aku marinsa amai:
Idup ka aku, Tuhan, nunda ka jako nuan.
- 108 Aku minta nuan, Tuhan, nyambut sambiang puji aku, ti
endang olih pengran ati akuempu.
- 109 Aku endang enda iboh ka nyawa diri:
Tang aku salalu ingat ka ajar Tuhan.
- 110 Sida ti jai nan ka jarin ka nangkap aku:
Tang aku nadai limpang ari adat Tuhan.
- 111 Peneka Tuhan, nya ti di-ambi aku ka pesaka belama-
lama:
Laban nya ti ngandal ka ati aku.
- 112 Aku udah nguing ka ati aku nunda ka pesan Tuhan:
Berari-ari, datai ka belama-lama.

- 113 Aku ka begedi soh sida ti bingkok ati:
Tang aku rindu ka ajar Tuhan.
- 114 Tuhan ti endor aku tau belalai, ti ka trabai aku mega:
Aku arap ka jako Tuhan.
- 115 Lari ari aku, kita ti ngerja penyai:
Awak ka aku tau ngintu letak Petara aku.
- 116 Kring ka aku, nunda ka jako nuan, Tuhan, ngambi ka
aku tau idup:
Anang aku asa-asa olih arap ngapa.
- 117 Saup aku, lalu aku enda kena rusak:
Lalu aku ka ingat ka pesan Tuhan berari.
- 118 Tuhan enggai ka samoa sida ti limpang ari pesan iya:
Laban sida ngakal diri enggau utai ti bula.
- 119 Tuhan muai samoa, sida ti jai di dunya, baka uras:
Nya alai aku rindu ngaga peneka Tuhan.
- 120 Tuboh aku nyau geta-getar olih takut ka Tuhan:
Lalu aku nangi ka ukum Tuhan. . .
-
- 121 Aku udah ngaga utai ti ngena, ti lurus:
Anang neju ka aku kena keduana orang.
- 122 Awak ka Tuhan nentu ka pendiau anembiak iya:
Anang nyagi orang ti sumbong beduan aku.
- 123 Mata aku nyau rabun nganti Tuhan ngelepas ka aku:
Nganti jako Tuhan ti lurus.
- 124 Gaga enggau anembiak nuan, Tuhan, nunda ka pengasih
nuan:
Lalu ajar aku pesan Tuhan.
- 125 Aku endang anembiak Tuhan, bri ka aku penemu:
Awak ka aku tau nemu peneka Tuhan.
- 126 Timpoh udah datai, alai Tuhan patut ngeletak ukum:
Laban sida udah enda iboh ka ajar Tuhan.
- 127 Nya alai aku rindu ka letak Tuhan:
Lebih agi ari mas, mas ti alus.
- 128 Nya alai ko pikir aku, samoa adat Tuhan pasal barang
utai endang ngena:
Nyadi aku begedi ka adat ti enda amai.
-
- 129 Peneka Tuhan endang pemadu badas:
Nya alai ati aku niteh ka iya.
- 130 Leboh jako Tuhan ditusi, iya nerang ka orang:
Iya mri penemu ka orang ti enda landik.
- 131 Aku baka orang ti merangap ka nyawa, lalu sasengeh:
Laban aku tetengok ka nemu letak Tuhan.

- 132 Bekalih, Tuhan, lalu meda aku, lalu kasih ka aku:
Baka ti endang digaga Tuhan enggau sida ti rindu ka
nama Tuhan.
- 133 Iring aku niteh ka jako Tuhan:
Anang nyagi penyai mrintah aku.
- 134 Lepas ka aku ari orang ti beduan aku:
Baka nya aku tau ngintu adat Tuhan.
- 135 Trang ka anembiak nuan enggau penampak moa Tuhan:
Lalu ajar aku pesan Tuhan.
- 136 Ai mata aku laboh baka ai ujan:
Laban orang enda niteh ka ajar Tuhan.
-
- 137 Nuan endang lurus, Tuhan:
Nyadi ator Tuhan endang ngenat.
- 138 Utai ti ka deka Tuhan, ti dipesan Tuhan, endang lurus:
Iya endang bendar mega.
- 139 Aku nyau ka mati olih pengras ati aku:
Laban sida ti munsoh aku enda ingat ka jako Tuhan.
- 140 Jako Tuhan tuchi bendar:
Nya alai anembiak Tuhan rindu ka iya.
- 141 Aku dibantah orang, ko runding ati sida, aku nadai
beguna:
Taja baka nya aku ingat ka adat Tuhan.
- 142 Pénglurus Tuhan endang ka meruan:
Nyadi ajar Tuhan endang bendar.
- 143 Aku udah kena penusah, kena pemedis:
Tang aku rindu ka letak Tuhan.
- 144 Utai ti ka deka Tuhan endang lurus belama-lama:
Bri ka aku penemu, lalu aku ka idup.

26 HARI BULAN. SAMBIANG LEMAI
MASMUR 119

- 145 AKU udah ngangau enggau pengambis ati; anang enda
nyaut aku, Tuhan:
Aku ka ngintu pesan Tuhan.
- 146 Aku udah ngangau ka Tuhan; Idup ka aku:
Nyadi aku ka ngaga utai ti ka deka Tuhan.
- 147 Nyau dini hari aku ngangau:
Nyadi aku ngadang, nganti jako Tuhan.
- 148 Mata aku enggai tindok malam:
Laban aku berunding ka jako Tuhan.
- 149 Dinga ka nyawa aku, laban Tuhan endang nelap:
Idup ka aku, Tuhan, nunda ka ator Tuhan ngelama tu.

- 150 Orang ti jai, ti beduan aku, nyau dampih:
Sida udah muai ajar Tuhan.
- 151 Nuan endang semak, Tuhan:
Nyadi samoa letak Tuhan endang bendar.
- 152 Kenyau ari kalia aku udah nemu peneka Tuhan:
Aku nemu Tuhan nentu ka iya belama-lama.
-
- 153 Peda pamarinsa aku lalu lepas ka aku:
Laban aku salalu ingat ka ajar Tuhan.
- 154 Kring ka aku bechara lalu nebus aku:
Idup ka aku nunda ka jako Tuhan.
- 155 Orang ti jai enda tau dilepas:
Laban sida enda belajar ka pesan Tuhan.
- 156 Penyinu ati Tuhan endang besai:
Idup ka aku nunda ka ator Tuhan ngelama tu.
- 157 Sida ti beduan aku, ti ngelaban aku mayoh bendar:
Tang aku enda limping ari peneka Tuhan.
- 158 Aku meda sida ti udah mungkir, lalu aku begedi soh sida:
Laban sida enda ngintu jako Tuhan.
- 159 Peda aku rindu ka adat Tuhan:
Idup ka aku nunda ka penelap Tuhan.
- 160 Samoa jako Tuhan endang bendar:
Nyadi samoa ator Tuhan ti lurus meruan belama-lama.
-
- 161 Sida orang pengulu udah beduan aku enggau nadai
kabuah:
Tang ati aku meruan nangi ka jako Tuhan.
- 162 Aku gaga ninga jako Tuhan:
Baka orang ti udah bulih prapasan mayoh.
- 163 Aku begedi ati, lalu enggai ninga ajar ti bula:
Tang aku rindu ka ajar Tuhan.
- 164 Tujoh kali dalam sa-hari aku muji Tuhan:
Olih ator Tuhan endang lurus.
- 165 Ati sida ti rindu ka ajar Tuhan lantang bendar:
Nyadi nadai endor sida dibai bepenyalah.
- 166 Aku ngadang nuan ka ngelepas ka aku, Tuhan:
Nyadi aku udah niteh ka letak Tuhan.
- 167 Ati aku udah niteh ka peneka Tuhan:
Nyadi bendar aku rindu ka iya.
- 168 Aku udah ngintu adat enggau peneka Tuhan:
Nyadi samoa pendiau aku nyata dipeda Tuhan.
-

- 169 Awak ka kangau aku datai di nuan, Tuhan:
Bri ka aku penemu nunda ka jako Tuhan.
- 170 Awak ka sambiang aku datai di Tuhan:
Lepas ka aku nunda ka jako Tuhan.
- 171 Awak ka nyawa aku mansut ka puji:
Laban nuan, Tuhan, ngajar aku pesan nuan.
- 172 Awak ka mulut aku nyanyi pasal jako Tuhan:
Laban samoa pesan Tuhan endang lurus.
- 173 Awak ka jari Tuhan endang sedia nyaup aku:
Laban aku udah niteh ka adat Tuhan.
- 174 Aku tetengok dilepas ka Tuhan:
Nyadi aku endang rindu ka ajar Tuhan.
- 175 Idup ka samengat aku lalu aku ka muji Tuhan:
Awak ka ator Tuhan nyaup aku.
- 176 Aku udah tesat baka bedus ti nyau; giga aku ti anembiak
Tuhan:
Laban aku ingat ka letak Tuhan.

27 HARI BULAN. SAMBIANG PAGI

MASMUR 120

- LEBOH aku marinsa aku ngangau ka Tuhan:
Lalu iya nyaut aku.
- 2 Intu samengat aku, Tuhan, ari jako orang ti bula:
Ari mulut orang ti ngakal.
- 3 Nama utai ka dibri Tuhan ka nuan, nama ka ditambah iya
ka nuan:
Nuan ti bejako bula?
- 4 Laja ti tajam ti enggau orang ngayau:
Ti ditempa orang enggau arang tebilian.
- 5 Tusah aku ti begulai enggau sida Misik:
Lalu diau dalam rumah orang Kidar.
- 6 Bangat lama samengat aku udah puas diau:
Enggau sida ti begedi ati meda orang diau jenoh.
- 7 Aku tengok ka diau jenoh:
Tang leboh aku bejako ka nya, sida tengok ka prang.

MASMUR 121

- AKU ka nengkadah ka bukit:
Ari ni penyaup aku ka datai?
- 2 Penyaup aku datai ari Allah Taala:
Ti ngaga langit enggau bumi.
- 3 Nadai iya ka nyagi kaki nuan teklinchir:
Iya ti ngintu nuan enda ngantok.

- 4 Ingat, iya ti ngintu sida Israil:
Enda ngantok, enda tindok.
- 5 Tuhan ti ngintu nuan:
Tuhan ti ngelindong nuan, iya puak ka kanan nuan.
- 6 Nadai nuan ka sakit laban panas siang hari:
Enda mega laban bulan malam hari.
- 7 Tuhan ka ngintu nuan ari samoa penyai:
Iya ka ngibun samengat nuan.
- 8 Tuhan ka ngintu nuan leboh mansang, leboh pulai:
Kenyau ari tu, datai ka belama-lama iya.

MASMUR 122

- AKU andal leboh orang bejako enggau aku:
Ko sida, Aram kitai niki ngagai rumah Tuhan.
- 2 Kami ngetu, berdiri di pintu nengri kita:
Kita orang Jerusalem.
- 3 Jerusalem, iya nya nengri ti udah digaga orang:
Baka nengri ti bisi mayoh rumah beguga samoa.
- 4 Nya endor kaban orang niki, iya nya kaban anembiak
Tuhan:
Nunda ka adat orang Israil.
- 5 Dia bisi penuduk orang ti megai pechara:
Iya nya penuduk sida rumah Daud.
- 6 Besambiang kita, minta selamat ka sida Jerusalem:
Lantang pendiau sida ti rindu ka kita orang Jerusalem.
- 7 Awak ka selamat dibri ka sida ti diau dalam kota kita:
Awak ka penyamai dibri ka sida ti dalam rumah rajah kita.
- 8 Tegai menyadi enggau pangan aku:
Kamaiatu aku ka nelah, Selamat meruan enggau kita.
- 9 Tegai rumah Allah Taala, ti Petara kitai:
Aku ka ngemansang ka pemadas kita.

MASMUR 123

- AKU udah nengkadah ngagai nuan, Tuhan:
Petara ti duduk megai perintah di serga.
- 2 Baka anembiak lelaki ngemata ka tuan iya, lalu arap ka
kuasa iya,
Baka anembiak ti indu ngemata ka orang ti ngator kerja
iya, lalu arap ka kuasa iya:
Baka nya mega kami ngemata ka Tuhan ti Petara kami,
lalu arap ka iya,
Datai ka iya kasih ka kami.

- 3 Kasih ka kami, Tuhan, kasih ka kami:
Laban kami udah puas kena pechat orang.
- 4 Ati kami nyau puas amai:
Kena keduan sida ti diau lantang:
Kena pechat mega sida ti sumbong.

MASMUR 124

- ENTI Tuhan nadai enggau kami:
Pia ko sida orang Israil.
- 2 Enti Tuhan nadai enggau kami:
Leboh orang angkat ngelaban kami,
- 3 Tentu kami dibunuh sida ambis, kami baka ti ditelan jelu
besai, agi idup:
Leboh sida ringat soh kami.
- 4 Tentu ai ti bah ngampoh ka kami:
Lalu kami mati lemas dalam ai ti dras.
- 5 Tentu kami mati lemas:
Olih glumbang besai ti ngelamun kami.
- 6 Puji Tuhan olih kita:
Ti enda nyagi kami dirusak sida, baka ti dirusak ngeli jelu.
- 7 Samengat kami udah dilepas baka burong ti lepas ari
panjok orang:
Panjok udah putus lalu kami lepas.
- 8 Penyaup kami datai ari Allah Taala:
Ti ngaga langit enggau bumi.

MASMUR 125

- ORANG ti arap ka Tuhan:
Sida nya baka bukit Sion, ti enda tau beguyat, tang
meruan tetap belama-lama.
- 2 Baka bukit ti ngelingi Jerusalem:
Baka nya Tuhan ngibun anembiak iya,
Kenyau ari tu, datai ka belama-lama iya.
- 3 Laban orang ti jai nadai ka mrintah menoa orang ti lurus
berari:
Enggai ka sida ti lurus kena rampit kerja ti jai.
- 4 Awak ka Tuhan badas enggau orang ti badas pendiau:
Enggau orang mega ti lurus ati.
- 5 Tang sida ti limpang ngagai jalai ti bingkok,
Tuhan ka nganjong sida nya serta enggau orang ti ngerja
penyai:
Salamat dibri ka sida Israil.

27 HARI BULAN. SAMBIANG LEMAI

MASMUR 126

- LEBOH Tuhan mai pulai ka Sion sida ti ditangkap munsoh:
Kami baka orang ti bemimpi.
- 2 Leboh nya kami puas katawa,
Lalu mulut kami salalu nyanyi:
Leboh sida bansa bukai bejako,
Ko sida, Tuhan udah ngaga kerja besai ka orang nya.
- 3 Tuhan udah ngaga kerja besai ka kami:
Nyadi kami gaga bendar.
- 4 Bai kami ti ditangkap pulai baru, Tuhan:
Baka ai sungai di menoa salatan, ti mansang besai udah iya
nyau langkang.
- 5 Sida ti nyabak laban pedis nabor benih:
Ka gaga leboh ngetau.
- 6 Taja orang nyabak leboh mansang mai sintong benih:
Sida ka manjong laban gaga leboh sida pulai ngema padi
sida.

MASMUR 127

- ENTI enda Tuhan Allah ti ngaga rumah,
Nadai tunga kerja orang ti ngaga iya:
Enti enda Tuhan Allah ti ngintu nengri,
Nadai tunga orang enda tindak nyaga iya.
- 2 Nadai guna kita dani tumu, lalu laun tindak,
Lalu lelak bekerja ngiga pemakai:
Laban Tuhan mri utai nya ka sida ti dikarindu ka iya,
leboh sida tindak.
- 3 Ingat, anak endang pesaka ti dibri Tuhan ka orang:
Nyadi samoa anak endang upah ti dibri Tuhan ka orang.
- 4 Baka laja ti dipegai orang ti kring:
Baka nya anak orang ti agi biak.
- 5 Beberkat orang ti bisi mayoh, baka temilah ti penoh laja:
Orang nya nadai malu,
Leboh bechara di pintu nengri enggau sida ti ka ngelaban
iya.

MASMUR 128

- BEBERKAT samoa orang ti nangi ka Tuhan:
Ti mansang niteh ka jalai iya.
- 2 Tentu nuan ka bulih untong ari kerja jari nuan:
Nuan ka andal mega, lalu samoa kerja nuan ka nyadi.
- 3 Bini nuan ti diau dalam bilik nuan ka baka kayu ti lebat
bebuah:

- Lalu anak nuan ti ngelingi mija nuan ka nyadi baka paung kayu ti galak.
- 4 Pia penglantang orang nya:
Ti nangi ka Tuhan.
 - 5 Tuhan ti diau di Sion ka merkat ka nuan:
Awak ka nuan tau meda sida orang Jerusalem diau nyamai salama nuan idup.
 - 6 Awak ka nuan tau meda anak uchu nuan:
Lalu meda sida Israil diau dalam salamat.

MASMUR 129

- BALAT amai orang udah nusah ka aku, kenyau ari aku agi biak:
Pia ko jako orang Israil.
- 2 Balat amai orang udah nusah ka aku, kenyau ari aku agi biak:
Tang sida enda kala ngalah ka aku.
 - 3 Blakang aku udah bakal, baka tanah ti udah kena radu:
Abi radu sida panjai.
 - 4 Tuhan endang lurus:
Iya mutus ka tali ti ditanchang orang ti jai.
 - 5 Sida ka malu lalu nikal pulai:
Samoa sida ti pedis ati soh orang Sion.
 - 6 Sida ka baka rumput ti tumbuh di atap rumah:
Ti layu apin iya bebungai.
 - 7 Orang ti nebas enda ulih ngambi iya:
Enda mega orang ulih merkas iya.
 - 8 Nyadi orang ti mansa nadai ka bejako,
Tuhan merkat ka kita:
Kami minta berkat ka kita dalam nama Tuhan.

MASMUR 130

- ARI ai ti dalam aku udah ngangau ka nuan, Tuhan:
Dinga ka nyawa aku, Tuhan.
- 2 Singit ka pending nuan, Tuhan:
Lalu ninga ka jako sambiang aku.
 - 3 Enti Tuhan ingat ka samoa penyalah kami:
Sapa ti enda salah di moa Tuhan?
 - 4 Tang Tuhan endang ka ngampun orang:
Awak ka sida tau nangi ka iya.
 - 5 Aku nganti Tuhan, samengat aku nganti:
Nyadi aku arap ka jako Tuhan.

- 6 Samengat aku tengok ka Tuhan,
Lebih agi ari orang ti bejaga malam ngauk ka tawas:
Amal, lebih agi ari orang ti bejaga malam ngauk ka tawas.
- 7 Kita orang Israil, arap kita ka Tuhan;
Laban Tuhan endang kasih ka orang:
Nyadi iya bisi mayoh jalai ngelepas ka orang.
- 8 Nyadi iya ti ka ngelepas ka sida Israil:
Ari samoa penyalah sida.

MASMUR 131

- TUHAN, ati aku enda sumbong, mata aku enda milih meda utai ti besai:
Nadai mega aku ngiga kerja ti besai, ti enda patut digaga aku,
Tau ka pengawa ti enda ulih kerja aku.
- 2 Bendar aku udah ngenda ka diri, lalu udah ngendiau ka ati aku:
Baka penglantang anak biak ti ngelengka ka tusu,
Baka nya mega penglantang ati aku dalam nyin.
 - 3 Arap kita ka Tuhan, kita orang Israil:
Kenyau ari tu, datai ka belama-lama iya.

28 HARI BULAN. SAMBIANG PAGI

MASMUR 132

- INGAT ka Daud, Tuhan:
Enggau samoa penusah iya.
- 2 Iya ti besemaia enggau Tuhan:
Lalu besanggup enggau Petara Jakob, ti pemadu besai.
 - 3 Tentu aku enggai tama kadalam rumah aku:
Enggai mega aku gali datas padong aku;
 - 4 Aku enggai ngasoh mata aku tindok:
Enggai mega aku nyagi mata aku ngantok;
 - 5 Datai ka aku udah nemu endor Tuhan tau diau:
Iya nya rumah ka Petara Jakob, ti pemadu besai.
 - 6 Nyadi kami bisi ninga rita pasal iya ti diau di menoa Iprata:
Lalu kami nemu iya di padang dalam kampung.
 - 7 Aram kitai tama kadalam rumah iya:
Aram kitai nyungkor ka diri di kaki iya.
 - 8 Angkat, Tuhan, lalu tama ka endor alai Tuhan tau diau:
Serta enggau Ark, ti endang tanda kuasa Tuhan.
 - 9 Asoh pendiau imam Tuhan lurus:
Awak ka sida ti dikarindu ka Tuhan manjong laban andal.

- 10 Tegal Daud, anembiak Tuhan:
Anang nyagi iya ti dipilih Tuhan pulai ngapa.
- 11 Tuhan Allah udah besemaia bendar enggau Daud;
Lalu iya enda mungkir:
Ko iya, Anak uchu nuan ka megai printah nampong nuan,
- 12 Enti anak nuan ka ngamai ka semaia sida enggau aku,
Lalu niteh ka adat ti di-ajar aku ka sida:
Anak uchu sida mega ka megai printah nampong nuan,
datai ka belama-lama.
- 13 Laban Tuhan udah milih Sion:
Iya udah rindu ka iya, lalu kran ka diau dia.
- 14 Tu endor aku ka diau belama-lama:
Ditu aku ka diau; laban aku rindu ka endor tu.
- 15 Tentu aku ka merkat ka pemakai sida nya:
Aku ka ngenyang ka sida ti umang enggau roti.
- 16 Aku ka ngidup ka imam nengri nya:
Nyadi orang ti dikarindu ka Tuhan dia ka manjong laban
andal.
- 17 Dalam nengri nya, aku ka ngemansang ka kuasa sida
Daud:
Aku udah nyedia ka lampu kena sida ti dipilih aku.
- 18 Aku ka ngemalu ka munsloh iya:
Tang makota, ti dikena iyaempu, ka manchar.

MASMUR 133

- PEDA pemadas enggau penyamai:
Leboh sida ti diri menyadi begulai sama sa-ati.
- 2 Nya baka minyak wangi ti badas, ti dituang datas pala,
Ti nitik ka ragum,
Iya nya ragum Aron:
Lalu datai di rekong kalambi iya.
- 3 Baka ai ambun di bukit Hermon,
Ti map bukit Sion:
Laban dia Tuhan ngeletak ka berkat,
Iya nya idup meruan.

MASMUR 134

- DINGA kita; Bri berkat ka Tuhan, samoa kita anembiak
Tuhan:
Kita ti bediri malam dalam rumah Tuhan.
- 2 Unjor ka jari kita nunga endor ti kudus:
Lalu puji Tuhan.

- 3 Tuhan ti diau di Sion merkat kita:
Iya nya pengaga langit enggau bumi.

MASMUR 135

- ALLELUYA.
Puji nama Tuhan:
Puji iya, kita ti anembiak iya.
- 2 Kita ti bediri dalam rumah Tuhan:
Dalam balai rumah Petara kitai.
- 3 Puji Tuhan; laban Tuhan endang badas:
Nyanyi, lalu muji nama iya; laban endang manah ngaga
baka nya.
- 4 Laban Tuhan udah milih sida Jakob nyadi anembiak iya:
Enggau sida Israil nyadi reta iyaempu.
- 5 Laban aku nemu Tuhan endang besai:
Aku nemu mega Petara kitai ari atas samoa petara bukai.
- 6 Tuhan udah ngaga barang utai ti ka deka iya:
Di langit, dalam dunya, dalam tasik, dalam ai ti dibaroh
tanah mega.
- 7 Iya ngasoh ambun datai ari samoa telok dunya:
Iya ngaga kilat enggau ujan;
Iya mansut ka ribut ari endor ti penatai iya.
- 8 Iya ti munoh samoa anak ti tuai di menoa Misir:
Anak mensia enggau anak jelu.
- 9 Iya ngaga klai enggau kerja ti nyelai di tengah kita orang
Misir:
Ti nganu Paro enggau samoa anembiak iya.
- 10 Iya ngerusak ka mayoh bansa mensia:
Lalu munoh sida rajah ti besai.
- 11 Sihon ti rajah orang Amor,
Enggau Og ti rajah menoa Basan:
Enggau samoa printah di menoa Kanan.
- 12 Lalu magi tanah sida nyadi pesaka:
Iya nya pesaka sida Israil ti anembiak iya.
- 13 Nama nuan, Tuhan, meruan belama-lama:
Nyadi Tuhan di-ingat ka datai ka ambis samoa serak
orang.
- 14 Laban Tuhan ka bechara ka anembiak iya:
Nyadi ati iya ka berubah, lalu ingat ka anembiak iya.
- 15 Beralah ti disembah sida, digaga ari pirak enggau mas aja:
Iya digaga jari mensia.
- 16 Mulut iya bisi, tang bejako enda tau:
Mata iya bisi, tang meda enda tau.

- 17 Pending iya bisi, tang ninga enda tau:
Nadai mega bisi seput dalam tuboh iya.
- 18 Orang ti ngaga beralah ka nyadi sabaka enggau iya:
Iya nya orang ti arap ka iya.
- 19 Kita ti purih Israil, puji Tuhan olih kita:
Kita ti purih Aron, puji Tuhan olih kita.
- 20 Kita ti purih Livai, puji Tuhan olih kita:
Kita ti nangi ka Tuhan, puji Tuhan olih kita.
- 21 Puji Tuhan kita orang Sion:
Puji iya ti diau di Jerusalem.
Alleluya.

28 HARI BULAN. SAMBIANG LEMAI

MASMUR 136

- Puji Tuhan Allah Taala, laban iya badas:
Laban pengasih iya meruan belama-lama.
- 2 Puji Petara ti ari atas samoa petara:
Laban pengasih iya meruan belama-lama.
- 3 Puji Tuhan ti ari atas samoa Tuan:
Laban pengasih iya meruan belama-lama.
- 4 Puji iya ti siko aja, ti tau ngaga kerja ti besai:
Laban pengasih iya meruan belama-lama.
- 5 Puji iya ti bisi kuasa ngaga langit:
Laban pengasih iya meruan belama-lama.
- 6 Puji iya ti nganchau tanah kring atas ai:
Laban pengasih iya meruan belama-lama.
- 7 Puji iya ti ngaga penampak ti pepadu iya:
Laban pengasih iya meruan belama-lama.
- 8 Iya nya matahari ti mrintah siang hari:
Laban pengasih iya meruan belama-lama.
- 9 Bulan enggau bintang ti mrintah malam hari:
Laban pengasih iya meruan belama-lama.
- 10 Puji iya ti munoh anak ti tuai sida orang Misir:
Laban pengasih iya meruan belama-lama.
- 11 Lalu mai sida Israil pansut ari menoa sida:
Laban pengasih iya meruan belama-lama.
- 12 Enggau jari ti bekuasa, enggau lengan ti di-unjor:
Laban pengasih iya meruan belama-lama.
- 13 Puji iya ti magi Tasik Mansau awak ka bisi jalai mansa:
Laban pengasih iya meruan belama-lama.
- 14 Lalu ngasoh sida orang Israil nengah iya ka sebrai:
Laban pengasih iya meruan belama-lama.

- 15 Tang iya ngalah ka Paro enggau bala iya, ti lemas dalam
Tasik Mansau:
Laban pengasih iya meruan belama-lama.
- 16 Puji iya ti ngulu ka anembiak iya nengah menoa puang:
Laban pengasih iya meruan belama-lama.
- 17 Puji iya ti ngalah ka sida rajah ti besai:
Laban pengasih iya meruan belama-lama.
- 18 Lalu munoh sida rajah ti besai nama:
Laban pengasih iya meruan belama-lama.
- 19 Sihon, ti rajah orang Amora-lama:
Laban pengasih iya meruan belama-lama.
- 20 Enggau Og, ti rajah menoa Basan:
Laban pengasih iya meruan belama-lama.
- 21 Lalu magi tanah sida nyadi pesaka:
Laban pengasih iya meruan belama-lama.
- 22 Iya nya pesaka sida Israil ti anembiak iya:
Laban pengasih iya meruan belama-lama.
- 23 Iya ti ingat ka kitai leboh kitai tusah:
Laban pengasih iya meruan belama-lama.
- 24 Lalu ngelepas ka kitai ari munsoh kitai:
Laban pengasih iya meruan belama-lama.
- 25 Iya ti mri pemakai ka samoa utai ti idup:
Laban pengasih iya meruan belama-lama.
- 26 Puji iya ti Petara, ti megai printah di serga:
Laban pengasih iya meruan belama-lama.

MASMUR 137

- KAMI duduk lalu nyabak,
Di tebing sungai di menoa Babilon:
Leboh kami ingat ka nengri Sion.
- 2 Kami ngantong engkratong kami:
Di kayu ti di menoa nya.
- 3 Dia sida ti nangkap kami nanya ka joko pantun kami.
Nyadi sida ti ngerusak kami ngasoh kami rami,
Ko sida, Nyanyi ka kami pantun nengri Sion.
- 4 Kati ko kami tau nyanyi pantun Allah Taala:
Di menoa orang ti bansa bukai?
- 5 Enti aku enda ingat ka nengri Jerusalem:
Awak ka jari kanan aku enda agi nemu ngaga utai.
- 6 Awak ka dilah aku enda engkebut, lalu nyadi bisu:
Enti aku enda ingat ka kita,
Enti aku enda rindu ka nengri Jerusalem,
Lebih agi ari utai ti dikarindu ka aku.

- 7 Ingat ka kerja sida orang Idom, Tuhan,
Iya nya leboh sida ngerusak nengri Jerusalem:
Sida ti bejako, Ruboh ka iya, ruboh ka iya,
Datai ka tanah, ti alai iya beduduk.
- 8 Kita di nengri Babilon, ti ka dirusak:
Beberkat iya ti malas kita,
Baka ti digaga kita enggau kami.
- 9 Beberkat iya ti nangkap, lalu ngempas ka anak mit kita:
Datas batu.

MASMUR 138

- AKU ka muji Tuhan enggau pengambis ati:
Di moa sida petara, aku ka nyanyi muji Tuhan.
- 2 Aku ka nyungkor ka diri nunga ka kaaba Tuhan ti kudus;
Lalu muji nama Tuhan tegal pengasih enggau pemendar
Tuhan:
Laban nuan, Tuhan, udah ngemesai ka nama nuan ari
atas samoa utai.
- 3 Leboh aku ngangau, Tuhan ninga ka aku:
Tuhan ngasoh ati aku brani, olih Tuhan bisi ngring ka ati
aku.
- 4 Samoa sida rajah di dunya ka muji nuan, Tuhan:
Laban sida udah ninga jako ti ditelah Tuhan.
- 5 Amai, sida ka nyanyi pasal kerja Tuhan:
Laban kuasa Tuhan endang besai.
- 6 Nyadi taja Tuhan endang besai, iya ka ingat ka orang ti
baroh:
Tang sida ti sumbong endang temu iya, taja sida jauh ari
iya.
- 7 Taja aku diau di tengah penusah, Tuhan ka ngidup ka
aku:
Tuhan ka ngunyor jari iya ngelaban munsoh aku, ti ka
nganu aku;
Lalu jari kanan Tuhan ka ngidup ka aku.
- 8 Tuhan ka nembu ka samoa utai ti digaga iya enggau aku:
Pengasih nuan, Tuhan, meruan belama-lama,
Anang ngelengka ka kerja ti udah dipungkal Tuhan.

29 HARI-BULAN. SAMBIANG PAGI

MASMUR 139

- TUHAN, nuan udah ngabas aku:
Lalu nuan nemu aku.
- 2 Tuhan ti nemu leboh aku ngetu, leboh aku angkat mega:
Tuhan ti nemu pragam aku, taja aku jauh ari Tuhan.

- 3 Tuhan ti ngabas aku leboh aku bejalai, leboh aku gali
mega:
Tuhan ti nemu samoa pendiau aku.
- 4 Taja apin sa-leka jako pansut:
Tuhan udah nemu samoa.
- 5 Tuhan ngintu aku ari moa, ari blakang:
Tuhan mega ti megai aku.
- 6 Penemu ti nyelai baka nya, aku enda tau mereti iya:
Iya besai bendar, aku enda te-ulih ka iya.
- 7 Kini aku tau bejalai, ti alai kuasa Tuhan nadai bisi:
Kini aku tau lari, ti alai nadai bisi Tuhan dia?
- 8 Enti sema aku tau niki ka langit, Tuhan bisi dia:
Enti sema aku tau nganchau tikai aku di sabayan, Tuhan
bisi dia mega.
- 9 Enti sema aku bisi sayap, lalu tau terbai neras matahari:
tumbuh pagi-pagi:
Lalu diau di punggung tasik;
- 10 Dia pen jari Tuhan ka ngiring aku:
Nyadi jari kanan Tuhan ka megai aku.
- 11 Enti sema aku bejako, ko aku, Tentu aku enda dipeda,
laban ditudong petang:
Lalu siang ti nerang ka aku udah nyadi malam;
- 12 Dalam petang nya pen samoa utai dipeda Tuhan:
Nyadi malam hari samoa utai endang tampak dipeda
Tuhan, baka ti leboh siang hari;
Malam enggau siang sabaka dipeda Tuhan.
- 13 Nyadi Tuhan ti udah ngaga ati aku dalam nyin:
Tuhan ti udah ngator aku, leboh aku dikandong ka indai
aku.
- 14 Aku ka muji Tuhan, laban aku digaga pemadu nyelai:
Kerja Tuhan pemadu iya;
Nyadi tentu ati aku nemu nya,
- 15 Tulang aku endang ayan dipeda Tuhan,
Leboh aku digaga enda dipeda orang:
Leboh aku digaga enggau jimat dalam petang, baka ti
dalam lubang ti pemadu dalam.
- 16 Mata Tuhan meda aku apin aku bisi:
Nyadi dalam surat Tuhan, samoa hari umur aku ditulis,
Iya nya pemanjai umur aku ti diletak Tuhan,
Taja leboh nya hari nya apin datai.
- 17 Nyampau pemadas pragam nuan, Tuhan Allah, dirund-
ing aku:
Nyampau pemayoh iya mega.

- 18 Enti iya ditesi aku, iya mayoh agi ari pasir:
Leboh aku dani aku agi enggau Tuhan.
- 19 Badas enti nuan, Tuhan Allah, munoh sida ti jai:
Nya alai pulai ari aku, kita ti brani munoh orang.
- 20 Laban sida nya ngaga kerja jai ngelaban Tuhan:
Nyadi sida ti munsoh Tuhan nadai bebasa ka nama
Tuhan.
- 21 Kati, aku enda pedis ati soh sida ti pedis ati soh nuan,
Tuhan:
Lalu begedi ati soh sida ti angkat ngelaban Tuhan?
- 22 Bendar aku pedis ati soh sida:
Aku ngerunding sida nya nyadi munsoh aku.
- 23 Abas aku, Tuhan, ti Petara aku, ngambi ka nemu pragam
ati aku:
Uji aku, lalu nemu runding aku.
- 24 Lalu peda, nyangka bisi utai jai digaga aku, ti ka ngasoh
ati aku enda lantang:
Iring aku, Tuhan, nengah jalai ngagai idup meruan.

MASMUR 140

- LEPAS ka aku, Tuhan, ari orang ti jai:
Intu aku ari orang ti mangah.
- 2 Sida nya berunding dalam ati ngaga kerja ti jai:
Genap hari sida mai orang belaban.
- 3 Jako sida tajam, baka dilah ular ti bisa:
Mulut sida baka mulut ular ti bisi rachun dalam nyin.
- 4 Intu aku, Tuhan, ari jari sida ti jai;
Idup ka aku ari orang ti mangah:
Ti bisi ati mai aku tesat.
- 5 Orang ti sumbong udah nan panjok enggau tali, ka nang-
kap aku:
Sida udah ngator jarin di tisi jalai;
Sida udah nan peti ka munoh aku.
- 6 Aku bejako enggau Tuhan, ko aku, Tuhan ti Petara aku:
Dinga ka jako sambiang aku, Tuhan.
- 7 Nuan Allah Taala, ti Tuhan, ti kring ngelepas ka aku:
Tuhan ti udah ninding pala aku leboh beprang.
- 8 Anang mri utai ti ka deka orang ti jai, Tuhan:
Anang nyagi akal sida ti jai nyadi; enggai ka sida ngemesai
ka diri.
- 9 Leboh sida ngelingi aku, angkat ka pala:
Awak ka sidaempu kena anu jako nya, ti enggau sida ka
nganu aku.

- 10 Awak ka bara api ninggang sida:
Awak ka sida dibuai kadalam api;
Kadalam lubang ti dalam mega, awak ka sida enda tau
angkat agi.
- 11 Orang ti betenah nadai tau tetap di dunya tu:
Penyai ka ninggang orang nya, awak ka ngalah ka iya.
- 12 Aku nemu Tuhan ka ngring ka pechara orang ti tusah:
Lalu ngeletak ka adat ti ngena ka orang ti umang.
- 13 Tentu orang ti lurus ka muji nama Tuhan:
Nyadi orang ti ngaga utai ti ngena, ka diau begulai enggau
Tuhan.

MASMUR 141

- AKU udah ngangau ka nuan, Tuhan; anang betanggoh
nyaup aku:
Pending ka nyawa aku leboh aku ngangau ka Tuhan.
- 2 Awak ka sambiang aku di-enjok ka Tuhan baka menyan:
Nyadi leboh aku ngunyor ka jari besambiang awak ka nya
baka piring ti di-enjok orang tiap lemai.
- 3 Jaga nyawa aku, Tuhan:
Tagang mulut aku.
- 4 Anang nyagi ati aku tengok ka barang utai ti jai,
Anang ngasoh aku ngaga penyalah
Enggau orang ti ngerja penyai:
Anang ngasoh aku saum enggau sida makai utai ti nyamai.
- 5 Awak ka sida ti lurus malu aku; baka nya sida tau ngajar
aku, olih sida nelap;
Awak ka sida nganu aku; lalu nya baka minyak ti dituang
di pala aku:
Anang ngasoh pala aku enggai nyambut nya,
Tang awak ka aku agi besambiang ngelaban kerja sida ti jai.
- 6 Udah hakim sida dibaring ka endor batu ti renjan:
Baru sida ka ninga ka jako aku; laban jako nya badas
didinga.
- 7 Tulang kami nyau pambar di pintu sabayan:
Baka leboh orang ngerepak kayu di tanah.
- 8 Nyadi mata aku endang nunga ka nuan, Allah Taala, ti
Tuhan aku:
Aku bepanggai di Tuhan; anang ngasoh samengat aku
kena rusak.
- 9 Intu aku ari panjok ti ditan sida, ka nangkap aku:
Ari peti sida ti ngerja penyai.
- 10 Awak ka sida ti jai kena tangkap jarin sidaempu:
Tang aku mansa lalu lebus.

29 HARI BULAN. SAMBIANG LEMAI

MASMUR 142

- Aku ngangau ka Tuhan enggau nyawa ti inggar:
 Aku besambiang ka Tuhan enggau nyawa ti besai.
- 2 Aku ka mansut ka penakut aku di moa iya:
 Aku ka madah ka penusah diri ngagai iya.
 - 3 Leboh aku ti mati ati, Tuhan endang nemu pejalai aku:
 Orang udah nan panjok di jalai ti ditengah aku.
 - 4 Malik nunga ka kanan aku, lalu peda aku, Tuhan; laban nadai orang ti ngelala aku:
 Nadai agi endor ti alai aku tau lari; nadai bisi orang mega ti ka ngidup ka nyawa aku.
 - 5 Aku udah ngangau ka nuan, Tuhan;
 Ko aku, Tuhan ti alai aku bepanggai:
 Pesaka aku bisi enggau Tuhan, di menoa orang ti idup belama-lama.
 - 6 Dinga ka kangau aku; laban aku nyau ka alah:
 Lepas ka aku ari sida ti beduan aku; laban sida kring agi ari aku.
 - 7 Lepas ka samengat aku ari penusah awak ka aku tau muji nama Tuhan:
 Sida ti lurus ka ngelingi aku;
 Laban nuan, Tuhan, ngaga badas enggau aku.

MASMUR 143

- DINGA ka sambiang aku, Tuhan; pending ka utai ti dipinta aku:
 Saut aku, Tuhan, olih nuan endang tau dikarap, endang lurus.
- 2 Anang mai anembiak nuan kena pechara, Tuhan:
 Laban nadai mensia siko ti dipeda Tuhan lurus.
 - 3 Laban sida ti munsoh aku udah ngachau samengat aku;
 Iya nganu aku datai ka aku rebah ka tanah:
 Iya ngasoh aku diau di endor ti petang, baka orang ti lama udah mati.
 - 4 Nya alai aku nyau temati ati:
 Ati aku nyau ambis dalam nyin.
 - 5 Aku ingat ka timpoh aku dulu kalia:
 Aku bekenang ka samoa utai ti digaga Tuhan;
 Aku berunding ka kerja ti digaga jari Tuhan.
 - 6 Aku ngunyor ka jari ngagai Tuhan:
 Ati aku tengok ka Tuhan, baka tanah ti rangkai tengok ka ai ujan.

- 7 Anang betanggoh nyaut aku, Tuhan; ati aku nyau ka mati:
 Anang enda malik song aku;
 Enggai ka aku nyadi baka orang ti nurun ka sabayan.
- 8 Pagi hari asoh aku nemu pengasih nuan, Tuhan;
 Laban aku arap ka Tuhan:
 Asoh aku nemu jalai ti patut ditengah aku;
 Laban aku ngangkat ka ati ngagai Tuhan.
- 9 Lepas ka aku ari munsoh aku, Tuhan:
 Aku lari ngagai Tuhan, awak ka di-intu Tuhan.
- 10 Ajar aku ngaga utai ti ka deka Tuhan, laban Tuhan ti Petara aku:
 Awak ka Roh Tuhan ti badas ngiring aku nengah menoa ti rata.
- 11 Idup ka aku, Tuhan, tegal nama Tuhan:
 Olih Tuhan endang lurus, lepas ka ati aku ari penusah.
- 12 Alah ka munsoh aku ambis, Tuhan, olih nuan endang nelap:
 Lalu ngerusak samoa sida ti ngachau samengat aku,
 Laban aku endang anembiak Tuhan.

30 HARI BULAN. SAMBIANG PAGI

MASMUR 144

- BEBERKAT Tuhan ti endang nyadi kubau-batu aku:
 Ti ngring ka aku dalam prang,
 Lalu ngasoh jari aku pandai beprang.
- 2 Tuhan ti pepadu nelap, ti kubau aku,
 Tuhan ti kota aku ti tinggi, ti pinglepas aku:
 Tuhan ti trabai aku, Tuhan ti dikarap ka aku;
 Tuhan ti ngasoh anembiak aku nunduk ka aku.
 - 3 Nama guna mensia, Tuhan, alai Tuhan ngingat ka sida:
 Tau ka anak mensia alai Tuhan berunding ka sida?
 - 4 Mensia sigi baka seput:
 Pemanjai umur orang baka kelemayang ti nyau ayas.
 - 5 Buka langit, Tuhan, lalu nurun:
 Tegu bukit, lalu iya ka berasap.
 - 6 Pansut ka kilat, lalu pambar ka orang:
 Timbak ka laja nuan, Tuhan, lalu nusah ka orang.
 - 7 Unyor ka jari nuan ari atas:
 Idup ka aku, lalu lepas ka aku ari ai ti dalam;
 Lepas ka aku ari jari orang bansa buhai:

- 8 Mulut sida bejako ngapa:
Lalu sida bula leboh ngangkat ka jari kanan sida nentu ka semaia.
- 9 Aku ka nyanyi ka nuan, Tuhan Allah, pantun ti baru:
Enggau engkratong ti bisi sapuluh tali, aku ka muji Tuhan.
- 10 Iya ti ngasoh sida rajah menang:
Iya ti ngelepas ka Daud, anembiak iya ari pedang sida ti ngelaban iya.
- 11 Idup ka aku, lalu lepas ka aku ari jari orang bansa bukai:
Mulut sida bejako ngapa,
Lalu sida bula leboh ngangkat ka jari kanan sida nentu ka semaia.
- 12 Awak ka anak lelaki kami ti agi biak tau nyadi baka tambak kayu ti galak:
Enggau anak indu kami baka batu ti di-ukir di siku Istana Rajah.
- 13 Awak ka plaboh kami penoh enggau mayoh macham utai ti di-empa:
Lalu domba kami ka beranak beribu-ribu di padang kami.
- 14 Awak ka krebau kami kring narit utai ti brat:
Anang nyagi munsoh tama nengri kami, anang ngasoh kami pansut nunduk ka sida,
Anang nyagi munyi sabak didinga di pasar kami.
- 15 Lantang pendiau orang ti baka nya:
Amai lantang orang nya ti bisi Tuhan ka Petara sida.

MASMUR 145

- Aku ka ngemesai ka nuan, Tuhan, ti Petara aku, ti Rajah aku:
Aku ka muji nama Tuhan belama-lama.
- 2 Genap hari aku ka muji Tuhan:
Lalu nyanyi, muji nama Tuhan belama-lama.
- 3 Tuhan endang besai, nyadi patut bendar iya dipuji mensia:
Pemesai iya enda tau disagam orang.
- 4 Orang serak siti ka madah ka serak ti dudi, kerja ti digaga Tuhan, lalu ka muji iya:
Lalu ka nusi utai besai ti digaga Tuhan.
- 5 Aku ka ngenang pemesai kuasa enggau basa Tuhan:
Enggau kerja nyelai mega ti digaga Tuhan.
- 6 Nyadi orang bejako pasal kerja Tuhan ti kring, ti nakut ka sida:
Lalu aku ka nusi ka orang pemesai Tuhan.

- 7 Sida salalu ingat ka pemadas Tuhan ti besai:
Lalu ka nyanyi pasal penglurus Tuhan.
- 8 Tuhan endang nelap, iya sinu ati:
Iya lobah ringat, lalu pemadu pengasih.
- 9 Tuhan endang badas enggau samoa mensia:
Lalu iya kasih ka samoa utai ti digaga iya.
- 10 Samoa utai ti digaga nuan, ka muji nuan, Tuhan:
Nyadi anembiak ti dikarindu ka nuan, ka muji nuan, Tuhan.
- 11 Sida ka bejako pasal pemadas printah Tuhan:
Lalu ka ngenang kuasa Tuhan.
- 12 Awak ka nusi ka mensia utai besai ti digaga Tuhan:
Enggau pemesai pemadas printah Tuhan.
- 13 Printah Tuhan endang printah ti meruan belama-lama:
Nyadi Tuhan endang Rajah datai ka pengambis serak orang.
- 14 Tuhan nyangga samoa sida ti ka rebah:
Lalu ngangkat ka sida ti udah tetrap.
- 15 Samoa orang ngemata ka Tuhan:
Lalu Tuhan mri pemakai ka sida leboh timpoh sida.
- 16 Nuan muka jari nuan, Tuhan:
Lalu ngenyang ka samoa utai ti idup.
- 17 Samoa utai ti digaga Tuhan endang lurus:
Nyadi samoa kerja Tuhan endang nelap.
- 18 Tuhan endang dampih samoa sida ti ngangau ka iya:
Samoa sida ti ngangau enggau ati ti bendar.
- 19 Iya ka mri utai ti ka deka orang ti nangi ka iya:
Iya ka ninga ka kangau sida, lalu ka ngelepas ka sida.
- 20 Tuhan ngintu samoa orang ti rindu ka iya:
Tang samoa sida ti jai ka dibunuh iya.
- 21 Nyawa aku ka muji Tuhan:
Awak ka samoa mensia muji nama iya ti kudus belama-lama.

MASMUR 146

- ALLELUYA:
Awak ka samengat aku muji Tuhan.
- 2 Sapemanjai umor aku, aku ka muji Tuhan:
Aku ka nyanyi muji Tuhan salama aku idup.
- 3 Anang arap ka orang ti besai:
Anang arap ka mensia ti enda tau nyaup kita.
- 4 Uдах seput sida nyau apus, sida pulai nyadi tanah:
Kamaianya mega pragam sida nyau ambis.

- 5 Lantang orang nya ti disaup Allah Taala ti Petara Jakob:
Ti bepanggai di Tuhan ti Petara iya.
- 6 Tuhan nya ti ngaga langit enggau bumi,
Enggau tasik, enggau samoa utai ti dalam iya:
Tuhan ti meruan bendar belama-lama.
- 7 Tuhan ti mutus ka pechara ka sida ti kena keduan;
Ti mri pemakai ka sida ti lapar:
Tuhan ti ngelepas ka orang ti kena tangkap.
- 8 Tuhan ti ngasoh menchelak mata orang ti buta;
Lalu ngangkat ka sida ti udah tetrap:
Tuhan ti rindu ka orang ti lurus.
- 9 Tuhan ti ngintu orang temuai;
Lalu ngring ka sida ti patu, ti balu;
Tang iya nesat ka pejalai orang ti jai.
- 10 Tuhan ka megai printah belama-lama:
Petara kita orang Sion, ka meruan datai ka pengambis
serak orang.
Alleluya.

30 HARI BULAN. SAMBIANG LEMAI

MASMUR 147

Puji Tuhan

Laban endang badas nyanyi, lalu muji Allah Taala, Petara
kitai:

Laban nya ngena, lalu patut iya dipuji.

- 2 Tuhan ngaga baru nengri Jerusalem:
Iya ngempuru ka sida orang Israil ti udah pambar.
- 3 Iya ngelantang ka sida ti tusah ati:
Iya malut telih sida.
- 4 Iya tau nesa pemayoh bintang:
Iya mri nama ka samoa iya.
- 5 Tuhan kitai endang besai, kuasa iya mega pemadu besai:
Penemu iya mega pemadu iya.
- 6 Tuhan ti ngring ka sida ti baroh ari:
Iya ngemaroh ka sida ti jai datai ka tanah.
- 7 Nyanyi ka Tuhan enggau ati andal:
Nyanyi lalu muji Allah Taala enggau lagu engkratong.
- 8 Iya ti ngaga moa-hari di langit;
Lalu ngator ujan ka guna dunya:
Iya ti numboh ka rumput datas bukit.
- 9 Iya mri pemakai ka samoa jelu:
Ka anak kak mega ti bemunyi.

- 10 Ukai iya andal laban pengring kuda:
Enda mega iya gaga laban pengring kaki mensia.
- 11 Tang Tuhan andal meda orang ti nangi ka iya:
Enggau sida mega ti arap ka pengasih iya.
- 12 Puji Tuhan, kita orang Jerusalem:
Puji Petara, kita orang Sion.
- 13 Laban iya udah negoh ka gelangang pintu nengri kita:
Iya udah mri berkat ka anak kita ti dalam nyin.
- 14 Iya ngemadu ka prang di menoa kita:
Iya ngenyang ka kita enggau gandom ti badas amai.
- 15 Iya ngasoh pesan iya ditemu sablah dunya:
Jako iya ngidar dras amai.
- 16 Selju ti digaga iya baka bulu bedus:
Ambun ti meku dipeda orang baka amau kayu.
- 17 Ujan batu ari langit dibuai iya baka redak roti:
Sapa ti tau tan leboh iya ngator musin chelap?
- 18 Serta iya bejako, utai nya lalu lela:
Iya ngasoh ribut betiup, lalu sungai nyau anyut.
- 19 Iya nusi jako iya ka sida Jakob:
Pesan enggau ator iya ka sida Israil.
- 20 Nadai iya ngaga baka nya enggau bansa bukai:
Nadai bisi orang bukai ti nemu ator iya.
Alleluya.

MASMUR 148

ALLELUYA.

Puji Tuhan, kita ti di serga:

Puji iya, kita ti di endor ti tinggi.

2 Puji iya, samoa kita malikat iya:

Puja iya samoa kita bala iya.

3 Puji iya, matahari enggau bulan:

Puji iya, samoa bintang ti tampak.

4 Puji iya, kita ti di serga ti pemadu tinggi:

Enggau ai ti ari atas langit.

5 Awak ka samoa utai nya muji nama Allah Taala:

Laban iya bejako, lalu utai nya nyadi.

6 Iya udah netap ka utai nya mega belama-lama:

Iya mri ator, ti dititeh ka utai nya magang.

7 Puji Tuhan, kita ti di bumi:

Kita ikan ti besai enggau tasik ti dalam.

8 Kilat enggau ujan batu, selju enggau ambun:

Ribut mega, ti ngasi ka jako iya.

- 9 Bukit enggau samoa munggu:
Kayu ti bebuah enggau samoa kayu ru.
- 10 Jelu kampong enggau samoa jelu ti ditupi orang:
Utai ti ngerayap enggau burong ti terbai.
- 11 Rajah di dunya enggau samoa bansa mensia:
Orang ti besai enggau samoa orang ti megai pechara di dunya.
- 12 Sida ti bujang enggau sida ti dara mega:
Orang tuai enggau anak mit.
- 13 Awak ka sida muji nama Tuhan;
Laban nama iya besai:
Mulia iya besai agi ari dunya enggau langit.
- 14 Iya udah ngemesai ka kuasa anembiak iya;
Lalu nya dipuji samoa sida ti dikarindu ka iya:
Iya nya orang Israil, orang ti semak iya.
Alleluya.

MASMUR 149

ALLELUYA.

- Nyanyi ka Tuhan lagu ti baru:
Puji iya leboh anembiak iya begempuru.
- 2 Awak ka sida orang Israil andal ngingat ka iya ti ngaga sida:
Awak ka sida orang Sion gaga, ngingat ka Rajah sida.
- 3 Awak ka sida muji nama iya leboh bepencha:
Awak ka sida nyanyi lalu muji iya enggau dumbak enggau engkratong.
- 4 Laban Tuhan rindu kasih ka anembiak iya:
Iya ngemesai ka sida ti baroh ati, olih iya ngasoh sida menang.
- 5 Awak ka sida ti dikarindu ka iya gaga olih sida menang:
Awak ka sida nyanyi mega leboh gali.
- 6 Awak ka mulut sida muji Allah Taala:
Lalu jari sida megai pedang ti bemata dua.
- 7 Awak ka malas orang ti petang:
Lalu ngukum samoa bansa mensia.
- 8 Awak ka masong rajah sida enggau rantai:
Enggau sida orang besai enggau glang besi.
- 9 Awak ka ngukum sida nunda ka letak Tuhan:
Lalu samoa orang ti dikarindu ka iya dipebasa ka olih nya.
Alleluya.

MASMUR 150

ALLELUYA.

- Puji Allah Taala dalam rumah iya:
Puji iya di langit ti endor kuasa iya.
- 2 Puji iya olih kerja iya ti besai:
Puji iya olih kuasa iya ti pepadu iya.
- 3 Puji iya enggau munyi ensrunai:
Puji iya enggau engkrebap enggau engkratong.
- 4 Puji iya enggau dumbak enggau pencha:
Puji iya enggau blikan enggau suling.
- 5 Puji iya enggau bendai ti inggar:
Puji iya enggau tawak ti nyaris.
- 6 Awak ka samoa utai ti idup muji Tuhan:
Alleluya.